

27


Milik Departemen P dan K  
Tidak diperdagangkan  
Untuk umum

# Hikayat Peureudan Ali 2

Teungku Paket

Direktorat  
Layanan

Departemen Pendidikan dan Kebudayaan



269.2242  
TED  
h

HIKAYAT PEUREUDAN ALI  
2

DIREKTORAT KESENIAN	
SUB. DIREKTORAT PENCERAMAHAN	
APPRECIASI DAN PRESTASI SENI	
SISTEM DOKUMENTASI	
Klas/Kode	No. Indek
DPE 1129 BT	1120/85 14 DESEMBER 1985 Paraf : ms

# Hikayat PEUREUDAN ALI 2

Dikarang oleh  
**TEUNGKU PAKEH**

Dialihaksarkan oleh  
**RAMLI HARUN**

Departemen Pendidikan dan Kebudayaan  
**PROYEK PENERBITAN BUKU SASTRA**  
**INDONESIA DAN DAERAH**  
Jakarta 1984

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuananya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1984

Proyek Penerbitan Buku Sastra  
Indonesia dan Daerah

## **RINGKASAN CERITA HIKAYAT PEUREUDAN ALI**

### **JILID II**

Angkatan perang Raja Syarif telah tiba di Palistina. Seorang utusan yang membawa surat, diterima oleh Menteri Adan yang sudah berada di Palistina atas permintaan Peureudan Ali. Surat itu dibalasnya dan membuat Raja Syarif sangat marah. Pasukannya diperintahkan untuk menyerang, tetapi mereka bingung melihat kota dikelilingi oleh parit yang penuh dengan pancang besi.

Permaisuri Raja Syarif yang bernama Safiah pagi hari melihat pintu istana terbuka. Putri Hindi Licens berikut dengan segala perhiasannya tidak ada di tempat. Ia menangis sambil memanggil-manggil anaknya. Seisi istana menjadi gempar melihat permaisuri jatuh pingsan. Menteri Cut Ben beserta dengan beberapa pengawal segera berangkat ke Palistina memberitahukan peristiwa itu kepada raja.

Peureudan Ali dan Hindi Licens sudah tiba di Jarussalam. Sesudah memberitahukan abangnya bahwa negeri Palistina sedang dikepung musuh, ia berangkat lagi. Dengan menyamar sebagai pengemis mereka berhasil memasuki istana Palistina tanpa ada orang yang mengenal. Hindi Licens diserahkan kepada Putri Arian untuk diajarkan ilmu agama.

Raja Ahmad Kasari dan Menteri Sakdi dengan sejumlah pasukannya berangkat pula ke Palistina untuk membantu Peureudan Ali. Dalam perjalanan mereka dihadang oleh pasukan Raja Syarif. Terjadilah pertempuran seru. Peureudan Ali datang membantu dan menyerang pasukan Raja Syarif dari belakang. Pertempuran berlangsung seimbang. Ketika itu pula Raja Syarif mendapat berita dari Menteri Cut Ben bahwa anaknya sudah menghilang dari istana. Secara diam-diam bersama Cut Ben dan beberapa pengawal, ia pulang ke Anta Ladeh. Peureudan Ali telah diberitahu tentang kepergian Raja Syarif. Para pengikutnya membuat siasat dengan menyebarluaskan berita bahwa Raja Syarif

sudah lari masuk ke hutan. Mendengar berita itu pasukan Anta Ladeh menjadi kucar kacir. Saat itulah Menteri Adan dengan pasukannya memukul musuh dengan mudah. Pasukan Raja Syarif mengundurkan diri meninggalkan medan perang. Palistina aman kembali.

Sesampai di istananya Raja Syarif amat murka mendengar putrinya hilang. Isterinya Safian menyalahkannya karena keserakahannya hendak merebut isteri orang. Rakyat diperintahkan untuk mencari putri. Barang siapa yang berhasil menemukannya akan dihadiahkan sebagian negeri. Hampir seluruh rakyat pergi mencari putri. Menteri Cut Ben sendiri mengirim surat kepada Peureudan Ali menceritakan apa yang terjadi di Anta Ladeh, dan saatnya sudah tiba untuk menundukkan Raja Syarif.

Peureudan Ali minta bantuan Ahmad Kasari dan Menteri Sakdi di Jarussalam dan Menteri Adan di Pusong Rawa. Pada waktu yang sudah ditetapkan berangkatlah pasukan besar itu ke Anta Ladeh. Sampai di perbatasan mereka berhenti dan mendirikan sebuah benteng dengan nama Kuta Mara.

Raja Syarif mengetahui kedatangan pasukan Peureudan Ali. Ia mengirim seorang utusan. Hasil pembicaraan ialah Raja Syarif harus menyerah. Mendengar kabar itu pikiran Raja Syarif makin kalut. Ia minta pendapat Menteri Cut Ben. Menteri menganjurkan supaya baginda mengundang Peureudan Ali ke istana untuk berunding. Jika Peureudan Ali sanggup mencari dan mengembalikan Putri Hindi Licen, Raja Syarif harus tunduk kepadanya. Pendapat itu disetujuinya.

Peureudan Ali mengatakan bahwa putri masih hidup dan sedang dijaga oleh jin yang menculiknya. Beberapa hari kemudian Putri Hindi Licen dibawa kembali ke istana oleh Menteri Sakdi. Alangkah senangnya Raja Syarif dan permaisuri Safiah dapat berkumpul kembali dengan putri mereka. Raja dan permaisuri yang tadinya belum beragama itu, segera memeluk agama Islam. Putri Hindi Licen kemudian dinikahkan dengan Peureudan Ali.

Tiada berapa lama kemudian Peureudan Ali pulang ke Palistina. Ketika Putri Arian hamil ia ingin makan daging rusa. Peureudan Ali mengerahkan sejumlah pawang untuk mencari rusa.

Tetapi tiada seekor rusa pun didapatinya. Karena itu ia sendiri pergi mencarinya. Putri Juhur Seutia yang mengetahui adik iparnya hamil, sudah berada di Palistina dengan membawa berbagai makanan sebagaimana lazimnya seorang kakak kepada adiknya.

Tersebutlah dua belas orang raja yang tunduk dibawah kerajaan Anta Ladeh. Mereka tidak senang dengan tindakan Raja Syarif yang menyerah kepada Peureudan Ali. Raja Lila dan Raja Lizam telah bersiap-siap hendak menyerang Anta Ladeh. Rencana itu diketahui oleh Raja Adil Parisi yang segera pulalah memberitahukannya kepada teman-teman Peureudan Ali.

Pasukan Palistina bersama-sama dengan pasukan dari Pusong Rawa dan Jarussalam bersiap-siap hendak berangkat ke Anta Ladeh. Negeri itu sendiri sudah mulai kacau. Pasukan dari dua belas orang raja mulai menyerang. Raja Syarif terdesak. Putri Hindi Lisen disingkirkan ke hutan oleh Menteri Cut Ben. Rakyat banyak yang menjadi korban. Raja Syarif sendiri harus berhadapan dengan Raja Lizam yang dibantu oleh Raja Lila. Akhirnya ia tewas. Dalam keadaan demikian balabantuan datang dari Palistina, Jarussalam dan Pusong Rawa. Raja Lizam dan kawan-kawannya sekarang berhadapan dengan pasukan yang dipimpin oleh Menteri Adan. Peperangan berkobar lagi.

Peureudan Ali belum mendapat rusa yang dicarinya, malahan ia tersesat dalam hutan rimba. Tetapi berkat cincin saktinya dan dengan bantuan seekor burung ia mendapat seekor rusa yang segera diterbangkan ke Palistina. Di sana ia mendapat berita tentang kemelut yang terjadi di Anta Ladeh. Belum sempat bertemu dengan isterinya ia sudah berangkat lagi ke Anta Ladeh. Di sana ia tidak menemukan putri Hindi Lisen, tetapi ia yakin bahwa putri telah diselamatkan. Perang makin berkecamuk. Pasukan Raja Lizam makin mendesak pasukan Anta Ladeh. Peureudan Ali menyusun suatu siasat. Kepada beberapa orang pasukan anta Ladeh yang menyamar di pibak musuh, diberikan sejumlah besar mata uang ringgit. Ketika perang sedang berlangsung dengan seru, uang ringgit disebarluaskan di tengah-tengah medan perang. Pasukan Raja Lizam berebut mata uang ringgit yang berjatuhan. Di saat itulah pasukan Peureudan Ali membinasakan

musuhnya dengan mudah sehingga Raja Lizam mengundurkan diri, tetapi dalam suatu adu senjata ia tewas ditangan Menteri Sakdi. Demikian pula Raja Lila akhirnya tewas dalam pertarungan dengan Menteri Adan. Kesepuluh orang raja lainnya menyerah. Dengan demikian berakhirlah peperangan yang memakan banyak korban itu. Peureudan Ali mengadakan kenduri sebagai tanda syukur kepada Tuhan karena telah berhasil mengalahkan musuhnya dan sekaligus sebagai selamat tujuh hari meninggalnya Raja Syarif.

Sesudah Menteri Sakdi diangkat sebagai raja Anta Ladeh, Peureudan Ali bersama dengan seluruh pasukannya pulang ke Palistina. Pada saat ia tiba putri Arian melahirkan seorang putra. Raja Adil Parisi menamakan cucunya Beureuman Sakyān.

Adapun Menteri Cut Ben dengan seorang kawannya yang meninggalkan istana Anta Ladeh untuk menyelamatkan Putri Hindi Licen, karena pergi terlalu jauh tersesat dan akhirnya jatuh di sebuah negeri bernama Cintra Biru. Rajanya bernama Tok Ja Raden dan terkenal sangat ketat dalam mengawasi negerinya. Seorang panglima bernama Hazab Uboe menangkap ketiga orang dari Anta Ladeh itu dengan tuduhan orang laki-laki membawa seorang perempuan yang bukan isterinya.

Hanya beberapa hari Peureudan Ali tinggal di Palistina. Ia teringat kepada putri Hindi Licen yang belum ketahuan rimbanya. Kepada putri Arian ia mengatakan bahwa ia ingin pergi melihat-lihat negeri orang untuk beberapa waktu lamanya. Dengan mengendarai seekor burung raksasa ia terbang ke sana ke mari sambil melihat-lihat kalau-kalau nampak Putri Hindi Licen. Akhirnya ia sampai di negeri Cintra Biru. Ketika hendak ditangkap oleh Panglima Hazab Uboe ia mengadakan perlawanannya sehingga dalam usaha membela diri ia terpaksa membunuh Panglima Hazab Uboe dan beberapa anak buahnya. Raja Tok Ja Raden segera diberi tahu tentang peristiwa itu. Baginda tidak bermaksud hendak membala karenanya baginda yakin bahwa yang membunuh Panglima Hazab Uboe lebih sakti.

Raja Tok Ja Raden mempunyai tiga orang putri, kecuali yang bungsu bernama Nilam Cahya, kedua orang kakaknya masing

masing bernama Cutti Hawa dan Cutti Baren sudah bersuami. Dalam usaha mencari jodoh buat putri bungsunya, Raja Tok Ja Raden mengundang sejumlah rakyat untuk hadir di istana. Di antara yang datang termasuk Peureudan Ali. Ketika baginda minta kepada putrinya untuk menunjuk siapa di antara yang hadir berkenan di hati untuk menjadi calon suaminya, pilihan jatuh kepada Peureudan Ali.

Upacara pernikahan diadakan dan Cut Nilam Cahya menjadi isteri ketiga Peureudan Ali. Sementara itu Menteri Cut Ben dan kawannya serta Hindi Licens dibawa ke pengadilan. Sesudah ternyata tidak bersalah, mereka dibebaskan. Peureudan Ali yang mendengar ada orang sedang diadili pergi melihat. Terjadilah pertemuan yang mengharukan. Raja Tok Ja Raden yang sudah mengetahui kejadian yang sebenarnya, minta maaf kepada Peureudan Ali atas tindakannya yang keliru.

Setelah beberapa lama berada di Cintra Biru, Peureudan Ali disertai oleh kedua isterinya dan Menteri Cut Ben pulang ke Palistina. Di sana mereka disambut dengan gembira oleh putri Arian. Satu bulan kemudian ia berangkat lagi ke Anta Ladéh untuk memberi bimbingan kepada rakyat di sana. Dua bulan berikutnya ia kembali lagi ke Palistina. Karena Menteri Cut Ben sudah berjasa kepada Peureudan Ali maka pimpinan negeri Palistina diserahkan kepadanya. Kemudian bersama ketiga orang istrinya Peureudan Ali pulang ke Jarussalam. Di sana ia menetap bersama ibunya Lelan Syikri. Negeri Palistina diperintahnya sendiri. Setahun sekali ia pergi ke negeri yang diperintah oleh menteri-menterinya. Sebanyak dua puluh orang raja tunduk di bawah kekuasaannya.

-----oooOooo-----

Hikayat  
PEUREUDAN ALI  
2

## **HIKAYAT PEUREUDAN ALI**

**Jiled keu dua**

**BISMILLAHIRRAHMANIRRAHIM**

Nyoe lon peugah raja pindoe  
Ayah putroe Cut Ali ba  
Jinoe lon kheun Raja Syareh  
Ate peudeh si ceulaka

Le that rakyat raja paleh  
Jijak keu deh tuntut bila  
Jiarong gle uroe malam  
Lam beurawang jibloh lanja

Padum lawet jisrang-abrang  
Troh datang nanggroe Palistina  
Troh dalam blang ujung nanggroe  
Jipiyoh droe si ceulaka

Peudong kimah dalam uroe  
Bansinaroe dum lasyeuka  
Maseng-maseng beuratoran  
Bantayan bak piyoh raja

Maseng raja maseng kawan  
Pasokan meujeumba-jemba  
Raja-raja sama teungoh  
Rakyat damoh ban seulingka

Panglima prang ugoh-ugoh  
Duek di teungoh poh-poh cakra  
Dum sipai jauh-jauh  
Le that syeekah si ceulaka

Jatarek ngon alam mirah  
That barollah lam blang raya  
Cukop ase bandum sudah  
Suroh titah poteu raja

Jiyue peugot surat pantah  
Haba ringkah sigra-sigra  
'Oh lheueh surat teuma lipat  
Jiyue intat bak peutua

Utosan beudoh me surat  
Peuteupat laju bak kuta  
Utosan teungoh me surat  
Teuduek siat si ceulaka

Aman bakdu nyoe nyang gura  
Teuduek haba ureueng kaphe  
Jinoe lon kheun poteu raja  
Tuan banta pheuet meuuke

Cit ka ase sikalian  
Meuriam sajan ngon beude  
Ube wasiet Cut Peureudan  
Neuubah tan bube pade

Dalam kuta ka meusapat  
Dumna rakyat sapeue ate  
Panglima prang kuat-kuat  
Cukop leungkap bandum sare

Meuntroe Adanpi ka keunan  
Nyang rakan han peue peugah le  
Ka meusapat dum sibarang  
Uleebalang dum sigala be

Tujoh lapeh kuta nanggroe  
Bandum asoe ka lheueh ase  
Dum sipai ka geupasoe  
Jeuep-jeuep sagoe ato beude

**Nyang peurintah Meuntroe Adan**  
**Atoran bak bungong pade**  
**Jaga kuta uroe malam**  
**Sinapang bak jaroé sabe**

**Hingga teuma haba nyang rab**  
**Lon rapat nak rijang ase**  
**Utosan bunoe me surat**  
**Deungon siat keu nan troh le**

**Troh bak pinto Kuta Mara**  
**Marit sigra aneuk sihe**  
**Tuan-tuan kawai kuta**  
**Dum sigala tadeungo he**

**Tapeutamong lon lam kuta**  
**Bak raja jinoe beutroh le**  
**Utosan meunan haba**  
**Asoe kuta jiseuot le**

**Han jeuet tamong lam kuta nyoe**  
**Masa jinoe barangsoe le**  
**Dalam kuta cukop asoe**  
**Han peue adoe tatamah le**

**Meunyo meunan wahe sahbat**  
**Nyoe surat tajak peuhade**  
**Si keumawai sambot surat**  
**Bak deelat jijak peutroh le**

**Ban sare troh bak sulton**  
**Sambot rijang surat kaphe**  
**Raja jok bak Meuntroe Adan**  
**Cuba pandang peue na ase**  
**Meuntroe Adan sambot surat**  
**Neuploh lipat neukalon le**  
**Meunoe haba dalam surat**  
**Haba singkat narit singke**

Raja Syareh nyoe ka teuka  
Bak gata Raja nyang Ade  
Kamoe hajat tuntut bila  
Hai raja bek kuyut ate

Peue buet taduek lom di dalam  
U padang teubiet meupake  
Meunyo gata aneuk agam  
Cit di blang sinoe tamate

Meunan jiboh dalam surat  
Meuntroe lihat awai akhe  
Yoh nyan meuntroe balah surat  
Lheueh neulipat neuyue jok le

Geujok surat bak utosan  
Jiwoe rijang aneuk sihe  
'Oh troh jiwoe bak bantayan  
Keu sulton surat jijok le

Raja Syareh buka surat  
Jilihat han jan jipike  
Geuboh haba dalam surat  
Hana hajat bak meupake

Baranggasoe kuat meuprang  
Nyankeu urang tan seumike  
Hana akai bube gupang  
That girang hajat keu mate

Nyankeu ureueng nyang that sisat  
Ate laknat bangsa sihe  
Nyankeu ureueng nyang paleh that  
Tan jingat rakyat mate

Peu meusaket bak tapeugah  
Nyang bilah ureueng mat beude  
Teugo gata raja meugah  
Dumna syeekah yue meupake

Peue masaket tabicara  
Nyang fana rakyat dum sare  
Teugo gata bangsa raja  
Ban nyang suka turot ate

Mate rakyat tan tasayang  
That ceukang di gata ate  
Adat asee biek binatang  
Na cit sayang rakan mate

Bit nyo gata that ceulaka  
Akai hana bube pade  
Di kamoe han lagee gata  
Goh lom buta mata ate

Nyang got gata Raja Syareh  
Jak woe keu deh bek taduek le  
Bek peuturot napsu paleh  
Peng abeh gata teukeuse

Tuntut bila top meunalee  
Pakri tathee puleh ate  
Talo meunang goh lom teuntee  
Kadang cit mee talo sabe

Meukeusud han troh gata malee  
Meutamah lhee saket ate  
Meuka jeuheut han le lagee  
Nyankeu dilee beatapike

Bitpi meunan Raja Syareh  
Nyang abeh ingat lam ate  
Adat tatem jak woe keudeh  
Han tapateh pasoe beude  
  
Haba surat meunan macam  
Beungeh han ban raja kaphe  
Ka jikheun bak panglima prang  
Beudoh rijang bek kaduek le

Yoh nyan beudoh dumna sitree  
Meuree-ree taloe bineh gle  
Cok keutupong boh bak ulee  
Jipangkee tumbak ngon beude

Jipeurab laju bak kuta  
Sireuta ngon jihei sare  
Surak deumpek hana tara  
Trok bak kuta ka teupike

Pinto kuta bandum teutop  
Meunyo talop jikoh lihe  
Parek kuta luah ngon lhok  
Meunyo tagrop han ek sampe

Yoh nyan rakyat jipakat bloh  
Bandum sunggoh sapeue ate  
Seuot rakan meunyo tabloh  
Buya pajoh bandum sare

Jimeupaka† laen bagoe  
Rot sagee jijak tamong le  
Ban sare troh dalam sagee  
Ureueng nanggroe sit ka ase

Ban jikalon musoh ka rab  
Jirapat ngon aneuk beude  
Padum ploh droe sigo ratap  
Ka seungap hana beudoh le

Jipeubeude hana reunggang  
Han jan jipandang jih ka mate  
Ladom mate keunong pacang  
Meutimpan sinan meugule

Nyang na tinggai ka jisurot  
U likot jijak meupike  
Pakri lagee ho rot talop  
Lam kurok teubai that beude

Gadoh akai dumna rakyat  
Bak deelat jijak peugah le  
Ampon tuanku sang han meuhad  
Kuta kong that dum sagoe be

Pageuepi kong parekpi lhok  
Tagrop han trok gadoh pike  
Rot sagoe hajat lon masok  
Lam kurok jiduek dum sare

Hakim gureepi di sinan  
Jitanyong ban pakri pike  
Seuot hakim ampon laman  
Bak lakuan payah ase

Cit ka lon kheun masa dilee  
Meunalee bek taseutot le  
Peureudan Ali sit ka tathee  
Gadoh lagee barangsoe le

Akaijih le ceureudek that  
Jitupat barang meuseuke  
Utoh jifam jeuep-jeuep teumpat  
Ngon siat jipeubuet ase

Kadang-kadang nibak buet nyoe  
Geutanyoe dudo teukeuse  
Lon takot jitipee dudo  
Nyang jinoe teungoh jipike

Raja Syareh yoh nyan seuot  
Tuto karot bek takheun le  
Tajak peugah laot-laot  
Nyang han patot bak gop pike

Ho ka gata uleebalang  
Beudoh rijang pasoe beude  
Ho ka gata panglima prang  
Jak guncang kuta beureule

Yoh nyan beudoh dum meuriti  
Sipai han le jipike  
Ka jibeudoh biek majusi  
Jinari sandang ngon beude

Yoh masa nyan rakyat dumna  
Ateueh kuta jipeubeude  
Ka jipagap ban seulingka  
Rakyat that bha ureueng kaphe

Jipeubeude na dum tupheuen  
Meureuleueng pageue sang reule  
Beuthat beude lagee ujeuen  
Nyang ureueng sidroe tan mate

Sabab kuta got that kukoh  
That leusoh teunambak sare  
Di ateueh pageue dum geuboh  
Di baroh tanoh sagai be

Ureueng musoh pagap kuta  
Jilingka bandumjih sare  
Jimeung tamong hana daya  
Lingka-lingka meunan sabe

Nibak sagoe nyang na lapang  
Suda pacang han peue kheun le  
Ngon jjaga uroe malam  
Sinapang jitimbak sabe

Nyang beude sabé meuasoe  
Bak sagoe siat han tom cre  
Jijaga meugantoe-gantoe  
Ureueng nanggroe meunan sabe  
Ureueng musoh yoh nyan sosah  
Haram jadah tunu ate  
Uroe malam mita ilah  
Teuduek kisah aneuk sihe

Teuduek siat ureueng meuprang  
Teutap sinan teungoh pike  
Jinoe keu deh lon peuriwang  
Teumpat makam nanggroe kaphe

Masa bunoe Peureudan Ali  
Cut Hindi neubaplueng u gle  
Singoh beungoh pagi hari  
Jaga umi bungong pade

Nyankeu bunda putroe indah  
Cut Safiah inong kaphe  
Jieu pinto bandum teuhah  
Safiah yoh nyan teupike

Teuma jiek u meuligoe  
Bak aneuk droe cut boh ate  
Deuk jikalon ateueng peutoe  
Teuhah keudroe asoe han le

Dalam ate meusoe-gumoe  
Pakon meunoe meunan pike  
Safiah jak lop keuleumbu  
Nyanpi jieu aneuk han le

Lam ate meutamah tunu  
Jihei laju dendayang le  
Dendayang troh keu nan pantah  
Ho leupah aneuk boh ate

Dum dendayang teuhah babah  
Safiah reuloh that ate  
Asoe meuligoe tajo pra-pru  
Abeh karu keu nan hade  
Cut Safiah moe meu'u-'u  
Peuebu laku tangke ate  
Wahe aneuk Hindi Lisen  
Pajan tatren bungong pade

**Deungon alat dum tapeutren**  
**Bintang canden saleh han le**  
**Alatpi tan aneukpi tan**  
**Hai badan got that meusampe**

**Cut Safiah jimoe kiam**  
**Laju pangsan lagee ka mae**  
**Lam meuligoe yoh nyan karu**  
**Plueng meudru-dru rakyat sare**

**Ladom tanyong peuebu laku**  
**Po cut meulu han meuho le**  
**Abeh teuka ureueng inong**  
**Jijak tanyong pakri pike**

**Jijak seutot Baroh Tunong**  
**Ladom lam mon jijak rawe**  
**Hingga teuma haba nyang rab**  
**Dumna rakyat sosah ate**

**Cut Safiah gadoh ingat**  
**Ka teupat sang-sang hana le**  
**Ladom ureueng tet keumunyan**  
**Jipot keu nan asap sare**

**Teutap putroe dalam pangsan**  
**Lon peugah ban ureueng pike**  
**Ureueng agam na sidroe-droe**  
**Abeh sampoe keu nan hade**

**Jimeupakat sabe keudroe**  
**Pakri bagoe nyang mesampe**  
**Tajak peugah bak sulton**  
**Tasrang-abrang rot dalam gle**

**Rakan bantapai di sinan**  
**Seuot rijang narit dampe**  
**Nyang got bak lom wahe sahbat**  
**Bak deelat tajak peugah le**

Meukon meunan hana cakap  
Beudoh leugat bek taduek le  
Si plah rujee jipeukuat  
Laen rakyat sunggoh ate

Hingga teuma haba nyang toe  
Na padum droe sapeue pike  
Keumah pakat bansinaroe  
Bungka jinoe rot dalam gle

Bungka sajan rakan banta  
Seutot raja sare-sare  
Geujak laju rot lam imba  
Teuduek haba mantong lam gle

Teuduek siat ureueng seumeutot  
Mantong bak rot meute guble  
Nyoe lon peugah panyot culot  
Rupa that got bungong pade

Ie dalam krueng jeureungeh that  
Teuntee hajat tren jak manoe  
Amma bakdu balek ayat  
Meunan hajat napsu lon nyoe

Jinoe lon kheun Cut peureudan  
Bukon sayang po samlakoe  
Di dalam gle uroe malam  
Sajan-sajan si nyak putroe

Lam-lam uteuen neusrang-abrang  
Lañ beurawang lam-lam duroe  
Han neukira luka badan  
Neubeurjalan malam uroe

Padum-padum duroe bugeng  
Bintang canden teutop asoe  
Nyang that sayang Hindi Lisen  
That meuleng-leng geunap uroe

Pihak galak banta indah  
Hana gundah luka asoe  
Lagi keunong that neupeugah  
Utoh leupah banta siboe

Bukon sayang puteh leusoh  
Pijuet tuboh bandua droe  
Bu sianeuk tan geupajoh  
Allah hai beh sayang putroe

Padumna trep peukoh aroh  
Jinoe ka troh keu deh sampoe  
Jinoe ka troh Jarussalam  
Cut Peureudan tamong nanggroe

Sabab rot deh neubeurjalan  
Jak peugah ban dum sinaroe  
Ban sare troh Jarussalam  
Kheun lakuan bak aduen droe

Sireuta meuntroe pahlawan  
Neupeugah ban laba rugoe  
Banta peugah musoh teuka  
Dum peukara jiprang nanggroe

Neupeurunoe akai bicara  
Neuyue bungka di likot droe  
Banta peugah jalan teumipee  
Bungong keumee cit utoh droe

Meupeue uroe meuri watee  
Abeh teuntee dum sinaroe  
Abeh wasiet dum peuneusan  
Cut Peureudan bungka jinoe

Teubiet gampong laju u blang  
Sajan-sajan si nyak putroe  
Soe nyang kalon tahe hireuen  
Bandum jikheun lakoe binoe

Rupapi got hana peue kheun  
Hana kureueng rot deh rot noe  
Bukon sayang bungong pade  
Sit lam sabe neuboh nanggroe

'Oh abeh blang teungoh u gle  
Meute guble geunap uroe  
Lom neukek gle neutron paloh  
Laju neubloh lam-lam duroe

Han neuingat luka tuboh  
Kareueng pajoh luka asoe  
Po Cut Ali akai le that  
Neukarat neuwoe u nanggroe

Sabah ateneu yakin that  
Neuingat bek rusak nanggroe  
Nyang na bacut sangkot pawot  
Leumoh teuot si nyak putroe

• Han ek jijak cut bungong sret  
Kuweut atot ureueng jinoe  
Pihak galak bungong pade  
Han jibri cre suntok padoe

Nyankeu sabab yakin ate  
Adat mate pakri teugoe  
Nyankeu sabab hana pantah  
Gadoh ilah po samlakoe

Bitpi meunan neupaban bah  
Seuleuah hajat beusampoe  
Neumeulakee ubak Allah  
Banta indah neuleueng jaroe  
  
Banta lakee ubak Tuhan  
Nyang laen tan harap sidroe  
Meunan sabe baranggajan  
Bak Tuhan neulakee keudroe

Hingga teuma haba nyang rab  
Lon rapat nakrijang sampie  
Padum lawet neubeurangkat  
Sampie hajat troh u nanggroe

Sare troh nanggroe Palistina  
Piyoh sigra ujung nanggroe  
Saba musoh le lagoina  
Lingka kuta jiglet nanggroe

Yoh masa nyan Cut Peureudan  
Mita jalan laen bagoe  
Neubloe gapu saboh umpang  
Neubagian laju keudroe

Neume keudroe saboh bagian  
Sikhan umpang jok bak putroe  
Ija bajee balek macam  
Ngui peukayan ruya-rayoe

Tupong gapu boh bak muka  
Bandua ngon si nyak putroe  
Ngon peukayan ija tuha  
Kalangpi na nibak asoe

Lom banta boh geutah pisang  
Teubai kalang kulet asoe  
Meusambot that ngon peukayan  
Ngon beuban ateuh baho droe

Jitanyong le Hindi Lisen  
Keupeue dalem peugot meunoe  
Banta seuot akai canden  
Le that jen bak tempat nyoe  
  
Nyankeu sabab lon boh siat  
Jeuet keuubat hekeumat kamoe  
Nyoe hai po cut lon amanat  
Beuta ingat wasiet lon nyoe

Bak teumpat nyoe tabeurjalan  
Bek tapandang keu deh keu noe  
Wie ngon uneun bek tapandang  
Ateueh insan baranggasoe

Meunyo tangieng nap ngon likot  
Hai bungong sret binasa dudoe  
Adat jihei nyan jitawok  
Bah lon seuot ureueng lakoe

Gata po cut han jeuet meuse  
Bek meutaeu baranggasoe  
Sabab meunan cut banta kheun  
Bek jingieng ureueng gampong droe

Abeh wasiet dum sibafang  
Beudoh rijang bandua droe  
Saboh sapo seuon umpang  
Neujak curam deungon putroe

Ateueh musoh banta lalu  
Bandum jieu tahe keudroe  
Bak kuta peuteupat laju  
Umpang gapu bak baho droe

Neubeuet isem sira neujak  
Neulakee bak Tuhan sidtoe  
Awih saboh tungkat sikrak  
Sangat bijak po samlakoe

Bandum musoh tan padoli  
Cut Ali neujak ngon putroe  
Musoh jikheun ureueng faki  
Mita raseuki dalam nanggroe

Dlam kawan banta lalo  
Tan teusawo musoh sinaroe  
Neujak laju gungong kundo  
Troh bak pinto kuta nanggroe

Troh bak pinto meuhei gapu  
Jituri su po samlakoe  
Pinto kuta buka laju  
Banta lalu sajan putroe

Leupah banta jitop pinto  
Bandum tahe ureueng nanggroe  
Yoh masa nyan bungong kundo  
Yue pluek labo kalang asoe

Lheueh neumanoe gleh ngon kalang  
Sireuta ngon si nyak putroe  
Lheueh nibak nyan Cut Peureudan  
'Oh lheueh rakan meumat jaroe

Po Cut Ali ek u rumoh  
Buleuen peunoh bak judo droe  
Cut Ariyan sangat meh-moh  
Jibeudoh jak seumah lakoe

'Oh lheueh seumbah teungku abang  
Ariyan di sinan laloe  
Ka jibeudoh dum dendayang  
Bet le idang keu nan sampoe

Cukop jibet keu nan hade  
Panyot kande makeuen jinoe  
Cut Ariyan jicok bate  
Jipasoe le laju keudroe

Sare ase dum ka keu nan  
Cut Peureudan basah jaroe  
Makeuen laju bungong kundo  
Dara baro mat rampagoe  
  
'Oh lheueh makeuen lonto baro  
Bungong kundo sampoh jaroe  
Si nyak putroe tarek idang  
Peuseuk puan rab ngon lakoe

Pajoh ranup Cut Peureudan  
Banta pandang buju jaroe  
Nakeu ranup baro bicah  
Marit pantah po samlakoe

Wahe judo putroe indah  
Ngo lon peugah he sambinoe  
Aneuk raja putrod linteng  
Bintang canden ka lon peuwoe

Nyang geuboh nan Hindi Lisen  
Meunyoe tatem tueng keu adoe  
Tapeurunoe dum peukara  
Beutaaja malam uroe

Bak Allah meuteumeung fahla  
Meubahgia gata putroe  
Kareunajih ureueng kaphe  
Fahla ase haijudo droe

Banta peugah awai akhe  
Mangat ate si nyak putroe  
Yoh masa nyan Cut Ariyan  
Bak dendayang jikheun meunoe

Hindi Lisen ka troh datang  
Cutda badan jak tueng keu noe  
Dendayang beudoh le jitren  
Putroe linteng jitueng jinoe

Troh bak Putroe Hindi Lisen  
Bintang canden mat bak jaroe  
Beudoh po cut keu noe langkah  
Suroh titah tuan putroe

Teuma beudoh putroe indah  
Ek le pantah u meuligoe  
Troh u rumoh putroe seudang  
Dendayang peuturi putroe

Cut Hindi jak seumbah rijang  
Ariyanpi jijok jaroe  
Han tatukri kalang-kabot  
Sang leukek meulet ngon beuragoe

Cut Hindi nyang com bak teuot  
Ariyan sambot sampoh bak dhoe  
Cut Ariyan yoh nyan meusu  
Adek teungku piyoh keu noe

Putroe Hindi malee sipu  
Jiduek meupru le bak sagoe  
Po Cut Ali ate bimbang  
Neupandang dua boh putroe

Hingga geubet le ngon idang  
Makeuen sajan dua putroe  
Putroe Hindi jipajoh bu  
Sigeutu 'oh basah jaroe

Sabab ka trep han tom na bu  
Po cut meulu pruetpi ka doe  
'Oh lheueh makeuen pinah idang  
Cut meusubang mangat asoe

Hingga uroepi ka mala m  
Eh tidoran lam meuligoe  
Putroe Hindi geubri teumpat  
Kama meuhad nyang bak sagoe

Ngon dendayang dum meusapat  
Pirak lipat jieh keudroe  
Ariyan eh deungon judo  
Dara baro sajan lakoe  
  
Puleh payah linto baro  
Ateueh kaso kasab reumboe  
Po Cut Ali woe beurangkat  
Payahneu that jarak nanggroe

Putroe ceupet jeuep-jeuep urat  
Puleh siat po samlakoe  
Hingga teungeut atueh kaso  
Linto baro sajan putroe

Singoh beungoh makeuen saho  
Bungong kundo tren jak manoe  
'Oh lheueh manoe ngon meusalen  
Puteh licen ek meuligoe

Ariyan hei Hindi Lisen  
Bintang canden beudoh keu noe  
Putroe Hindi peurab rijang  
Ariyan yoh nyan peurunoe

Jipeurunoe beuet Quruan  
Sireuta ngon rukon manoe  
Jipeurunoe rukon Islam  
Rukon iman dum sinaroe

Jipeurunoe do'a seumbahyang  
Putroe seudang galak han soe  
Meunan sabé baranggajan  
Ariyan sunggoh peurunoe

Hingga teuma haba nyang rab  
Meugaseh that du putroe  
Uroe malam sinan teutap  
Pirak lipat teuduek 'oh noe

Haba banta teuduek siat  
Meusapat rakyat sinaroe  
Dalam kuta sinan teutap  
Musoh le that lingka nanggroe  
  
Meuntroe Sakdi lon peugah ban  
Ngon cut abang Kasari nyoe  
Masa bunoe po Cut Ali  
Abeh janji neukheun tanggoe

Leupah banta neupeureugi  
Meuntroe Sakdi peuase droe  
Neuyue bujang among gampong  
Jak seupot gong jeuep-jeuep sagoe

Jitren rakyat dum sigala don  
Meusinthong bak kuta nanggroe  
Deungon alat cukop ase  
Tumbak beude sajan zakroe

'Oh troh keu nan han le pike  
Geubeudoh le kalon uroe  
'Oh lheueh leupah Cut Peureudan  
Lheueng nibak nyan dua uroe

Geucok langkah watee reumbang  
Bungka yoh nyan seutot adoe  
Uroe malam tan geupiyoh  
Ate sunggoh bansinaroe

Rot malam uteuen laju geubloh  
Lam-lam paloh lam-lam duroe  
Hingga lon kheun haba nyang rab  
Lon rapat nak rijang sampie

Padumna trep geubeurangkat  
Sampoe hajat u nanggroe nyoe  
Deungon musoh meuteumeung le  
Nyang beude ka lheueh geupasoe

Ban meuteumeung hana pike  
Lheueh le beude kiam nanggroe  
Meuntroe Sakdi nyang keupala  
Sireuta aduen samlakoe

Dumna musoh salah sangka  
Pane teuka angkatan nyoe  
Sabe keudroe jimeututo  
Teusawo lagee saboh roe

Sigeutu meunyum teukeujot  
Jisurot hana meusidroe  
Sinankeu phon prang meukalot  
Bagoe ribot kiam bunyoe

Meusu beude na dum tupheuen  
Sang-sang ujeuen karam nanggroe  
Rot deh rot noe hana peue kheun  
Bandum ureueng ate seungkoe

Ureueng musuh han peue daleh  
Sit ka jipreh padum uroe  
Udep mate han le jiweh  
Beuthat jadeh umum sampie

Jimeuprang laju jikarat  
Le that rakyat raja pindoe  
Nyang jeuoh keu nan jipeurab  
Jirapat mueoh sinroe

Meusu beude subhanallah  
Kon beurakah kiam bunyoe  
Ureueng mate han ek peugah  
Ile darah ban ie sungoe

Nyoe lon peugah Cut Peureudan  
Neiduek dalam kuta nanggroe  
Neungo beude geumpa alam  
Cut abang neuthee ka sampie

Yoh masa nyan po Cut Ali  
Hukom neubri bak rakan droe  
Beudoh rakan bek le lanti  
Ka troh janji bak uroe nyoe

Teuma lon kehun haba nyang rab  
Bandum rakyat jikit droe  
Dumna beude pasoe ubat  
Beudoh leugat teubiet jinoe

Geupeh ngon gong sajan geundrang  
Peurasan meubagoe-bagoe  
Surak deumpek sare kiam  
Sang meuguncang kuta nanggroe

Troh u lua hana pike  
Jipeubeude geunta bumoe  
Jilet musoh jihei sare  
Sang-sang reule karam nanggroë

Meusu beude that neugrum-grum  
Tunyoe geulunyueng dum geutanyoe  
Mate rakyat han ek bileueng  
Meukeubeueng darah bak bumoe

Nyang that arat ureueng musoh  
Roh di teungoh aneuk bisoe  
Yoh nyankeu prang got meulimbang  
Sang meuguncang kuta nanggroe

Surak deumpek dum pahlawan  
Sang-sang karam ajai sampoe  
Meusu beude na dum tupheuen  
Miseue ujeuen reudok baroe

Sang meugram-gram sang meugrum-grum  
Dumna ureueng abeh tuloe  
Yoh masa nyan prang meukalot  
Sang-sang teulet kayee jatoe

Asap beude that klam-kabot  
Nanggroe seupot han deuh uroe  
Rot deh rot noe prang jipeusak  
Deumpek surak hana sunyoe  
  
Rot deh geuk rot noe geujak  
Ka meurumpak bansinaroe  
Ban meuteumeung dua pihak  
Jimeutop tak rot deh rot noe

Ladom leumbēng ladom kapak  
Ladom jitak putoh jaroe  
Ureueng musoh sama teungoh  
Rakyat damoh aneuk bisoe

Tunong Baroh han le meu'oh  
Ladom meupoh sabe keudroe  
Ladom mate keunong peudeueng  
Ladom ureueng keunong cakcoe

Mate rakyat hana peue kheun  
Seulinteueng bangke sinaroe  
Blah rot Barat Meuntroe Saķdi  
Ngon Kasari raja nanggroe

Jipoh musoh han soe tikri  
Jikap bibi ganceng gigoe  
Blah rot Timu Meuntroe Adan  
Sajan rakan ereueng nanggroe

Nyanpi saboh that analan  
Peudeueng panyang mat bak jaroe  
Jipeukek prang that meukalot  
Tan measurot keu deh keu noe

Jimeupoh-poh leuban-leubub  
Leuab-leuub keunong cakcoe  
Jimeugrop-grop dum pahlawan  
Jibet sajan tungkat beusoe

Jibeudhoh dhoi dum teureubang  
Hana le trang seupot nanggroe  
Yoh nyan musoh gadoh ingat  
Han jitupat le rakan droe

Ladom aduen jipoh leugat  
Ladom karat jipoh adoe  
Timu Barat han meuho le  
Gadoh pike aneuk bisoe

Nyang udep jimeuprang sabe  
Nyang mate sinan teupipoe  
Subhanallah prang meujuphak  
Rasa meuhayak kuta nanggroe

Bitpi dumnan prang jipeusak  
Goh lom seungkak keu deh keu noe  
Ureueng musoh sama teungoh  
Kameh-kamoh sabé keudroe

Sang-sang rasa akai gadoh  
Jimeupoh-poh aduen adoe  
Nyang geusuen atejih lucot  
That meupot-pot aneuk bisoe

Miseue kapai karam dudok  
Meujipreh trok ajai sampoe  
Nyang rot Islam that guranta  
Pihak dua rot deh rot noe

Surak deumpek hana reuda  
That meutaga kiam bunyoe  
Sajan beude tambo geundrang  
Sangat girang ureueng rot noe

Bitpi dumnan geukarat prang  
Meusurot tan kaphe pindoe  
Sabab musoh le that rakyat  
Na dum lalat lam donya nyoe

Baranggadum prang geukarat  
Han cit lukat aneuk bisoe  
Awai suboh geupuphon prang  
Hingga peutang seupot uroe  
  
Sikhan uroe meutunang prang  
Mantong timang rot deh rot noe  
Po Cut Ali dalam kuta  
Sajan raja ayah putroe

Goh lom teubiet po jroh rupa  
Neungieng saja ureueng naggroe  
Neukalon prang mantong timang  
Muda seudang cit neuiem droe

Blah rot Baroh Meuntroe Adan  
Blah Seulatan Sakdi meuntroe  
Di dalam prang that meugeucoh  
Puteh leusoh neuleueng jaroe

Ureueng meuprang teungoh tangkoh  
Bah lon piyoh siat jinoe  
Reudok di gle ujeuen datang  
Bak taeu sang ban boh jambee

Teiduek haba ureueng meuprang  
Sinan di blang that meuṣeubee  
Jinoe keu deh lon peuriwang  
Deungo tuan haba dilee

Amma bakdu nyoe nyang gura  
Ngo beurata wahe sampee  
Nyoe lon peugah namiet raja  
Sireuta ngon si plah rujee

'Oh lheueh gadoh Hindi muda  
Pangsan bunda dalam juree  
Jimeupakat peukoh rimba  
Bak raja hajat jibri thee

Padumna trep peukoh aroh  
Jinoe ka troh ubak sukee  
Meuteumeung le raja biyoh  
Bak kawoh jiseumbah dilee

Lheueh jisumbah peugah haba  
Hari raja ampon meuribee  
Po Cut Hindi bayek rupa  
Bijeh mata bungong keumee

Saleh pane teuka sihe  
Han meuho le dalam juree  
Ban jideungo aneuk han le  
Raja kaphe reuet-reuet ulee

Jicok rakan na padum droe  
Jiplueng jiwoe raja asee  
Gaduh akai raja pindoe  
Bak sinaroe tan jibri thee

Hana jithee laen rakyat  
That meukarat prang meuseubee  
Poteu raja jiwoe leugat  
Jikarat jiplueng jikajee

Raja Syareh plueng meu'u- 'u  
Abeh karu lutong himbee  
Binatang gle abeh karu  
Ka'a-ka'u di cong kayee

Badeukek gajah bandum jiplueng  
Leu'am-leu'um rebah kayee  
Padum singa padum rimueng  
Abeh jiplueng ka jikajee

Raja Syareh plueng meutaga  
Meugareueh pha hana jithee  
Sabab ate beungeh raya  
Ngop bicara raja asee

Teutap raja leupah jiwoe  
Lon kheun jinoe si plah rujee  
Jilop laju dalam kuta  
Ubak banta jikheun teuntee

Raja Syareh ka jigisa  
Dum lasyeuka hana jithee  
Po Cut Ali deungo meunan  
Neuyue yoh nyan laen lagee

Neuyue peugah dum bak rakan  
Laen macam jalan tipee  
Banta peugah awai akhe  
Jiteubiet le si plah rujee

U dalam prang jimasok le  
Dumna kaphe hana jithee  
Meuteumeung le deungon rakan  
Teungoh meuprang sajan sitree

Jiyue bri thee dum bak teelan  
Maseng kawan maseng sukee  
Ube rakan nyang sireutoh  
Abeh putoh narit teuntee

Hana jithee dumna musoh  
Kawan sireutoh yoh nyan tipee  
Rakan sireutoh yoh nyan peugah  
Bak kafilah kawom sitree

Maseng syeekah maseng peugah  
Meunoe ulah jikheun teuntee  
Hai rakan e rakan teungku  
Pakri laku tohbu lagee

Poteu raja han le lon eu  
Sang ban laku han got lagee  
Nibak kimah raja han le  
Saleh mate umu padee

Saleh cit ka neuplueng u gle  
Pakri pike nyang meuteuntee  
Peue geutanyoe laju meuprang  
Sulotan jak mita dilee  
  
Baraggadum takarat prang  
Meutan uram han soe malee  
Musoh deungo dum peuneugah  
Yoh nyan pantah jipeuteuntee

Sinoe peugah sideh peugah  
Ka meuruah laen lagee  
Ladom peugah poteu raja  
Plueng lam rimba sabab malee

Sabab han ek talo kuta  
Meunanpi na narti teuntee  
Yoh nyan musoh ate lucot  
Ka meusurot seun siribee

Bak watee nyan Cut Peureudan  
Teubiet u blang bungong keumee  
Banta kheun bak Meuntroe Adan  
Peukek prang beugot meulagee

Peh le geundrang prang jiarak  
Jipeusak jiek meuree-ree  
Jihei sare deumppek surak  
Sang meuhayak gunong geurutee

Kalet kacang ladom jikheun  
Ladon ureueng kapreh dilee  
Meunan-meunan jimeukheun-kheun  
Ladom peudeueng jitak kayee

Meuntroe Sakdi saboh sagoe  
Jikheun meunoé narit teuntee  
Bek kakeubahijih meusidroe  
Kaboh taloe aneuk asee

Sajan surak jihei sare  
Jipeubeude seun siribee  
Yoh masa nyan ureueng kaphe  
Kuyut ate dumna sitree

Rakan sireutoh tipeuphon plueng  
Laen ureuengpi jikajee  
Yoh nyan musoh abeh jiplueng  
Aneuk bajeueng keunong tipee

Ureueng nanggroe jilet laju  
Pleung meudeuru dumna sitree  
Banta kalon meunan laku  
Ka neumeusu bungong keumee

Bek le talet wahe rakan  
Jiriwang sosah neuteumee  
Meunan neukheun Cut Peureudan  
Teuma riwang dumna sukee

Rakyat jijak bak bantayan  
Cok rampasan meudilee-dilee  
Ate rakyat galak han ban  
Rampasan areuta sitree

Le that tinggai bantai kaso  
Laenpi le ija bajee  
Mangat ate dum ureueng le  
Musoh talo pleung meuree-ree

Adat meukon ngon bicara  
Talo kuta jeuet keuabee  
Sabab musoh le lagoina  
Le tha tantra raja asee

Pihak lisek Cut Peureudan  
Akai ajam utoh tipee  
Tagipi na tulong Tuhan  
Keubajikan bungong keumee

Dum neupeubuet kareuna Allah  
Ban ekheulah tan meusilee  
Hukom ade banta indah  
Meusyeuhu gah troh u Reubee

Han tom neudhot ureueng gampong  
Han tom langsong buet meuseubee  
Nyankeu sabab seunang untong  
Tuhan tulong talo sitree

Neupeubuet ban suroh Allah  
Han tom salah saboh watee  
Keabajikan that neupapah  
Seudeukah han tom lheueng watee

Tiep-tiep ureueng that ekheulah  
Tulong Allah sit ka teuntee  
Meutamah pangkat deungon meugah  
Beutapapah wahe sampee

Jinoe lon kheun haba nyang rab  
Lon peurigap narit teuntee  
Talo musoh diplueng leugat  
Ate mangat bungong keummee

Ka seungap gong seungap geundrang  
Pang ka meunang talo sitree  
Yoh masa nyan Cut Peureudan  
Dum bak rakan ka neubri thee

Ureueng mate yue peusapat  
Sidek sasat maseng sukee  
Rakyat gampong yue peusapat  
Saboh jeurat geuyue seubee

Ureueng patot na sidroe- droe  
Neuyue peuwoe dum bak sampee  
Nyang beulanja neubri le droe  
Neupeujroe ija meukayee

Po Cut Ali tangan murah  
Banta indah that meulagee  
Hana neusyen dum seudeukah  
Hana payah dum geulakee

Ban nyang patot atueuh pangkat  
Ban nyang babat dum meuteuntee  
Sajan mayet neuyue intat  
Woe u teumpat maseng sukee

Mangat ate dumna rakyat  
Pirak lipat neupeulagee  
Lheueh nibak nyan bungong pade  
Abeh ase nyang peureulee

Banta yue cok bangke kaphe  
Bak bineh gle neuyue seubee  
Teuma beudoh dumna rakyat  
Jak peusapat bangke meuribee

Jihue u gle keu deh leugat  
Jitop meuhad ngon on kayee  
Jitiiek sinan dum sinaroe  
Rakyat jiwoe lom u juree

Teutap sinan padum uroe  
Po samlakoe neupeujamee  
Neusie ngon keubeue meureutoh ploh  
Dum jipajoh wareh sampee

Lam meuligoe kacah-kacoh  
Sang seunujoh teungoh watee  
Hingga lon kheun haba nyang toe  
Ureueng nanggroe jimeulakee

Lakee idin bak samlakoe  
Beudoh jiwoe maseng sukee  
Ladom jiwoe Pusong Rawa  
Meuntroe raja awai dilee

Maseng-maseng woe u tangga  
Dum sigala wareh sampee  
Ahmad Kasari bak watee nyan  
Cut Ariyan neujak lakee

Teuma geubri Cut Ariyan  
Ban nyang reusam ureueng dilee  
Buet teumeutuek hana lon kheun  
Bacut kureueng siploh ribee

'Oh lheueh putroe seumbah aduen  
Po cut meugleueng ek u juree  
Lheueh nibak nyan Raja Ahmad  
'Oh lheueh leungkap nyang meunalee

Deungon bisaan jaroe geumat  
Beuseulamat dum geulakee  
Po Cut Ali beudoh mameung  
Bak aduen idin neulakee

Sireuta ngon laen ureueng  
Hana peue kheun bungong keumee  
'Oh leheuh idin dum sibarang  
Teubiet rijang kuta batee

Raja Ahmad ngon pahlawan  
Sajan rakan dumna sukee  
Geuwoe laju Jarussalam  
Cut Peureudan teutap di juree

Abeh rakyat dum peureugi  
Woe keumbali maseng sukee  
Tinggai sinan po Cut Ali  
Ngon esteuri dalam juree

Dalam pike uroe malam  
Akai ajam bungong keumee  
Meunan sabe baranggajan  
Teuduek 'oh nan siat dilee

Nyoe lon tambah laen bacut  
Nyang meukeusud wahe sampee  
Lon amanat wahe nyak cut  
Beutapeubuet bek meusilee

Baranggasoe peukong nanggroe  
Hikayat nyoe tueng teurajee  
Tueng ibarat lam surat nyoe  
Sabab sinoe keunong lagee

Tatueng ate dumna rakan  
Gaseh tuan wareh sampee  
Meunyo cit got tapeutimang  
Barangsoe han jibri malee

Jitem mate bahle fana  
Keugata jigaseh teuntee  
Cit jingat balah guna  
Meunyo gata keunong lagee

Asai beuna ube janji  
Bek meuungki akhe watee  
Ban atoran po Cut Ali  
Hukom meukri adat teuntee

Dan lagi bak hukom Allah  
Kata syiah dumna guree  
Got tapeubuet got meunalah  
Hana ubah janji dilee

Miseue kisah Cut Peureudan  
Wajeb tuan tueng teurajee  
Adat rakyat mate lam prang  
Neubri gafan dum meukayee

Padum ureueng neuyue bungka  
Jok beulanja meuploh ribee  
Hana neusyen dum areuta  
Neukira adat bek malee

Nyankeu hai po beutaingat  
Hai sahbat wareh ngon sampee  
Beutapateh lon amanat  
Soe ingat pangkat meuteumee

Jeuetkeu dumnan wasiet lon nyoe  
Teuduek 'oh noe siat dilee  
Amma bakdu teungku badan  
Teuduek 'oh nan saboh leua

Teiduek haba Cut Peureudan  
Lon peuriwang si ceulaka  
Nyoe lon peugah raja biyoh  
Jiplueng seunggoh that meutaga

Uroe malam tan jipiyo  
Jinoe ka troh teumpat tangga  
Troph u rumoh raja bajeueng  
Abeh ureueng peumeureuka

Asoe meuligoe abeh jiplueng  
Jilet king-keueng ngon geulawa  
Sira jimoe jiceumarot  
Tango ribot meuseurapa

Bu kapajoh beungoh seupot  
Hana patot nyoe kurasa  
Sia-sia dum kubri bu  
Tan sigeutu na meuguna

Aneukku saboh han ek kaeu  
Pinto lepu tan kajaga  
Hindi Lisen ho ka leupah  
Pat kakeubah ho ka kaba

Pakon kaboh aneuk lidah  
Keupeue cit kah agam dara  
Keupeue cit kah dum neuploh-ploh  
Meuh seuneupoh han meuho ka

Beungoh seupot bu kapajoh  
Rimueng tanggoh bansineuna  
Nyan sa di kee kupeusayang  
Kapeutimang cut ngon raya

Kubloe ija sawak pinggang  
Dum sibarang ngon beulanja  
Raja Syareh that meupot-pot  
Jiceumarot lagee raya

Cut Safiah ka teukeujot  
Jingo ribot poteu raja  
Lom teuingat aneuk putroe  
Ateh wah-woe sang ka gila

Bak pihak that ate seungkoe  
Kheun keu lakoe po ceulaka  
Rimueng pangkong peue kapeugah  
Hai gajah plah buya hila

Gadoh aneuk putroe indah  
Cit sabab kah turot hawa  
Cit sabab kah turot napsu  
Hai teungku po rimueng seuba

Bak meunapsu bungong pade  
Rakyat mate dum ka fana  
Cit sabab kah turot ate  
Aneuk han le ho saleh ka

Bak meunapsu Cut Ariyan  
Peubeudoh prang harap teuga  
Han meusoe-soe peubeudoh prang  
Meubiek musang malee hana

Hakim guree ka lheueh jitham  
Kapateh han hai ceulaka  
Ka jibeudoh Cut Safiah  
Tajo pantah atueuh raja

Deungon lakoe jimeureupah  
Abeh jiplah baje ija  
Kakeu sinan jimeupake  
Sang reule rumoh istana

Nyoe lon peugah rakyat sare  
Plueng dalam gle talo ngaza  
Bak masa nyan ka troh jiwoe  
U meuligoe dum jihala

Jieu ureueng tan meusidroe  
Di meuligoe sangat subra  
Jingo kiroh raja deelat  
Safiah that meuseurapa

Dum peutua jimeupakat  
Jiek leugat u istana  
Troph u rumoh jieu pake  
Ija hhn le poteu raja

Sabe keudroe jimarit le  
Peue kapike han kapeubla  
Ladom jikheun kamat putroe  
Kaploh jaroe poteu raja

Teuma lon kheun haba nyang toe  
Peurab jinoe ijik peubla  
Jicok raja peutren rijang  
Putroe bimbang sangat rugha

Cut Safiah tinggai sinan  
Hana reunggang meuseurapa  
Lakoe binoe reuloh ate  
Sabab han le bijeh mata

Poteu raja ija han le  
Abeh sare jeuet keu ruja  
Troph u bale raja deelat  
Duek meusapat dum peutua

Raja dua blahpi meusapat  
Yoh nyan deelat jimeusabda  
Hai kawom adoe ngon aduen  
Cut meugleueng gadoh lam hingga

Adat tatem lem meutuah  
Taseuleuah siat le gata  
Soe nyang teumueng putroe indah  
Nanggroe siblah bagi dua

**lon bri keu jih sikhan nanggroe**  
**Baranggasoe cut non raya**  
**Soe nyang teumeung si nyak putroe**  
**Siblah nanggroe jih nyang raja**

Hana ubah lagee lor. xheun  
Cut buleuen beudoh jak mita  
Raja Syareh meunan jikheun  
Meurijeuen sajan ie mata

Dum peutua yoh nyan seuot  
Jibeuet jaroe bandua  
Meugoh mate nyawong lupot  
Bungong sret kamoe jak mita

**Meuntroe Cut Ban yoh masa nyan**  
**Sapat sinan ngadap raja**  
**Abeh maklum dum lakuan**  
**Undang-undang dalam dada**

Nyoe lon peugah narit nyang toe  
Jilakee droe rakyat dumna  
Raja dua' blahpi ka jiwoe  
Bansinaroe maseng tangga

Rakan seutiapi woe sajan  
Maseng teelan maseng tantra  
Timu Barat sikalian  
Abeh pulang rakyat dumna

Troh u gampong padum uroe  
Puleh asoe bak meusafa  
Uleebalang dum sinaroe  
Imum nanggroe meukeunira

Sireuta ngon bandum rakyat  
Beudoh leugat jak meumita  
Tunong Baroh Timu Barat  
Jak mita pat aneuk raja

Jeuep-jeuep gampong jeuep-jeuep nanggroe  
Mita Putroe Hindi muda  
Tanyong keu deh tanyong keu noe  
Lam-lam sungoe lam-lam paya

Ladom u gle jibeurangkat  
Nyang le rakyat dalam bangka  
Jeuep-jeuep pante sidek sasat  
Bandum rakyat sunggoh raya

Pihak napsu peugang nanggroe  
Malam uroe meuraba-raba  
Tan jikira luka asoe  
Lam-lam duroe jibloh lanja

Saleh pakri dumna rakyat  
Bak jikarat jeuet keu raja  
Nyankeu hai po beutaingat  
Ladom sisat dalam rimba

Meunan-meunan jeuep-jeuep nanggroe  
Teidueuk 'oh noe siat haba  
Amma bakdu keu deh meuwoe  
Ubak meuntroe dalam kutà

Jinoe lon kheun Meuntroe Cut Ben  
Keu peue laen tan jikira  
Abeh jingieng lahe baten  
Meuntroe canden jol rahsia

Abeh meufom bansinaroe  
Peugot jinoe surat haba  
Meuntroe kirem keu samlakoe  
Bak rakan droe geuyue bawa

Geuboh haba lam surat nyan  
Keulakuan si ceulaka  
Raja Syareh sosah han ban  
Sibagoe nyan laenpi na

Ureueng han le dalam nanggroe  
Seutot putroe peukoh rimba  
Hana teuntee rijang jiwoe  
Nyang lam nanggroe tan padumna

Haba surat le that bagoe  
Han ek kamoe bak neurika  
Lon boh bacut asai sinoe  
Laen dudoe lahe nyata

Surat nibak Meuntroe Cut Ben  
Jikirem saleuem rahsia  
Hingga teuma rakan laen  
Maseng-maseng surat haba

Maseng-maseng surat keudroe  
Jeuep-jeuep nanggroe na syeedara  
Dalam surat narit tanggoe  
Le that bagoe peue-peue nyang na

Sidroe rakan saboh surat  
Dum jiintat keu cut banta  
Jinoe lon kheun haba nyan rab  
Jipeusapat surat haba

Ka meusapat sireutoh boh  
Rakan beudoh laju bungka  
Bandum surat meufom saboh  
Janji teugoh that seutia

Dua ureueng peuwoe surat  
Jijak leugat peukoh rimba  
Sikhan buleuen jibeurangkat  
Sampoe hajat troh lam kuta

Tamong laju kuta nanggroe  
Bandua droe ubak banta  
'Oh troh keu nan bak samlakoe  
Jipeujaroe surat geuba

Po Cut Ali sambot surat  
Neuploh lipat ka neubaca  
Awai akhe banta lihat  
Abeh meupat jeuep-jeuep punca

Abeh surat banta bandeng  
Dalam dihen putoh kira  
Yoh masa nyan bintang canden  
Peugot laen balah haba

Peugot surat banta indah  
Haba ringkah bacut saja  
Haba surat insya Allah  
Lon meulangkah prang lon puga

Han peue panyang lon hareutoe  
Maklum bak droe dumna gata  
Jinoe lon kheun narit nyang toe  
Rakan bunoe nyang seutia

Rakan bunoe peuwoe surat  
Banta leugat neuyue gisa  
Sireuta ngon neujok surat  
Kheun amanat laenpi na

Rakan beudoh pantah rijang  
Lom jiriwang peukoh rimba  
Jijak laju jisrang-abrang  
Bukon sayang payah raya

Uroe malam jijak sabe  
Meute geuble jimeusafa  
Padumna trep jiarong gle  
Hingga troh le nanggroe raya

Anta Ladeh ka troh sampoe  
Jijok jinoe surat haba  
Maseng-maseng ke deh keu noe  
Jeuep-jeuep nanggroe bak syeedara

'Oh troh surat dum bak rakan  
Maklum tuan dum rahsia  
Lahe baten ka jituban  
Hañ peue panyang lon calitra

Yoh nyan rakan pike syawe  
Jipreh ase troh kutika  
Teutap rakan dalam pike  
Bungong pade lon peugisa

Jinoe lon kheun banta indah  
'Oh leupah surat neuyue ba  
Neuheu bujang pantah-pantah  
Jak keumeurah laju sigra

Bujang beudoh jak lam gampong  
Jipeh ngon gong meuseuranta  
Jikrah rakyat dum sigala don  
Troh u duson jipeuhaba

Leupah bujang jak lam nanggroe  
Laeu sineo banta kira  
Neuyue seutot raja meuntroe  
Teumpat nanggroe Pusong Rawa

Neuyue seutot Jarussalam  
Pahlawan deungon syeedara  
Banta yue me ngon alat prang  
Angkatan cukop beurata

Abeh narit po samlakoe  
Beudoh jinoe saboh peutua  
Geujak seutot jeuep-jeuep nanggroe  
Padum uroe lama masa

Ladom saho geubeurangkat  
Deungon siat troh geuhala  
'Oh troh keu deh peugah leugat  
Ampon deelat suroh banta

Neuyue peugah keu noe beutroh  
Puteh leusoh prang neupuga  
Ban geudeungo banta suroh  
Bandum sunggoh ate suka

Geuhimpon le dumna rakyat  
Deungan alat sianika  
Siat ase dum meusapat  
Beudoh leugat laju bungka

Padum uroe geujak sabe  
Hingga troh le u Palistina  
'Oh troh keu nan dumgeu sare  
Geutet beude juru basa

Geutet beude jareueng-jareueng  
Geubri lageuem ka troh teuka  
Yoh nyan banta neuyue ampeueng  
Teubiet jak tueng peumulia

Geuteubiet le mat bak jaroe  
Geupeuwoe laju lam kuta  
'Oh meuhimpon dum sinaroe  
Po samlakoe meukeurija

Geubri ngon bu geupeujamee  
Ban nyang lagee adat raja  
Beubri teumpat nyang meuteuntee  
Bungong keumee peumulia

Dua uroe sinan piyoh  
Dum abeh troh balantra  
Puleh payah tho ngon reuoh  
Uroe siploh tueng kutika

Cukop ase silengkapan  
Sibarang alat seunjata  
Keunong uroe watee reumbang  
Geupeh geundrang beudoh bungka

Dumna rakyat han peue kheun le  
Cit ka ase dum peukara  
Sikin panyang tumbak beude  
Cit lam sabé ikat ija

Bak uroe nyan geucok langkah  
Banta indah raja raya  
Rakyat le that subhanallah  
Han ek peugah lhe boh raja

Bungka laju pirak lipat  
sajan rakyat peukoh rimba  
Padumna trep geucré teumpat  
Sampoe hajat nanggroe raja

Troh bak ujung nanggroe kaphe  
Bungong pade neumeusabda  
Hai rakan e bek le pike  
Bak ulee gle peugot kuta

Yoh nyan rakyat dum sibarang  
Peugot rijang Kuta Mara  
Ban nyang patot undang-undang  
Kuta landang kukoh raya

Timu Barat Tunong Baroh  
Pageue geuboh dum geusangga  
Nyang jeuet meunan banta suroh  
Puteh leusoh meunan kira

Talo mantong goh lom teuntee  
Le that sukee si ceulaka  
Meuhan ase bak neutipee  
Bak meusilee nyankeu kuta

Nyankeu sabab peugot meunan  
Cut Peureudan han troh kira  
Hana troh thee bandum insan  
Sikalian manusia

Nyang na tukri sidroe Tuhan  
Nyant buan rugoe ngon laba  
Lagi saleh Cut Peureudan  
Keu Tuhan harap simata

Bak Tuhan do'a neulakee  
Geunap watee han tom lupa  
Lheueh seumbahyang limong watee  
Neulakee do'a sijahtera

Akai lisek sangat utoh  
Meuh seuneupoh 'ajab raya  
Dumna rakyat peubuet sunggoh  
Bansiseun troh siat leungka

Neuyue peudong ngon bantayan  
Di lua nyan lam blang raya  
Lhee boh raja nyang sulotan  
Lhee bantayan raya-raya

Laen sukee uleebalang  
Pasokan maseng peutua  
Laen sukee panglima prang  
Angkatan han ek soe kira

Saboh raja lhee ploh kimah  
Alam mirah bandum raya  
Sikureueng ploh jeuet kafilah  
That barollah balatantra

Maseng peutua maseng kawan  
Atoran meubanna-banja  
Peiduek tumpok na sikhan blang  
Angkatan meuribee laksa

Got meuato dumna syeekah  
'Ajab leupah taeu rupa  
Geutarek ngon alam mirah  
Han ek peugah sangat that bha

Cukop ase sikalian  
Undang-undang kukoh raya  
Sinan teutap banta lam blang  
Teuduek 'oh nan siat haba

Han ek le lon peugah haba  
Jinoe cutda balek macam  
Amma bakdu nyoe nyang gura  
Ngo beurata dumteu tuan

Soe nyang deungo bek takhem-khem  
Lon goh ladem bak keumarang  
Mata teungeut lon eh kayem  
Lon han jitem tumbon badan

Amma bakdu bek poh cakra  
Nyoe calitra lon peuriwang  
Teuduek haba po cut banta  
Lon peugisa raja suang

Nyoe lon peugah Raja Syareh  
Aneuk paleh sangat bokbang  
Uroe malam hana jieh  
Sangat reugeh pijuet badan

Lawet badoh puteh leusoh  
Raja biyoh teungeutjih tan  
Bu sianeuk tan jipajoh  
Pruetjih seungkoh grak-gruk dalam

Jiduek jidong pike syawe  
Reuloh ate that han macam  
Suntok buleuen meunan sabé  
Lawet tan le putroe intan

Bak watee nyan laknat Allah  
Jideungo gah jumee datang  
Raja deungo le that syeekah  
Jihei pantah wahe bujang

Cuba teubiet jak pareksa  
Pane tantra nyan angkatan  
Pane geujak soe keupala  
Siri raja keu noe datang

Kungo jiduek bak ulee gle  
Bandum sare kayue riwang  
Kapeugah lon sosah ate  
Bek kaduek le beudoh rijang

Yoh nyan bujang beudoh meupru  
Teubiet laju keu deh u blang  
Bak ulee gle troh jilalu  
Leumah jieu le that urang

Yoh nyan bujang teuhan babah  
Meunyum gundah muka masam  
Dalam ate teuka marah  
Bujang dahsyah hireuen mandang

Sabab jieu le that tantra  
Deungan kuta ka meureuntang  
Deungan siat ase leungka  
'Ajab raya pane urang

Lompi jieu alam mirah  
That barollah sang peunoh blang  
Pane teuka dum kafilah  
Bujang sosah tahe mandang

Puleh nibak hireuen tahe  
Bujang lalo jak tanyong ban  
Tuan-tuan jamee teuka  
Pane gata ho beurjalan

Lon eu rakyat sangat that bha  
Soe keupala siri uram  
Po Cut Ali seuot keudroe  
Angkatan nyoe di lon tuan

Nama ulon na tatusoe  
Nyoekue kamoe Ali Peureudan  
Lon cre gampong lama bak rot  
Lon jak seutot cit bila prang

Raja Syareh lon jak seutot  
Beutjih han got bak atoran  
Hana patot jijak prang lon  
Han sep sithon lom jiriwang

Jinoe ho ka rimueng seuon  
Kumeung rancong deungon peudang  
Jinoe gata jak woe keu deh  
Raja Syareh tayue datang

Tayue teubiet bek le jieh  
Kumeung rampeh ujung peudang  
Jakleh peugah keu deh beutroh  
Bek katroh ladom habaran

Dua uroe kupreh tanggoh  
Meuhana troh nanggroe karam  
Meunyo napsu bek kueunsyok  
Yue taklok bak Cut Peureudan

Bak agama kayue masok  
Yoh goh harok nanggroe jeuet prang  
Yoh nyan bujang jiwoe laju  
Plueng meu'u-'u dalam padang

'Oh troh keu deh peukek ngadu  
Tuanku ampon jeunulang  
Hana lagee tuanku droe  
Ka troh sampoe Ali Peureudan

Jiba rakyat meuploh katoe  
Ujong nanggroe ka peunoh blang  
Alam mirah han ek hisab  
Le that rakyat hai sulotan

Nibak dali deungon adat  
Sang han meuhad ek talawan  
Dua uroe jih baro troh  
Ka lheueh jiboh kuta landang

Jikheun bak lon hai tuanku  
Jimeunapsu cit sulotan  
Jiyue teubiet keu deh laju  
Jimeung eumpu deungon peudang

Ban jideungo meunan tuto  
Sang meutoto leungo badan  
**Meunyum gundah raja kaphe**  
Ureueng han le pakrikeu ban

Le that ureueng leupah u gle  
Jeh 'oh akhe goh jiriwang  
Leupah seutot si nyak putroe  
Raja pindoe muka masam

Nyankeu sosah raja nanggroe  
Musoh ka toe pakrikeu ban  
Kuduek mate kudong mate  
Gotkeu bahle kumeulawan

Meudeh meunoe cit han ase  
Jimarit le wahe bujang  
Meunyo meunan nyan tapeugah  
Jak keumeurah jinoe rijang

Tayue jitren pantah-pantah  
Ngon peukakah dum alat prang  
Beutroh keu deh nanggroe bawah  
Raja dua blah tayue rijang

Yoh nyan bujang jiplueng sunggoh  
Siat troh ban saboh alam  
Abeh jijak jeuep-jeuep gampong  
Jiseupot gong jeuep-jeuep simpang

Jijak peugah troh u duson  
Deelat ampon suroh datang  
Peureudan Ali ka troh teuka  
Poteu raja jikeumeung cang

Ban jideungo meunan haba  
Beudoh sigra dumna urang  
Teuma lon kheun haba nyang rab  
Jitren rakyat sigala alam

Abeh bandum jipeusapat  
Han jeuet silap sidroe urang  
Nyoe lon peugah rakan banta  
Nyang seutia lam kawan nyan

Bak watee nyan dum sigala  
Jingui raya tum peukayan  
Peukayan dilee yoh saboh roe  
Jime keudroe dua pasang

Saboh pasang jingui keudroe  
Saboh bagoe bri keu rakan  
Jok keu rakan nyang meuturi  
Nyang teubuni gaseh sayang

Nyoekeu hamba Peureudan Ali  
Meunan teurjali cap peukayan  
Maseng kawan maseng sukee  
Meunan lage dum peukayan

Dumna musoh hana jithee  
Sangat teuntee nyan lakuan  
Rakan banta cit sireutoh  
Janji putoh seutiaan

Jeuet peukayan dua reutoh  
Banta suroh peulaheran  
Lagi surat jijak jiwoe  
Keu deh keu noe hana reunggang

Lahe baten laba rugoe  
Neuthee keudroe Cut Peureudan  
Jinoe lon kheun haba nyang rab  
Jitren rakyat sigala alam

Rakan bantapi beurangkat  
Sapat-sapat lam kawan nyan  
Dum meuron-ron teungoh jijak  
Got meubulak dum angkatan

Sajan beude leumbeng kapak  
Meusak-sak bak bale di blang  
Bak watee nyan Meuntroe Cut Ben  
Abeh baten dum bak rakan

Teungku meuntroe sangat canden  
Lagee laen jiboh padan  
Raja Syareh ateuh geuta  
Sidroe saja bak masa nyan

Meuntroe Cut Ben peurab lanja  
Peugah haba meunoe macam  
Ampon tuanku lon meuhaba  
Bak meukuta syahi alam

Na lon teumeung saboh rahsia  
Dalam tantra dum angkatan  
Bak alamat leumah lon eu  
Buet meutipu bak lakuan

Ulon peunyum bak ri laku  
Tuanku dudoe sukaran  
Raja Syareh seuot leugat  
Pakri meuhad takheun meunan

Teungku ampon bak alamat  
Lon kalon cap bak peukayan  
Lon kalon cap Peureudan Ali  
Siteungoh ri dalam kawan

Meunan tuanku dum teurjali  
Han that meuri bak tapandang  
Ladom jitop han that leumah  
Le that ulah keulakuan

Bak lon pike tuanku droe  
Roh meupaloe akhe datang  
Peureudan Ali akai ragoe  
Jitem siboe dumna urang

Kadang-kadang hai pangulee  
Cit ka dilee dum jitampang  
Ka jisiboe dumna sukee  
Meunan teuntee fam lon tuan

Adat meukon meunan bagoe  
Pane keu noe dum peukayan  
Nibak lahe rot geutanyoe  
Lam baten nyoe laen macam

Jidong rot noe pura-pura  
Hai meukuta bak laheran  
Dadang-dadang jibicara  
Akhe masa jeuet rusohan

Dalam baten jidong rot deh  
Beuneupateh fam lon tuan  
Ka lheueh jibloe dumna gaseh  
Sangat areh Cut Peureudan

Meunan tuanku bak alamat  
Lon ijtihad keulakuan  
Nibak dali deungon adat  
Akhe meuhad teulah tuan

Meunyo tuanku meunan bagoe  
Teuntee dudoe keu ugian  
Meukeusud han troh lom ngon rugoe  
Tuanku droe jeuet keu sirang

Kadang-kadang troh bak mate  
Gata akhe nyawong simpan  
Ka lon peugah awai akhe  
Cuba pike pakri reumbang

Nyoepi meunan hai pangulee  
Neungieng dilee neujak pandang  
Neungieng keudroe patot dilee  
Meuka teuntee taubahkan

Raja Syareh seoot pantah  
Muka mirah bacut masam  
Pakri laku toh rot ilah  
Mangat leumah deuh lon pandang

Seuot meuntroe jipeugah kri  
Ampon doli meunoe macam  
Neusie keubeue neukhanduri  
Taantri yue duek meureuntang

Teungoh rakyat tum pajoh bu  
Tuanku beudoh beurjalan  
Teungoh-teungoh geuteumayong  
Troph jitamong uleebalang

'Oh troh keu nan beuet jaroe  
Ampon kamoe syahi alam  
Dumna rakyat abeh keu noe  
Pajan jinoe peubeudoh prang

Meuntroe Cut Ben seuot dilee  
Piyoh dilee uleebalang  
Piyoh siat hai pangulee  
Di yup kayee bak geulumpang

Yoh nyan rakyat ka jipiyoh  
Laen dang troh di beulakang  
Nyoel lon peugah raja biyoh  
Ka jisuroh rijang-rijang

Kajak laju keu deh u gle  
Keubeue rante dalam kubang  
Namiet beudoh jak u pante  
Ka jidrop le keubeue agam

U lam kuta peuwoe pantah  
Jipeuseumbah bak sulotan  
Raja yue sie bagah-bagah  
Han janjisrah jiyue reundang

Jiyue masak sajan ngon bu  
Jipeulaku inong agam  
Kacah-kacoh nibak dapu  
Ka'ka'ka' sare kiam

Bahle lon kheun haba nyang rab  
Lon peurigap mangat rijang  
Masak sare dum ka leungkap  
Suroh deelat pasoe idang

Bandum rakyat ka jiantri  
Dum sipai duek meureuntang  
Peiduek idang got meuriti  
Majusi galak han macam

Teungoh rakyat pajoh umpeuen  
Raja timpeueng jak lam kawan  
Raja jijak jeuep-jeuep ruweueng  
Rata ureueng jijak pandang

Jijak kalon jeuep-jeuep sukee  
Jijak teuntee dum peukayan  
Leumah jieu cap bak bajee  
Raja layee muka masam

Ladom teucap bak kupiah  
Daweuet mirah sidalinggam  
Yoh nyan raja meunyum gundah  
Muka mirah jiek biram

Peukayan cit dua reutoh  
Raja biyoh salah waham  
Sang di mata ribee reutoh  
Pike han troh aneuk jalang

Bak pihak meunyum teumakot  
Mata seupot gaduh meungilang  
Dalam ate sang meupot-pot  
Mukapi krot 'oh tapandang

Lheueh jikalon keu noe keu deh  
Raja paleh ka jiriwang  
Troh bak bale Raja Syareh  
Meuntroe areh jak tanyong ban

Peue na leumah tuanku droe  
Ka lheueh keudroe neujak pandang  
Ka jiseuot raja pindoe  
Sabet meuntroe ban takheun nyan

Jinoe meuntroe pakri laku  
Takheun laju pakri reumbang  
Ateku nyoe sangat karu  
Leubeh tunu laju datang

Nyankeu lon kheun hai pangulee  
Laen lagee bak lakuan  
Peureudan Ali cit ka tathee  
Cit ka dilee meusyeuhuran

Narit jeuheut han tom jikheun  
Dumna ureueng gaseh sayang  
Peng ngon ringget hana jitheun  
Citjisurung soe nyang alang

Nyoepi meunan tuanku droe  
Ka lheueh jibloe gaseh sayang  
Pura-pura jidong rot noe  
Meunan bagoe bak lon pandang

Nyang got jinoe bek neuiem le  
Teukeuse lon takot datang  
Meunyo neuiem sabe-sabe  
Gata akhe grop lam kubang

Leumah pike raja pindoe  
Jikheun meunoe pantah rijang  
Meunyo meunan wahe meuntroe  
Bah taujoe keu deh u blang

Tayue meuprang kaman dilee  
Taeu lagee pakri macam  
Keudeh taeu mangat teuntee  
Dumna sukee cit mangat trang

Meunyo rakyat kureueng ate  
Jeuet tapike laen macam  
Meukon meunan han meusampe  
Taeu ate dumna urang

Lagi musohpi ka keunoe  
Malee kamoe han meulawan  
Padum-padum aye b bunyoe  
Jitueng nanggroe meunan-meunan

Untong kadang saleh pakri  
Peureudan Ali jituntut prang  
Nyankeu lon kheun bahle taci  
Taeu uji dumna urang

Meuntroe Cut Ben seuot pantah  
Allah Allah ampon laman  
Buet nyang meunan leubeh sosah  
Leubeh payah akhe datang

Nyang meunan buet ureueng beubai  
Hana akai bube gupang  
Cit ka taeu racon tuba  
Peue taseuba kon makanan

Pane ureueng nyang han mate.  
Racon sabe jipeureulan  
Bek tuanku salah pike  
Bek neukheun le sibagoe nyan

Boh prang dilee tuanku beh  
Hana sunggoh dum lon pandang  
Apalagi nyoe ho ka troh  
Jiteumeung boh mata peudang

Dalam jitem pateh gata  
Teuntee saja ban takheun nyan  
Kadang keu noe jipeugisa  
Meuhad gata nyawong simpan

Nyang got bak lon tuanku droe  
Pateh kamoe hai sulton  
Barang hajat beuek sampoe  
Meubek rugoe meusigupang

Deelat ampon gadoh malee  
Saboh lagee bak lon tuan  
Rot deh rot noe hana soe thee  
Dumna sukee angkatan prang

Prang han jadeh manggroe seulamat  
Bandum rakyat hana hiram  
Akan teutapi ampon deelat  
Bacut pangkat jeuet keu kurang

Beuthat kureueng masa jinoe  
Akhe dudoe teuma manyang  
Raja Syareh tanyong meunoe  
Pakri bagoe pakatteu nyan

Deungo lon kheun teungku ampon  
Mula nyang phon hai junjongan  
Peureudan Ali yue tueng keu noe  
Bansinaroe ngng angkatan

Tayue peugah narit tanggoe  
Dum geutanoe taklok keu nan  
Meunan jikheun jarit meuceh  
Alam puteh jime sajan

Keu alamat raja meugaseh  
Tayue boh meuceh alam hitam  
'Oh troh keu noe Peureudan Ali  
Tatueng janji jeuet lon padan

Lon meulakee putroe Hindi  
Bah tauji meunan macam  
Tayue mita Hindi Lisen  
Soe nyang peutren pane urang

Sabab gob nyan akai canden  
Teuntee geutem ureueng ajam  
Kadang-kadang tuanku droe  
Laen nanggroe troh geutuban

Meunyo geuteumeung si nyak putroe  
Dum geutanyoe taklok keu nan  
Meunan tuanku tameuanji  
Hana meuri keutiwasan

Dumna ureueng tan keutahwi  
Hana dali talo meunang  
Meunyo meuteumeung cut boh ate  
Gata han le rusak dalam

Han meuteumeungpi meusampe  
Sabab han le nanggroe jeuet prang  
Teungku ampon gadoh malee  
Dumna sukee han soe tuban

Meukon meunan hai pangulee  
Hana lagee laen macam  
Bek le tuanku panyang pike  
Uroe akhe laju malam

Lagee laen han ek ase  
Barangkri le gadoh ajam  
Ban jideungo meunan haba  
Rumeh muka gadoh hiram

Jiseuot le pantah sigra  
'Ajab raya naritteu nyan  
Meunyo meunan wahe meuntroe  
Ulonteu nyoe han troh tuban

Hukom gata dum sinaroe  
Rela kamoe sikalian  
Yoh masa nyan Meutroe Cut Ben  
Ureueng laen jihei rijang

Troh le keu nan Imum Maken  
Gata dalem teubiet u blang  
Peureudan Ali jak tueng keu noe  
Tapeuwoe laju u dalam

Sajan rakyat dum sinaroe  
Beudoh jinoe pantah rijang  
Meutroe peugah awai akhe  
Jibeudoh le Imum Makam

Raja Syareh mangat ate  
Sikrak han le teubiet kalam  
Yoh nyaŋ beudoh Imum Maken  
Rakan laen seutot sajan

Jilhat sakin ulee gadeng  
Sang meutunggeng kupiah syam  
Ubak rakyat jipeurintah  
Alam mirah jiyue buang

'Oh lheueh sinan dum jipeugah  
Teubiet pantah laju u blang  
U bineh gle jipeuteupat  
Deungon siat troh le datang

Yoh masa nyan pirak lipat  
Ate mangat neueu alam  
Po Cut Ali mangat ate  
Sabab han le alam hitam

Ka teuingat bungong pade  
Sang meusampe tulong Tuhan  
Imum Makenpi troh sampoe  
Beuet jaroe ampon laman

Nyang troh langkah ulon keu noe  
Suroh bunoe syahi alam  
Raja Syareh suroh titah  
Neuyue peugah bak junjongan

Teungku ampon sajan syeekah  
Neuyeuh langkah kuta dalam  
Yoh masa nyan Peureudan Ali  
Hukom neubri keudoh rakan

Ka jibeudoh dum sipai  
Neuyue antri maseng kawan  
Tinggai sinan ladom rakyat  
Keumiet teumpat kuta landang

Yoh nyan beudoh pirak lipat  
Neubeurangkat peh ngon geundrang  
Yup seurumpet peh keudangdi  
Han soe tukri dum bunyian

Sira geujak peh rapai  
Suleng bansi han soe tuban  
Lasyeu ka jak got meurungkho  
Hana tuto seungap kalam

Nyang na meusu cit meutambo  
Laenpi le dum bunyian  
Neujak laju po samlakoe  
Got meurundoe di dalam bidang

Meuntroe Cut Ben masa bunoe  
Rakyat nanggroe jusorohan  
Ureueng nanggroe hukom jibri  
Dum jiantri dong meureuntang

Deng meubanja dum sipai  
Apalagi uleebalang  
Meuntroe suroh peumulia  
Ctu Banta Ali Peureudan

Bantapi troh keu nan sigra  
Tamong lanja kuta dalam  
Treh u dalam Peureudan Ali  
Teumpat geubri nyang keueumasan

Cit ka ase dum keurusi  
Meuntroe ahli peurintah nyan  
Raja raja duek meusapat  
Nibak teumpat bale keumang

Duek di baroh dumna rakyat  
Ban nyang adat meujeulisan  
'Oh lheueh piyoh bandum sare  
Geubeuet le ngom minoman

Sajan geubet ranup bate  
Geumakeuen le sikalian  
Meuntroe Cut Ben sangat utoh  
Lagi haloh lom ngon ajam

Teungoh-teungoh ranup geupajoh  
Meuntroe utoh buka kalam  
Raja Syareh duek bak sagoe  
Seungap keudroe tahe mandang

Meuntroe Cut Ben beuet jaroe  
Bak samlakoe Ali Peureudan  
Ampon tuanku meuribee deelat  
Sujud khedeumat keu bawah kidam

Keu bawah kidam raja beurdeelat  
Narit beureukat hajat meukalam  
Barang meukeusud sigeutu saja  
Ubak snoepada peuseumbah laman

Sipeurti ban nanggroe raya  
Bak kamoe hana le lintang  
Raja Syreh han le bantah  
Ban peurintah syahi lama

Meuah ampon barang salah  
Nyang ka leupah di beulakang  
Bitpi goh lom nanggroe talo  
Tuanku e ka lheueh karam

Bitpi mantong poteu raja  
Nyang rasa nyawong ka simpan  
Jinoe hukom po meukuta  
Taniet hamba ka tiwasan

Nyawong tuboh darah gapah  
Cit milek sah meukuta alam  
Meunyo meunan nyan tapeugah  
Ucap kalimah jinoe rijang

Bek le seumbah nyan beurala  
Seumbah Esa sidroe Tuhan  
Lheueh tariwang bak **agama**  
Lon peucaya naritteu nyan

Lom jiseuot teungku meuntroe  
Tanggoh kamoe bak sulutan  
Buet nyang meunan uroe dudoe  
Sabab jinoe lam sosahan

Sabab raja rusak ate  
Aneuk han le sudah hilang  
Lawet gaduh bungong pade  
Raja sabe akai waham

Teuma jinoe tuanku droe  
Lakee kamoe bak sulotan  
Gaseh sayang tuanku droe  
Bri keu kamoe putroe intan

Putroe gadoh sudah lama  
Usaha siat sikarang  
Kareuna tuanku panyang mata  
Leumah nyata 'oh neupandang

'Oh troh keu noe Putroe Hindi  
Teugoh janji ngon sulotan  
Patong beurala dum lon ungki  
Seumbah Rabbi sidroe Tuhan

Nyankeu baro nyang meusampe  
Meuka hade cut meusubang  
Bandum kamoe galak ate  
Han ubah le baranggajan

Abeh janji meuntroe peugah  
Banta indah neukheun nyoeban  
Meunyo meunan nyan tapeugah  
Jinoe lon ubah dum atoran

Cuba tanyong Raja Syareh  
Geutem pateh ulon tuan  
Seuot meuntroe that geupateh  
Han soe langgeh baranggajan

Yoh masa nyan panyot culot  
Neuyue peugot saboh rangkang  
Neuhei tokang neuyue peugot  
Deungon siat lheueh le rijang

Yoh nyan banta ka neupeurab  
Neutet leugat ngon keumunyan  
Sajan gahru neutet sapat  
Neupot asap u yup rangkang

Pura-pura kalon surat  
Meunan adat peutakian  
Mangat jitem raja nanggroe  
Riwang keu noe tamong Islam

Nyankeu sabab meunan bagoe  
Po samlakoe akai ajam  
Putroe gadoh banta lihat  
Neukalon pat ka jibuang

'Oh lheueh banta kalon surat  
Pirak lipat marit nyoeban  
Putroe gadoh bek tagundah  
Insya Allah mudah-mudahan

Deungon tulong Poteu Allah  
Putroe indah lon peuriwang  
Akan teutapi poteu raja  
Bek meudawa jinoe rijang

Meunyo napsu keu aneukda  
Ucap sigra syahdat rijang  
Meunyo hana si nyak putroe  
U nanggroe han le lon riwang

Meunyo ubah ban lon kheun nyoe  
Kon kamoe Ali Peureudan  
Ban jideungo Raja Syareh  
Ate puleh rindu dendam

Peue nyang geuyue ka jipateh  
Agamajih ka jibuang  
Geupeurunoe ucap syahdat  
Seubot leugat nama Tuhan

Yoh masa nyan raja deelat  
Kakeu teutap dalam Islam  
Lom neusuroh banta indah  
Neuyue ubah dum atoran

Lam meuligoe bri peurintah  
Banta yue srah cawan pingan  
Jinoe lon kheun narit nyang toe  
Hingga uroepi ka malam

Teutap sinan po samlakoe  
Dums sinaroe ngon angkatan  
Ngon makananpi ka ase  
Rakyat sare peurjamuan

'Oh lheueh makeuen pheuet meuuke  
Neumarit le ngon sultan  
Ho ka gata Raja Syareh  
Beudoh keu deh jak tidoran

Gata jinoe sideh taeh  
Bak teumpat jeh rumoh rangkang  
Tameudike sinan keudroe  
Malam uroe pujoe Tuhan

Sunggoh ate malam uroe  
Mangat jiwoe putroe intan  
Meunyo napsu Hindi Licens  
Bek tatreng-tren rumoh rangkang

Meunan neukheun bintang canden  
Dan peue laen neupeugah ban  
Ie seumbahyang neuyue jak tueng  
Tren le u krueng rijang-rijang

'Oh lheueh manoe teungoh di krueng  
Raja timpeueng le u rangkang  
Bak malam nyan hana jieh  
Raja Syareh ate bimbang

Jiduek jidong jimeurateb  
Ate galeb teungeutjih tan  
Rumoh jambo ceu'at-ceu'iet  
Sang meuhapit rumoh rangkang

Teutap sinan raja nanggroe  
Po samlakoe lon peugah ban  
Bak malam nyan sajan meuntroe  
Di meuligoe eh tidoran

Singoh beungoh pagi hari  
Peureudan Ali marit nyoeban  
Di hadapan banta kheun kri  
Putroe Hindi dalam hutan

Banta peugah that meuteuntee  
Di yup kayee bineh kulam  
Sinan jitiek le jen asee  
Bungong keumee hana pangsan

Abeh narit po samlakoe  
Beudoh meuntroe jak peugah ban  
Ho ka gata asoe nanggroe  
Jak cok putroe cut meusubang

Ka lheueh neueu dalam surat  
Putroe meuhad bineh kulam  
Ka jibeudoh dumna rakyat  
Jijak leugat tamong hutan

Nyang ka leupah dilee puroe  
Sampoe jinoe goh jiriwang  
Lom ka jiyue uleh meuntroe  
Jipeugah toe lam rimba nyan

Bandum rakyat ate sunggoh  
Ka jijak bloh lam beurawang  
Nyoe lon peugah puteh leusoh  
Po banta beh sangat ajam

Abeh wasiet ubak meuntroe  
Banta neuwoe kuta landang  
'Oh troh keu deh batee ujoe  
Kheun hareutoe bak pahlawan

Ka neukheun bak Meuntroe Sakdi  
Cut Hindi tajak tueng rijang  
Banta peugah awai akhe  
Jibeudoh le sajan rakan

Padum uroe jijak lam gle  
Hingga troh le teumpat makam  
'Oh troh keu nan Meuntroe Sakdi  
Jipeugah kri bak Ariyan

Suroh banta Peureudan Ali  
Cut Hindi neuyue peuriwang  
Ariyan kheun han peue salah  
Cit keuneubah syahi alam

Yoh masa nyan putroe indah  
Jiseumbah gaki Ariyan  
Taidin lon jarak siat  
Kru seumangat adek badan

Han peue salah pirak lipat  
Beuseulamat nibak jalan  
'Oh lheueh putroe meuah deesya  
Jicok jiba pantah rijang

Padum lawet peukoh rimba  
Troph bak banta kuta landang  
Ban sare troh si nyak putroe  
Po samlakoe kheun lakuan

Lahe baten neuhareutoe  
Neupeurunoe putroe intan  
Abeh wasiet deungon janji  
Cut Ali ngon putroe seudang

Yoh masa nyan Putroe Hindi  
Yue keumbali keu deh rijang  
Jiwoe laju bungong uroe  
U meuligoe troh le datang

Sira jiek meuhei ma droe  
E ma putroe po ma badan  
Cut Safiah jideungo su  
Ate rindu sangat yoh nyan

Putroepi troh jiek laju  
Tajo meupru jicom badan  
Cut Safiah sret ie mata  
Laju jiwa boh ate nang

Allah hai aneuk sijuek mata  
Kusangka han le meuriwang  
Teutap sinan jimeumoe-moe  
Lam meuligoe aneuk ngon nang

Nyoe lon peugah raja nanggroe  
Jingo kawoe putroe intan  
Bak watee nyan Raja Syareh  
Jigrop sideh rumoh rangkang

Jiplueng laju u rumoh jeh  
Ate puleh mayoh deundam  
'Oh lheueh jicom bijeh mata  
Jipareksa meunoe macam

Peugah aneuk ngon sibeuna  
Soekeu nyang ba putroe intan  
Beuthat aneuk baranggasoe  
Kupeusampoe umu simpan

Putroe Hindi seuot meunoe  
Deungo lon nyoe hai du badan  
Mula nyang phon asailiah  
Masa leupah ayah bak prang

Di lon kueh dalam juree  
Nakeu watee teungoh malam  
Dalam teungeut hana lon thee  
Troh jen ase hantu hutan

Jicok kamoe laju jiba  
Hana daya lon meulawan  
Sabab jen nyan badan raya  
Jipo lanja jiteureubang

Troh lam rimba lon jikeubah  
Jenpi leupah jibeurjalan  
Teuma lon jak du meutuah  
Reubah limpah dalam hutan

Padumna trep meunan sabé  
Di dalam gle uteuen jeulatang  
Lawet lawan dudoe akhe  
Meuteumeung le sidroe insan

Ban meuteumeung lon tanyong soe  
Geupeugah droe Ali Peureudan  
Geucok ulon mat bak jaroe  
Geupeuwoe bak kuta padang

'Oh troh keu nan lon geupeuwoe  
Laju keu noe geuyue riwang  
Hingga ka troh keu noe sudah  
Ngon afuah muda seudang

Nyankeu ureueng nyang meutuah  
Geutem meupayah gaseh sayang  
Teuma jinoe wahe ayah  
Ngo lon peugah sikrak kalam

Nyang got bak lon du meutuah  
Banta indah neupeusayang  
Ulonteu nyoe adat neutem  
Neupeukawen deungan gop .nyan

Meukon ngon nyan neupeukawen  
Cit han lon tem laen urang  
Sabab gop nyan akai that jroh  
Tan meusaboh na teuladan

Peurangui got janji teugoh  
Lon han geuboh dalam hutan  
Adat meukon gop nyan peuwoe  
Teuntee lon nyoe mate simpan

Nyankeu narit lon nyang tanggoe  
Pike jinoe hai du badan  
Meunan narit bungong kundo  
Raja tahe hireuen mandang

Dalam ate that teusawo  
Neungo tuto putroe seudang  
Poteu raja hireuen laloe  
Ngon aneuk droe cut meusubang

Sinan teutap lam meuligoe  
Laen jinoe lon peuriwang  
Teiduek siat raja kaphe  
Bungong pade lon peugah ban

Jinoe lon kheun pheuet meuuke  
Bak ulee gle kuta landang  
Leupah putroe u istana  
Seutot banta di beulakang

Tamong laju dalam kuta  
Duek bak geuta nyang keueumasan  
Meuntroe Cut Ben han peue peugah  
Jipeurintah got han macam

Raja Syarehpi tren pantah  
Jak peuindah banta intan  
Yoh masa nyan pirak lipat  
Tanyong leugat meunoe macam

Wahe meuntroe takheun leugat  
Po cut ubat ka meuriwang  
Gata ngon lon ka lheueh janji  
Seumbah Rabbi Allah Tuhan

Teuma jinoe takheun pakri  
Ubah jànnji atawa han  
Seuot mentroe hana patot  
Meugoh lupot akai hilang

Han tom ubah ka u likot  
Han tom karot di beulakang  
Cit ka lon kheun bak meukuta  
'Oh meugisa putroe intan

Kamoe seumbah Tuhan Esa  
Patong beurala dum lon buang  
Meunan narit teungku meuntroe  
Po samlakoe seungap kalam

Nyoe lon peugah raja nanggroe  
Jiduek keudroe tahe mandang  
Sosah ate hana sakri  
Han jitukri balek batang

Sabab tuto Putroe Hindi  
Cut Ali lakee tunangan  
Hajat raja bek jadeh le  
Sang han ase pakrikeu ban

Han ek putoh raja pike  
Jimeuhei le meuntroe ajam  
Jipeurab le teungku meuntroe  
Raja nanggroe tanyong rijang

Pakri laku si nyak putroe  
Lakee lakoe Ali Peureudan  
Meukon ngon nyan lon peukawen  
Cit han jitem laen urang

Ka jiseuot Meuntroe Cut Ben  
Hindi Lisen that budiman  
Teungku ampon cit meupatot  
Tapeuturot ban jikheun nyan

Kareuna droejih ka rayek  
Barang mabok ka jituban  
Ka jituri tabeue masen  
Sit han jitem leupah masam

Patot ngon nyan tapeukawen  
Meunyang laen han sipadan  
Meunyo ngon nyan roh sikufu  
Po cut meulu sabe ajam

Meudeh meunoe jiboh ato  
Laenpi le peutakian  
Lon boh sinoe bacut saja  
Asai punca meubek hilang

Meunyo panyang lon peuhaba  
Le calitra malah tuan  
Jingo tuto teungku meuntroe  
Raja pindoe tahe mandang

Teuma seuot raja nanggroe  
Jikheun meunoe hom hai kaman  
Meunyo meunan hukom gata  
Buet keurija dum sibarang

Meuntroe beudoh hei peutua  
Dum beurala jiyue buang  
Deungon siat abeh sare  
Dum ka reule patong Tuhan

Sajan rakyat dum jipangge  
Jisuroh le meupeurasan  
Mangat laloe ate raja  
Meunan kira meuntroe ajam

Yoh nyan meuntroe peurab lanja  
Bak banta Ali Peureudan  
'Oh troh keu nan peugah haba  
Meukuta ampon jeunulang

Suroh nibak poteu raja  
Ubak gata peurseumbahan  
Akan proehai bungong pade  
Cut boh ate putroe seudang

Ka neupeuwoe di dalam gle  
Beumeusampe neupeusayang  
Patot jinoe tapeuhamba  
Cit areuta syahi alam

Meunan neukheun poteu raja  
Bijeh mata neuyue pulang  
Teuma seuot banta indah  
Han peue salah bak lon tuan

Akan teutapi nyoe lon peugah  
Bek le ubah etikeuet nyan  
Meunan neukheun po samlakoe  
Di meuntroe jibeudoh rijang

Jijak peugah dum sinaroe  
Tujoh uroe meupeurasan  
Teuma beudoh dum peutua  
Jicok muga peh le geundrang

Nyang ladom yup sangkaikala  
Suara banyak han macam  
Buet peurasan hana lon kheun  
Le that ureueng keubeuncian

Bitpi meunan hana kureueng  
Leu'am-leu'um tet meuriam  
Nyang kasyuk dhap ngon rapai  
Suleng bansi dum bunyian

Nyang that paleh ureueng bangki  
Kanan kiri jan jiriwang  
Keu noe siat keu deh siat  
Miseue kilat ujeuen datang

Jan jipandang nap ngon likot  
Kalang-kalot han soe tuban  
Watee malam duek lam seupot  
Dum jileugot pat nyang reunggang

Dalam kuta kacah-kacoh  
Sare riyoh dum bunyian  
Sie ngon keubeue dum meureutoh  
Rakyat sunggoh taguen reundang

Meunan sabe malam uroe  
Le that bagoe dum peurasan  
Jinoe keu deh ulon peuwoe  
Di meuligoe cut meusubang

Nyoe lon peugah po cut meugleueng  
Teuka ureueng jak cet andam  
Buet teumeutuek hana lon kheun  
Cit ka maklum tuan-tuan

'Oh lheueh putroe peukek jahet  
Ie kulet jibeudoh ngilang  
Ka geupeungui ngon peurmata  
Dum mutiara pудоe intan

'Oh lheueh meungui putroe muda  
Salah sangka ureueng pandang  
Sang-sang aneuk bangsa pari  
Han tatkri meujeureulang

Gaca hitam jaroe gaki  
Lom bak bibi jarahitam  
Ka geupeuduek atueh rakna  
Kipah Cina bak dendayang

Jipot-pot le aneuk dara  
Jiduek lingka putroe seudang  
Sinan teutap lam meuligoe  
Si nyak putroe nyang analan

Nyoe lon peugah ureueng nanggroe  
Geunap uroe lhiet meuriam  
'Oh sare troh tujoh uroe  
Ka geupeuwoe banta intan

Peuek laju u meuligoe  
Ngon rakan droe uleebalang  
Dan sigala wadi meuntroe  
Dum sinaroe ireng sajan

Buet meuampeueng tan lon peugah  
Ulon malah bak keumarang  
Troph u rumoh banta indah  
Geupeunikah rijang-rijang

Teungku malem neuboh seupah  
Kheun bismillah phon mulaan  
'Oh sare lheueh neufatihah  
Neupeunikah putroe intan

'Oh lheueh ijab kabui nikah  
Bet le pantah laju idang  
Teuma geucok linto baro  
Bek bak pinto wahe rakan

Srah ngon gaki bungong kundo  
Banta lalo duek bak tilam  
Putroe Hindi ulee teutop  
Teungoh jipot le dendayang

Teuma beudoh cutda Lambot  
Pinah limbot putroe intan  
Deungon banta jak peuteumeung  
Cut meugleueng jak seumbah abang

Ka geupeuduek le lam leumueng  
Cit tan kureueng saban-saban  
Rot noe meubee rot deh meubee  
Nyang le ratee cit dendayang

Dendayang khem sипу malee  
Saket ulee jikheun meuan  
Sinoe jikhem sideh jikhem  
Hindi Licens reuoh peusam

Laju beudoh cutda Baren  
Putroe linteng geucok rijang  
Lom bak sagoe keu deh geubot  
Dendayang pot reuoh hilang

Teuma meusu cutda Lambot  
Peue han kabet laju idang  
Bahle lon kheun haba nyang rab  
Geubet leugat idang keu nan

Sare ase cukop leungkap  
Pirak lipat basah tangan  
Buet seumuleueng han lon peugah  
Maklum sudah tuan-tuan

Bahle jinoe lon kheun pantah  
Watee sudah jula malam  
'Oh lheueh makeuen dum sinaroe  
Cutda Baloe pinah idang

Sira geukheun peue kaiem droe  
Sampoh jaroe kacok rijang  
Cutda Barenpi geumeusu  
Han tom kueu that bantahan

Ka geubeudoh cutda Meulu  
Geucok laju bandum idang  
Deungon siat ka seuleusoe  
Bansinaroe abeh simpan

Teuma lheueh nyan ureueng nanggroe  
Jilakee droe jiwoe rijang  
Tinggai sinan Putroe Hindi  
Ngon suami Cut Peureudan

Ate galak hana sakri  
Cut Hindi putroe analan  
Si nyak Putroe Hindi Licen  
Panyot jipeulen rijang-rijang

Ateueh kaso ka jigureng  
Bintang canden dua sajan  
Rot deh rot noe hana haba  
Bandua teungeut that pangsan

Singoh beungoh teubiet faja  
Teubleut mata beudoh rijang  
Ureueng dua laju beudoh  
Buleuen peunoh duek bak tilam

Dum dendayang sangat meh-moh  
Ban beungoh jak pasoe idang  
Sajan jibet keu nan laju  
Po cut meulu makeuen sajan

Si nyak putroe sangat rindu  
Sajan teungku Ali Peureudan  
Meunan sabe geunap uroe  
Bandua droe rindu dendam

Yoh masa nyan po samlakoe  
Dum rakan droe neuyue pulang  
Po Cut Ali bri peurintah  
Neupeugah bak Meuntroe Adan

Ban jideungo banta titah  
Dumna syeekah jiwoe rijang  
Abeh wasiet ngon amanat  
Jiwoe leugat ubak makam

Limong reutoh tinggai rakyat  
Pirak lipat sinan sajan  
Sabab banta tinggai rakyat  
Kureueng harap Cut Peureudan

Kareuna nyan nanggroe musoh  
Lagi jeuoh ranto hutan  
Meunan pike puteh leusoh  
Neutakot roh laen macam

Banta ingat keu buet dilee  
Raja malee yoh talo prang  
Baranggadum jitop ulee  
Nyang malee payah that hilang

Meunyo malee nibak ate  
Teuntee saba jitroh deundam  
Apalagi ureueng kaphe  
Walee bahle ka lheueh Islam

Beuthat banta ka meukawen  
Nyang baten han troh neutuban  
Neutakot roh lagee laen  
Bintang canden hana troh fam

Tinggai rakan nyankeu sabab  
Pirak lipat ka ingatan  
Hingga lon kheun haba nyang rab  
Sinan teutap muda seudang

Yoh nyakeu phon po samlakoe  
Dalam nanggroe bri atoran  
Neupeurintah jeuep-jeuep sagoe  
Neupeurunoe dumna urang

Peue nyang wajeb lam donya nyoe  
Miseue bagoe yue seumbahyang  
Rukon suci rukon manoe  
Hingga sampoe beuet Quruan

Neupeurunoe jeuep peukara  
Neubicara ngon amilan  
Ureueng nanggroe galak raya  
Le that teuka uroe malam

Lagi 'oh troh rakyat teuka  
That-mulia peurjamuan  
Bacut-bacut neüpeurasa  
Yue puasa ngon seumbahyang

Dan sigala rukon laen  
Peue nyang ladem keuwajiban  
Po Cut Ali sangat canden  
Sira khem-khem neumeukalam

Apalagi Meuntor Cut Ben  
Peulop areng jeuep-jeuep urang  
Nyankeu sabab rijang ase  
Galak ate sikalian

Dumna ureueng gaseh teuka  
Keu Cut banta Ali Peureudan  
Neupeurunoe dum hareutoe  
Asoë nanggroe dum sibarang

Meunan sabe geunap uroe  
Ureueng nanggroe ate bimbang  
Jinoe lon kheun haba nyang rab  
Pirak lipat lon peugah ban

Limong buleuen sinan teutap  
Ka teuingat heundak pulang  
Bak masa nyan po samlakoe  
Di meuligoe rindu deundam

Hana tom tren meusiuroe  
Sajan putroe nyang analan  
Hingga troh uroe sikureueng  
Bungong seupeueng meunyum bimbang

Bak siuroe intan buleuen  
Banta neukheun judo badan  
Ulon po cut woe u nanggroe  
Tinggai sinoe gata intan

Meuna panyang umu lon nyoe  
Rijang keu noe troh lon riwang  
Han jeuet lon dong sinoe lawi  
Saleh pakri Cut Ariyan

Yoh nyan jitren Putroe Hindi  
Kheun bak abi hai du badan  
Po cut banta neukheun neuwoe  
Pakri jinoe buet nyang reumbang

Seuot raja neukheun meunoe  
Seutot lakoe putroe intan  
Ho nyang geujak bek tabri cre  
Bungong pade cit beusajan

Ulonteu nyoe taniet tan le  
Umu akhe rab ka simpan  
Putroe Hindi sret ie mata  
Jiek lanja keu deh rijang

'Oh troh keu deh seumbah banta  
Putroe muda marit nyoeban  
Meunyo tuanku neuwoe keumbali  
Putroe Hindi bek meulang-lang

Meutinggai lon ampon doli  
Cit han lon bri teubiet u blang  
Gata po cut piyoh dilee  
Goh lom teuntee keunong jalan

Lom eu laku sideh dilee  
Pakri lagee Cut Ariyan  
Ate lam pruet soe tube thee  
Han ek teuntee puteh hitam

Meunan neukheun Peureudan Ali  
Putroe Hindi seungap kalam  
Putroe beudoh com bak gaki  
Po Cut Ali neutren rijang

Banta neutren jak bak raja  
Peugah habà dum lakuan  
'Oh lheueh idin bak tuan tha  
Po cut banta teubiet u blang

Sajan rakan dumna rakyat  
Teubiet leugat laju curam  
Putroe Hindi duek bak tingkap  
Pirak lipat jingieng u blang

Si nyak putroe ate tunu  
Jingieng teungku neupoh linggang  
Allah Allah hai tunaku  
Han jan lon eu gaduh hilang

Yoh nyan putroe jimoe bae  
Dara baro bukon sayang  
Keupeueku lom bantai kaso  
Tuanku e ka neuriwang

Teutap putroe tahe gante  
Sinan jipho ate bimbang  
Nyoe lon peugah linto baro  
Banta lalo rot lam hutan

Neujak laju bungong pade  
Rot dalam gle rimba Tuhan  
Padum lawet neujak sabé  
Hingga troh le woe bak makam

Troh u gampong po samlakoe  
Jilop uroe teuka malam  
Banta neukek u meuligoe  
Beudoh Putroe Cut Ariyan

Si nyak putroe tajo meupru  
Seumbah teungku Cut Peureudan  
'Oh lheueh seumbah jibri ngon bu  
Makeuen laju sajan-sajan

'Oh lheueh makeuen sare-sare  
Bungong pade pinah idang  
Sira putroe tarek bate  
Jitanyong le meunoe macam

Teungku ampon ka troh neuwoe  
Si nyak putroe pakri jeuet tan  
Hindi Licens patkeu jinoe  
Hana lagoe lon eu sajan

Teuma seuot bintang canden  
Ka lheueh kawen ngon lon tuan  
Goh lom trok had keu noe jitren  
Hindi Licens sideh diam

Meunan narit po samlakoe  
Seungap putroe han le kalam  
Hingga teuma haba nyang toe  
Banta laloe ngon Ariyan

Lam meuligoe han tom jarak  
Meusitapak han tom reunggang  
Rot deh rot noe ate galak  
Sang bek jarak siat lapang

Meunan sabé geunap uroe  
Bandua droe rindu deundam  
Sinan teutap lam meuligoe  
Bahle jinoe balek macam

Miseue ureueng tet bu karah  
Balek pantah bek meupaloe  
Amma bakdu ngo lon peugah  
Putroe indah sajan lakoe

Gaseh leubeh that meuganda  
Maken lama ho siuroe  
Lawet lawan saboh masa  
Watee nyan ka hame putroe

Kira-kira dua buleuen  
Bungong seupeueng pruet meuasoe  
Dalam hame po cut meugleueng  
Teuka hireuen bak siuroe

Rindu ate putroe muda  
Teubiet u lua kuta nanggroe  
Lakee idin bak ayahda  
Sireuta deungon bak lakoe

'Oh lheueh idin ureueng dua  
Putroe muda teubiet jinoe  
Ngon dendayang dum sireuta  
Meuseusuka galak han soe

Meukhem meukhak taloe jalan  
Ariyan rindu han bagoe  
Hingga sampoe troh u peukan  
Dumna urang teukap jaroe

Peue buet keu noe aneuk raja  
Han tom nyang ka dilee puroe  
Jeuep-jeuep simpang meuseusuka  
Sangat raya tuan putroe

Jimeuseunda ngon dendayang  
Di leuen peukan han tom meunoe  
'Oh lheueh meu'eu keu noe keu deh  
Putroe areh teuma jiwoe

Sira jiwoe lom ka riyoh  
Allah hai beh han thee keudroe  
Jimeuseunda kakah-kacoh  
Sampoe 'oh troh u meuligoe

Troh u rumoh putroe muda  
Pruetpi lapa deuek han bagoe  
Pajoh le bu pantah sigra  
Leubeh lanja nibak baroe

'Oh lheueh putroe jipajoh bu  
Meunyum kuyu si nyak putroe  
Balah bunoe sangat rindu  
'Oh lheueh bu ka paneuh asoe

Tho ngon reukueng phet ngon babah  
Mata mirah geulunyueng tuloe  
Yoh nyan teubiet napsu amarah  
Putroe indah kheun bak lakoe

Wahe judo ampon jeunulang  
Ulon nyoe sang aja sampoe  
Adat neutem neupeusayang  
Kadang-kadang puleh lon nyoe

Neubri keu lon rusa saboh  
Nyang teumeuloh lumpok asoe  
Meunyo na nyan tuanku jroh  
Nyawong gadoh sang meugantoe

Meuhan ek na po meukuta  
Apon asa that ulon nyoe  
That tuanku di lon hawa  
Han tom nyang ka nyang bu meunoe

Sang-sang rasa han lom mate  
Meugoh hade rusa keunoe  
Meunan jikheun bungong pade  
Sajan ile ie mata droe

Sret ie mata sangat jojah  
Putroe peugah sira jimoe  
Banta seuot insya Allah  
Bek tagundah po sambinoe

Lom meulakee ubak Tuhan  
Beutroh rijang hajat sampoe  
Yoh masa nyan Ali Peureudan  
Neuheu pawang dum lam nanggroe

Troh le pawang keu nan teuka  
Po cut banta kheun hareutoe  
Gaseh sayang dumna gata  
Jak peucara keu lon jinoe

Tajak mita rusa saboh  
Nyang teumeuloh hajat putroe  
Dumna pawang yoh nyan beudoh  
Jiuroh rakan sinaroe

Jiba ngon asee sajan ngon jareng  
Ladom leumbeng mat bak jaroe  
Ladom taren awe lilen  
Sajan areng ngon rampagoe

Geujak laju dalam rimba  
Mita rusa keu deh keu noe  
Jeuep-jeuep uteuen tamah muda  
Saboh hana rusa pindoe

Bek antara nyang teumeuloh  
Nyang saket boh hana lagoe  
Sabe keudroe jimeuteuh  
Pakri nyang jroh dum geutanyoe

Sikhan buleuen ka dalam gle  
Meute guble lam-lam duroe  
Geumeupakat dumgeu sare  
Jibeudoh le pawang jiwoc

Troh u gampong teuku pawang  
Peugah rijang narit tanggoe  
Teungku ampon kheundak Tuhan  
Meusaboh tan rusa pindoe

Bek antara lon eu rusa  
Meuck rusa tan meubunyoe  
Banta deungo hana rusa  
Sret ie mata po samlakoe

Yoh nyan banta ucapan syuko  
Rabbon Gafo tulung kamoe  
Lheueh nibak nyan bungong kundo  
Banta lalo ek meuligoe

Troh u rumoh Cut Peureudan  
Bak Ariyan neukheun meunoe  
Hai putroe cut judo badan  
Bahle kaman lon jak keudroe

Bahle lon jak jeuep-jeuep rimba  
Nyang gata hajat beusampoe  
Meugoh lom troh hajat pinta  
Han lon gisa hai sambinoe

Yoh masa nyan Cut Ariyan  
Sayang intan lom ka jimoe  
Sabab neukheun han neuriwang  
Banta seudang neuboh nanggroe

Teutap sinan bungong kundo  
Linto baro lon hareutoe  
Abeh narit deungon judo  
Dara baro teutap jimoe

Tinggai sinan putroe intan  
Ali Peureudan peukeumah droe  
Yoh nyan neutren Cut Peureudan  
Keu Tuhan neuharap sidroe

'Oh troh neutren gaki rinyeun  
Jaroe neuleueng po samlakoe  
'Oh lheueh banta neumeuinseuen  
Bungong seupeueng tinggai nanggroe

Meusidroe tan neuba rakan  
Bukon sayang neujak sidroe  
Neuharap cit sidroe Tuhan  
Nyang laen tan dum sinaroe

Bukon sayang bungong pade  
Suntok sabe angen tampoe  
Bukon sayang pheuet meuuke  
Cit lam sabe neuboh nanggroe

Pihak inseueh gaseh teuka  
Cut meutia pruet meuasoe  
Neujak laju pekoh rimba  
Tan neukira malam uroe

Leupah banta neubeurangkat  
Peutroh hajat tjan putroe  
Teuduek 'oh nan dilee siat  
Nyoe lon sambat laen jinoe

Amma bakdu laenpi le  
Putroe Juho lon hareutoe  
Jideungo gah gop meututo  
Dara baro pruet meuasoe

Cut Ariyan pruet ka raya  
Ngon banta ka neuboh nanggroe  
Yoh masa nyan po jroh rupa  
Meubicara deungon lakoe

Teungku ampon pakri padan  
Ariyan ka laen bagoe  
Lompi banta Cut Peureudan  
Leupah jalan jiboh nanggroe

Nyang got bak lon teungku ampon  
Bahle ulon keu deh jinoe  
Sabab banta tan di gampong  
Meunyo na lon lale putroe

Meuntroe Adan seuot leugat  
Ban nyang pakat hai sambinoe  
Lagee di gop reusam adat  
Peubuet leugat di geutanyoe

Han peue po cut tateumanyong  
Ban nyang keunong peubuet keudroe  
Yoh masa nyan bungong pade  
Jimeuhei le ureueng nanggroe

Troh le keu nan bandum sare  
Adee pade leukat jatoe  
Hana meujan putroe peugah  
Siat keumah dum sinaroe

Ka jitet le ngon bu karah  
Juadah sajan ngon tumpoe  
Ureueng binoe sangat pantah  
Bandum cidah that buet jaroe

Dum makanan indah-indah  
Han ek peugah le that bagoe  
Dum peurumoh ureueng patot  
Beungoh seupot sinan laloe

Han tatukri kalang-kalot  
That klam-kabot di meuligoe  
Siat ase dum makanan  
Hana meujan padum uroe

Sare ase sileungkapan  
Pasoe idang dum seuleusoe  
Ka geutop ngon ija hijo  
Dum meuato di seuramoe

Yoh nyan marit Putroe Juho  
Beudoh da e bandum jak woe  
Peukeumah droe bandum gata  
Beusigra tariwang keu noe

Teumà beudoh bandum gisa  
Jak cok ija peukeumah droe  
Bak watee nyan Meuntroe Adan  
Kheun bak bujang jak lam nanggroe

Yoh nyan waki tamrong rijang  
Jak peugah ban suroh meuntroe  
Ban jideungo suroh deelat  
Jitren leugat dum sinaroe

'Oh troh keu nan bri horeumat  
Ampoñ deelat ka troh kamoe  
Turon sabda Meuntroe Adan  
Keudeh tuan bek di sinoe

Beudoh geusyik imum sajan  
Jak tanyong ban ubak putroe  
'Oh troh ubak Putroe Juho  
Tanyong ato peue buet jinoe

Teuma seuot bungong kundo  
Hai dalem e deungo lon nyoe  
Nyang lon seutot dumna gata  
lon kubungka bak siseun nyoe

Hajat ulon beusireuta  
Dum sigala asoe nanggroe  
Lon jak kawueuh Cut Ariyan  
Intat idang siat jinoe

Tapeuase ngon peurakan  
Peurasan beule that bagge  
Seuot peutua insya Allah  
Han peue salah tuan putroe

Jibeudoh le jiwoe pantah  
Jak peukeumah dum sinaroe  
Watee meunan peue tapeugah  
Galak leupah ureueng nanggroe

Deungon siat ase sudah  
Jipeuseumbah ubak meuntroe  
Jinoe lon kheun haba nyang rab  
Mangat rigap rijang sampoe

Sare ase dumpeue leungkap  
Geubeurangkat rijang uroe  
Geuteubiet blang abeh gampong  
Peuhah payong dum meuranjo

Uroe tarek sangat tutong  
Geupeutudong si nyak putroe  
Padum lawet geubeurangkat  
Sampoe hajat ujung nanggroe

'Oh troh keu nan piyoh siat  
Musyawarat sabe keudroe  
Yue plueng sidroe keu deh dilee  
Geuyue bri thee u meuligoe

Leupah ureueng geujak bri thee  
Bungong keumee beudoh jinoe  
Nyang jak di nap Macut Haji  
Cit geuturi dalam nanggroe

Sireuta ngon Si Nyak Sidi  
Han jitukri bak tiek jaroe  
Di likot nyan Si Nyak Sahan  
Dua sajan Si Nyak Baloe

Han tatukri jipoh linggang  
Jan jigawang keu deh keu noe  
Di likot nyan Si Nyak Baren  
Nyanpi dalem cidah han soe

Baho keumang keuieng linteng  
Seulangoi geng sang geuujoe  
Nyankeu ureueng keu peutua  
Aneuk dara apet putroe

Dalam nanggroe Pusong Rawa  
Laen hana meunan bagoe  
Watee jijak aneuk miet nyan  
Taloe jalan yoh di nanggroe

Le that ureueng mata keu nan  
Uleebalang dum sinaroe  
Imum-imum bentara blang  
Aneuk miet nyan nyang geupujoe

Bak watee nyan jih peutua  
Ureueng tuha seungap keudroe  
Sama teungoh putroe muda  
Dum meubanja rot deh rot noe

Taeu jijak jipoh linggang  
Sang geulumbang dalam sungoe  
Sang meukeuphot sang meuguncang  
Sang seulayang jihayak droe

Ngon peukayan indah-indah  
Han ek peugah le that bagoe  
Jitop ulee hijo mirah  
Ija samplah kasab reumboe

Ikai sapai ngon keuruncong  
Got meutanggong mata pudoe  
Jisok euncien mata silong  
Taeu matong sang bek tabloe

Taeu jijak sang keudidi  
Han jitukri tiek prak jaroe  
Soe nyang kalon sang beureuhi  
Teuka beunci barangasoe

Ban sare troh teuntang linggong  
Ureueng gampong karu keudroe  
Ladom peugah rumoh tutong  
Hai da payong tajak keunoe

Ban jideungo jiplueng rijang  
Teuploh pinggang han thee keudroe  
Ladom aneuk tinggai sinan  
Jicok han jan beuthat jimoe

Agam inong plueng meudeuru  
Teubiet jak eu tuan putroe  
Ban sare troh leumah jieu  
Tanyong laju patbu nanggroe

Sabe keudroe jimeututo  
Hai cutda e na tatusoe  
Ladom jikheun Putroe Juho  
Nyankeu judo raja meuntroe

Teumpat nanggroe Pusong Rawa  
Meunan hai da peunyum lon nyoe  
Bak alamat dum peurakan  
Cut Ariyan geujak seumanoe

Bak lon pike meunakeu sang  
Bitpi meunan hom hai adoe  
Meunankeu dum jimeututo  
Bandum tahe ateueh putroe

Cut putroe jak meujudo-judo  
Got that ako jitiek jaroe  
Aleh sabe langkahpi santeut  
Salah bacut hitam sidroe

Beuthat hitam takalon meuhad  
Sabab meusapat keunong jaroe  
Jibeudoh ngon bee taloe jalan  
Aneuk agam tunu keudroe

Le that ureueng sang ka pangsan  
Jipandang kawan cut putroe  
Nibak geujakpi meupatot  
Dum di likot ureueng lakoe

Ladom gulam tumbak mejanggot  
That meusambot deungon cakcoe  
Nibak baho sawak beude  
Bandum sare ngon keureupoe

Tangieng jeuoh sang meuble-ble  
Kuyut ate baranggasoe  
Teungoh-teungoh geubeurjalan  
Teiduek 'oh nan siat sinoe

Laju keu deh lon peuriwang  
Ubak rakan nyang plueng bunoe  
Troph bak raja dalam kuta  
Peugah sigra narit tanggoe

Teungku ampon Cut Seutia  
Uroe nyoe ka langkah keu noe  
Mantong sideh bak ujung blang  
Ulon datang dilee keu noe

Ban neudeungo teuka bisa  
Raja yoh nyan peuase droe  
Raja suroh dumna ureueng  
Teubiet ampeueng tuan putroe

Ban jideungo po raja kheun  
Dumna ureueng jiikat droe  
Jipeusapat dum bunyian  
Tambo geundrang le that bagoe

Ka jiteubiet laju u blang  
Tet meuriam kiam bunyoe  
Rot noe geutet rot deh geutet  
Yoh nyan ribot kiroh nanggroe

Asap beude ka jeuet sagop  
Teuka seupot hitam nanggroe  
Rot deh rot noe kalang-kalot  
Jimeugrop-grop han thee keudroe

Hana lon kheun buet peurasan  
Panyang kalam malah kamoe  
'Oh han ek le jipeh geundrang  
Sumpom sinan seungap nanggroe

Teuma peurab ureueng tuha  
Peumulia bét ngón jaroe  
Ranup baté sajan geuba  
Peugah haba narit tanggoe

Po cut ampon sujud horeumat  
Narit beureukat nibak lon nyoe  
Suroh nibak raja deelat  
Keudeh leugat u meuligoe

Seuot Putroe Cut Seutia  
Sigo cutda deungon kamoe  
Insya Allah po jroh rupa  
Cit sireuta ulonteu nyoe

Yoh masa nyan po cut meulu  
Jimat laju le bak jaroe  
Lam kuta peutamong laju  
U leupu keu deh troh sampoe

Ban sare troh u istana  
Cut Seutia duek le keudroe  
Cut Ariyan peurab lanja  
Seumbah cutda po sambinoe

'Oh lheueh seumbah duek le siat  
Bri horeumat syeedara droe  
Sajan puan geubet leugat  
Pirak lipat sinan laloe

Teutap sinan Cut Seutia  
Lam istana sajan adoe  
Ureueng agampi ka geuba  
Lam kuta bandum sinaroe

Ka geupeuduek dum bak teumpat  
Ban nyang adat dilee puroe  
Deungon idang bet le leugat  
Geuangkat sajan ngon jaroe

Cit ka cukop dumpeue ase  
Hana peue le lon hareutoe  
Dumna rakyat geumakeuen le  
Jinoe bahle anrit nyang toe

Abeh bandum peurjamuan  
Inong agam dum sinaroe  
'Oh lheueh makeuen pinah idang  
Sikalian dum ka sampie

Seungap beude han le bareh  
Buetpi abeh dum seuleusoe  
Bak malam nyan bandum geueh  
Hingga mureh teubiet uroe

Singoh beungoh watee siang  
Peuaselan dum jeuep-jeuep syoe  
Abeh syarat sikalian  
Ariyan laju seumanoe

Nyang seumanoe Macut Haji  
Buet geutukri dum sinaroe  
Ase beudak ngon keutanggi  
Macut Haji 'ajab han soe

Macut Haji cit utoh that  
Panyang ayat do'a manoe  
Abeh bandum cok ibarat  
Hana silap dum seuleusoe

'Oh lheueh manoe po jroh rupa  
Cut Seutia salen adoe  
Geubri salen rukon ija  
Ban nyang kada adat putroe

Hana lon kheun buet teumeutuek  
Po cut po cut maklum keudroe  
Lon kheun saja nyang meukeusud  
Soe nyang meuheut tambah dudoe

Lheueh seumanoe dara baro  
Putroe Juho sinan laloe  
Sabab hana linto baro  
Bungong kundo sayang adoe

Jipeutimang jroh sileupah  
Jipapah cidah han bagoe  
Mangat gadoh ate gundah  
Banta indah tan di nanggroe

Cut Ariyan ate mangat  
Walee beuthat hana lakoe  
Jipeugah dum haba mangat  
Ariyan that ate laloe

Teutap sinan bintang candeh  
Rakyat laen dum jiyue woe  
Abeh jiwoe ureueng laen  
Maseng-maseng dum u nanggroe

Tinggai sinan Cut Seutia  
Lam istana sajan adoe  
Teuduek siat po jroh rupa  
Lon calitra laen jinoe

Amma bakdu deungo beutroh  
'Oh lheuen piyoh siklep mata  
Jinoe meuwoe nanggroe musoh  
Raja di baroh lon calitra

Raja dua blah lon peugah ban  
Nyang sidroe nan Raja Lila  
Teuma nyang sidroe Raja Lizam  
Duajih nyan nyang keupala

Raja siploh turot titah  
Ban peurintah ureueng dua  
Meunan meuteumeung dalam kisah  
Deungo lon peugah dumteu rata

Raja Syareh masa dilee  
Geutueng meulintoe po cut banta  
Sabab ka roh jalan tipee  
Hana geuthee jam rahsia

Raja Lizam saket ate  
Hana lahe lom u lua  
Banduajih sapeue pike  
Sare-sare Raja Lila

Deungon sabab prang han jadeh  
Hana jipreh meukeurija  
Raja dua jimeucukeh  
Bahle taweh jak tagisa

Yoh nyan jiwoe raja asee  
Sangat maleejih bandua  
Rakyat laen meuploh ribee  
Dum han soe thee raja gisa

Sira jiwoe jiceumarot  
Hana patot buet di raja  
Po Cut Hindi geupeusambot  
Han geutaköt jeuheut nama

Dilee galak Cut Ariyan  
Ali Peureudan tan geuniet na  
Teuma jinoe balek macam  
Atoran ka roh jituka

Ka roh keu noe jiek linto  
Dara baro bijeh mata  
Sira jiwoe meunan tuto  
Laenpi le han ek kira

Banduajih saket ate  
Sare-sare meubicara  
Uroe malam pike syawe  
Teuingat sabe malee mata

Dalam ate saja jiprang  
Meudang riwang balatantra  
Hingga teuma padum uroe  
Troh le jiwoe siploh raja

Ban jideungo dum abeh woe  
Raja pindoe meuhie sigra  
Ka jipangge sikalian  
'Oh troh keunan jipareksa

Nyang teumanyong Raja Lizam  
Wahe tuan siploh raja  
Pakri laku Raja Syareh  
Ka meulanggeh bak agama

Jikheun meunoe buetjih meudeh  
Raja paleh akai hana  
Dumna patong abeh jiproh  
Tan meusaboh le beurala

Peureudan Ali dilee musoh  
Jinoe ka roh meulintee raja  
'Oh kuingat meunan bagoe  
Di kee sidroe mangat fana

Mangat ate umu sampoe  
Nibak meunoe 'ayeb nama  
Nibak gata pakri pike  
Cuba kheun he dumteu rata

Raja siploh jiseuot le  
Ban nyang pike bak meukuta  
Meunyo takheun pike kamoe  
Beudoh jinoe ikat ija

Meuhan kuprang bak siseun nyoe  
Bukon lon nyoe Lizam nama  
Raja Syareh han kukeubah  
Kaeu kuplah di keupala

'Oh lheueh mate raja meugah  
Putroe-indah kucök kuba  
Peureudan Ali han kumalee  
Kaeü buet kee kuproh dua

Raja Syareh kupoh dilee  
Nyang meulintee mudah saja  
Meunan jikheun Raja Lizam  
Di hadapan siploh raja

Raja siploh seuot rijang  
Cit nyo meunan nyang sibeuna  
Meukon tapoh Raja Syareh  
Cit han puleh 'ayeb nama

'Oh lheueh meunoe jikheun meudeh  
Bangsa paleh malee hana  
Le that jingui buet nyang karot  
Hana patot meunoe jeumba

Masa jihei dum geutanyoe  
Yue tulong droe musoh teuka  
'Oh takalon laen bagoe  
Ka roh putroe jiboh gaca

Patot jinoe tapoh mate  
Taboh bangke atueuh sula  
Meukon meunan han pueh ate  
Han puleh le malee mata

Sapeue sapo jimeukheun-kheun  
Aneuk bajeueng beungeh raya  
Peugah janji sapeue pakat  
Jiwoe leugat maseng tangga

Troh u nanggroe jikrah rakyat  
Deungon siat abeh teuka  
Ngon alat prang yue peuase  
Tumbak beude sianika

Ban meusapat bandum sare  
Ka jithee le rakan seutia  
Sare jithee rakan sireutoh  
Kapah-kapoh meubicara

Bek le kaduek aneuk biyoh  
Jakleh peutroh ubak banta  
Yoh nyan beudoh dua ureueng  
Laju jiplueng jikoh rimba

Jiplueng sunggoh rot lam uteuen  
Trok meubuleuen meureuraba  
Hingga ka troh woe u nanggroe  
Jingo bunyoe hana banta

Adil Parisi di meuligoe  
Rakan peutoe jak peuhaba  
Deelat ampon lam nanggroe jeh  
Raja Syareh sang binasa

Raja dua blah ate peudeh  
Jiprang keu deh tuan banta  
Ban neudeungo Adil Parisi  
Ureueng neubri jeuep-jeuep raja

Abeh bandum neuyue bri thee  
Pat-pat nyang mee na syeedara  
Neuyue peugah narit teuntee  
Top meunalee po cut banta

Jeuep-jeuep nanggroe yue jak keu deh  
Anta Ladeh bantu raja  
Neuyue tulong Raja Syareh  
Laju keu deh neuyue bungka

Bek meusinggah laen teumpat  
Beutajam that keu deh lanja  
Ban sare lheueh nyan jipeugah  
Jiplueng pantah jak peuhaba

Ladom jiplueng Jarussalam  
Ladom curam Pusōng Rawa  
'Oh troh kēu deh peugah rijang  
Dum lakuan jicalitra

Raja Syareh ka meupaloe  
Bantu jinoe suroh raja  
Abeh bandum jihareutoe  
Bansinaroe jipeuhaba

Ban geudeungo meunan macam  
Peuaselan dum peukara  
Deungan siat ase keu nan  
Sikalian balatantra

Hingga alatpi ka ase  
Geubeudoh le laju bungka  
Geujak laju geuarong gle  
Bandum sare bantu raja

Meuntroe Sakdi Jarussalam  
Meuntroe Adan Pusong Rawa  
Sideh sinoe geubeurjalan  
Sikalian peukoh rimba

Rakyat Palistinapi ka geujak  
That meubulak balatantra  
Ka dalam gle dum meusak-sak  
Uteuen seumak jeuet keu data

Teungoh-teungoh geubeurangkat  
Teuduek siat dalam rimba  
Jinoe keu deh lon riwayat  
Bak pakat dua blah raja

Masa bunoe rakyat jikrah  
Siat sudah dum ase ka  
Sare ase dum peukakah  
Jicok langkah si ceulaka

Jiba rakyat meuploh katoe  
Aneuk bisoe beungeh raya  
Anta Ladeh ka troh sampoe  
Tamong nanggroe pantah sigra

Ban sare toh dalam duson  
Abeh jiron peue-peue nyang na  
Peue meuteumeung laju jikong  
Teubee meuon phon jihila

Meurumpok keubeue leumo jicok  
Meurumpok manok itek jiba  
Ureueng gampong plueng teureuban  
Inong agam ka jiguda

Ladom jiplueng bak sulotan  
U dalam jijak peuhaba  
Raja Syareh bak masa nyan  
Di balerum duek sibanja

Raja tanyong pantah rijang  
Pakon tuan taplueng gata  
Teungku ampon Raja Lizam  
Sajan deungon Raja Lila

Abeh keu noe jibeurangkat  
Meusapat dua blah raja  
Le that ureueng jiba rakyat  
Han ek hisab ribee laksa

Dalam duson ka jirampah  
Abeh rumah dum jisua  
Raja deungo meunan peuneugah  
Muka mirah jiek bisa

Laen ureuengpi troh laju  
Plueng meu'u-'u dalam kuta  
'Oh troh keu nan tanyong laku  
Ampon tuanku peue peukara

Sabda raja bek katanyong  
Teubiet rijang jak pareksa  
Kapeuteubiet ngon alat prang  
Sikalian ingat beurata

Hingga teubiet rakyat u blang  
Ubak padang geupreh teuka  
Peukeumah droe dumna rakan  
Mat sinapang bandum rata

Raja dua blahpi ka sampie  
Jipiyoh droe di blang raya  
Sang pupalang got meurundoe  
Meuploh katoe balatantra

Ka jipeudong deungon kimah  
Dum kafilah sangat that bha  
Jitarek ngon alam mirah  
That barollah han ek kira

Cukop ase deungon siat  
Abeh leungkap sianika  
Ureueng gampong yoh nyan peurab  
Keunan leugat jak pareksa

'Oh troh keu nan jipoh leugat  
Han jan meurab ubak tantra  
Sinankeu phon jeuet le pake  
Lheueh le beude 'oh meutaga

Rot noe beude rot deh beude  
Ureueng mate seun-seun dua  
Sideh sinoe prang jipeusak  
Deumpek surak that guranta

Sideh leumbeng sinoe kapak  
Jimeutop tak han ban peubla  
Ureueng nanggroe jiek laju  
Jipeu'u-'u dalam tantra

Raja dua blahpi jimaju  
Ngon jimeusu raya-raya  
Saket ate kaphé laknat  
Prang jikarat jipeudada

Sira jikheun ubak rakyat  
Kacang leugat sukee raja  
Keu deh keu noe meutunang prang  
Mantong timang sabé padra

Raja Lila sangat girang  
Raja Lizam nyang that peurkasa  
Jipeuek prang gadoh ingat  
Jipoh rakyat jipet mata

Lompi di jih le that rakyat  
Na dum lalat atueh donya  
Raja Syareh rakyat kureueng  
Dit that ureueng saboh raja

Kuyut ate bandum ureueng  
Kaphe bajeung le lagoina  
Tujoh urroe jikarat prang  
Sikeujap tan nyang na reuda

Ureueng gampong han ek teuntang  
Bak uroe nyan talo ngaza  
Yoh nyan jiplueng dumna rakyat  
Musoh le that han ek sangga

Musoh paleh jipeudhap-dhap  
Jiplueng leugat ka jiguda  
Raja Lizam ka jimeusu  
Kalet laju kacang lanja

Maken jiplueng that meu'u'u  
Tan sigeutu le jimeutha  
Ureueng nanggroe kakeu talo  
Ka geuundo lop lam kuta

Jinoe laen ulon ato  
Haba tan le bacut saja  
Meuntroe Cut Ben bak masa nyan  
Jikalon prang talo ngaza

Di gop geuplueng peusiblah badan  
Di meuntroe nyan laen kira  
Bukon utoh Meuntroe Cut Ben  
Lagee laen jibicara

Meuntroe pike sangat teuntee  
Han le lagee bak ri rupa  
Yoh goh mate umu padee  
Gotkeu dilee kubicara

Han jeuet meunoe kupeuiem le  
Roh di akhe kee ceulaka  
Meuka jicok bungong pade  
Tan guna le keu cut banta

Meunan pike teungku meuntroe  
U meuligoe jiek lanja  
'Oh troh keu deh jihareutoe  
Wahe putroe nyang jroh rupa

Gata putroe lon peusiblah  
Mangat leupah nibak bahya  
Awai akhe meuntroe peugah  
Putroe indah sret ie mata

Yoh masa nyan Meuntroe Cut Ben  
Hindi Licens jicok sigra  
Rot dapu keu deh jipeutren  
Ureueng laen soe thee hana

Si plah rujeipi ka sapat  
Sapeue pakat ureueng dua  
Jicok laju pirak lipat  
Jiek leugat pageue kuta

Leupah kuta laju jiplueng  
Lhee droe ureueng sama-sama  
Jiba lajù po cut meugleueng  
Troh lam uteuen peukoh rimba

Teuduek haba Meuntroe Cut Ben  
Hindi Licens leupah jiba  
Nyoe lon peugah ureueng laen  
Imum Maken lon peuhaba

Masa bunoe plueng meu'u-u  
Bandum karu lop lam kuta  
Meuteumeung le ngon tuanku  
Neukheun laju peue ri gata

Pakon taplueng han tameucang  
Gata tuan geusuen raya  
Riwang bandum keu deh u blang  
Bek kapantang si ceulaka

Imum Maken seuot nyoeban  
Han kuriwang po meukuta  
Beuthat neupoh beuthat neucang  
Boh neupanggang atueh sula

Han ek lawan musoh le that  
Abeh rakyat ka binasa  
Raja Lizam sangat kuat  
Peudeueng jimat tajam mata

Le that mate jipoh rakyat  
Hana meuhad ekjisangga  
Sangat pantah bak jimeucang  
Raja Lizam nyang that peurkasa

Hana meujan deuh tapandang  
Peudeueng panyang troh bak muka  
Lompi rakyat meuplokatoe  
Di geutanyoe tan padumna

Yoh nyan raja pike keudroe  
Saleh kamoe ka troh masa  
Yoh masa nyan Raja Syareh  
Peudeueng bak binteh pruh neuhila

Ikat keuieng neulhat ngon kreh  
Neugrop keu deh pantah sigra  
Poteu raja neugrop u leuen  
Sira neukheun meunoe haba

Lon meukalon jinoe siseun  
Soe na ureueng nyang seutia  
Bahle u blang keu deh reubah  
Bek jeuet sosah dalam kuta

Nyang seutia keu deh leumah  
Nyang han tem bah tinggai saja  
Kuduek mate kudong mate  
Gotkeu bahle keudeh u lua

Poteu raja han le pike  
Neuteubiet le u blang raya  
Seutot rakyat sare-sare  
Nyang tem mate sajan raja

Ban sare troh raja u blang  
Tarek alam alamat raja  
Raja yue peh ngon geundrang prang  
Alamat nyan teubiet raja

Rakyat nyang plueng masa bunoe  
Bansinaroe ka meugisa  
Hingga teuma haba nyang toe  
Rot deh rot noe geuek lanja

Surak deumpek geuheu sare  
Sang-sang reule Blang Malaka  
Ban sare rab hana pike  
Meusu beude ngon meutaga

Yoh nyankeu prang nyang that gunjak  
Rasa meuhayak nanggroe raya  
Sinoe deumpek sideh surak  
Jimeulikak dalam tantra

Sare meuhadap dua pihak  
Yoh nyan jimeutak han ek kira  
Dum pahlawan ugoh-ugoh  
Jimeupoh-poh han ban peubla

Jimeuplueng-plueng han tatu'oh  
Leukang tanoh meuleua-leua  
Ureueng nanggroepi jikarat  
Jiek leugat meulumba-lumba

Raja Syarehpi beungeh that  
Prang neukarat neupet mata  
Nyang na bacut rakyat kureueng  
Le that ureueng musoh teuka

Raja Lizam hana peue kheun  
Wie ngon uneun peudeueng jiba  
Le that mate jicang ureueng  
Meukeubeueng darah keulua

Keu deh keu noe leupang-leupeung  
Han jan jikheun Allah hai ma  
Ureueng nanggroe le that mate  
Teutiek bangke dum meukeuba

Bitpi dumnan hana singke  
Jime mate sajan raja  
Jimeung surot malee sипу  
Sabab tuanku pandang mata

Jipeusak dak jiba tunu  
Jimaju u teungoh tantra  
Nyang mate di sinan teutap  
Nyang na hayat meuprang lanja

Rot deh rot noe prang jikarat  
Jipeudhap-dhap mèuleulumba  
Sikhan uroe meutunang prang  
Mantong timang sabé padra

Bak masa nyan Raja Lizam  
Meutunang ngon raja raya  
Ban meuteumeung Raja Syareh  
Tuto peudeh jikeulua

Peue lom haba Raja Syareh  
Napsu abeh atawa hana  
Meunyo napsu keu seulamat  
Sumpom leugat kulah kama

Raja Syareh seuot leugat  
Pakon jeungkat tuto gata  
Tameututo nyang han patot  
Sangat karot tameuhaba

Nyang got riwang jak kasuot  
Yoh goh lupot nyawong fana  
Yoh goh mate nyawong lupot  
Nyang got surot bek le haba

Lizam jikheun han kutakot  
Bek peukeujot lon le gata  
Raja Syareh neubet peudeueng  
Neutak meuheung 'oh meutaga

Lizam kilah leupah peudeueng  
Sira jikheun peue ri gata  
Goh lom utoh bak tameucang  
Gata tuan goh biasa

Nyoe tarasa peudeueng Lizam  
Theun kupulang atueuh gata  
Raja Lizam jitak rancong  
Jikeupong bak ulee raja

Peudeueng cikok laju meuglong  
Han le untong bak jikira  
Jitiek peudeueng pruh jiteugom  
Jimeusumpom ngon jiputa

Han ek jibet leubeh that kong  
Raja teudong sang geupula  
Yoh masa nyan bandua droe  
Keu deh keu noe keumeung puta

Meucron keu deh meucron keu noe  
Leungo bumoe miseue geumpa  
Sabe raja geumeureupah  
Sabe meugah timang padra

Keu deh keu noe hana tiwah  
Ateueng patah seun sideupa  
Raja Lila troh jibantu  
Jidrop meupru ka jiputra

Hingga reubah raja laju  
Ka jieumpu deungon cokma  
Dua lhee seun jiboh tungkat  
Gadoh kuat poteu raja

Hankeu ek le neugeuriwat  
Jipoh leugat bak-bak jungka  
Lom jitambah cubong beude  
Raja mate hilang nyawa

Dumna musoh galak ate  
Jihei sare that meutaga  
Surak deumpek hana teudoh  
Sang runtoh karam donya

Bak masa nyan ureueng jeuoh  
Ka keu nan troh bantu raja  
Raja mate bantipi troh  
Allah hai beh kureueng guna

Ka troh rakyat Jarussalam  
Ngon angkatan Pusong Rawa  
Ban sare troh Meuntroe Adan  
Ka seungap prang siat reuda

Ureueng musohpi jisurot  
U likot bak teumpat nyang ka  
Hingga uroepi ka seupot  
Han le kalot safan-safa

Mayet raja cok geupeuwoe  
U meuligoe peuke lanja  
Abeh karu di meuligoe  
Dendayang moe jamong rugha

Cut Sifiah jimoe bae  
Sinan jipho keumong mata  
Hana lon kheun buet meubae  
Han ek ato panyang haba

Meuntroe Adan sajan rakyat  
Tamong leugat dalam kuta  
Troph u dalam geubri teumpat  
Ban nyang adat maseng jeumba

Geubri ngon bu geupeujamee  
Ban patot mee adat raja  
Malampi ka jula watee  
Dumna jamee eh lam kuta

Buet nyang laen tan lon peugah  
Panyang kisah han ek rika  
Jula malam poh dua blah  
Dumna syeekah teungeut indra

Singoh beungoh hari siang  
Meuntroe Adan neumeusabda  
Nyang ka mate yue boh gafan  
Tanom rijang poteu raja

Nyang udep laen tapike  
Peukeumah le balatantra  
Beudoh bandum bek taduek le  
Pasoë beude sigra-sigra

Hingga teuma haba nyang rab  
Beudoh rakyat ikat ija  
Dumna beude pasoe ubat  
Teubiet leugat u blang raya

Sira geujak meupeurasan  
Alamat prang tuntut bila  
Yup seurumpet peh ngon geundrang  
Dum bunyian meusuara

Dum peurasan le that macam  
Han jeuet tuan lon calitra  
Yoh masa nyan Raja Lizam  
Sireuta ngon Raja Lila

Mantong jiduek sajan rakan  
Lam bantayan kuta mara  
Lizam deungo meusu tambo  
Hai rakan e jak peunyata

Kungo geundrang laen macam  
Bak lakuan raja-raja  
Cuba teubiet kajak pandang  
Pane datang bantu teuka

Pane rakyat teuka keu noe  
Katanyong soe nyang keupala  
Ka jiteubiet le dua droe  
Jak tanyong soe nyang peutua

Leumah jieu Meuntroe Sakdi  
Ka jituri meuntroe raja  
Teuma jikheun ampon doli  
Meuntroe Sakdi lon eu rupa

Ka jiseuot Raja Lizam  
Meunyo meunyan ka troh banta  
Nyo ka troh Ali Peureudan  
Beudoh rijang jak tangaza

Yoh masa nyan dum sipai  
Jiantri teubiet u lua  
Ka jibeudoh biek majusi  
Jinari jilila-lila

Nyang beude ka lheueh meuasoe  
Bak jaroe na tumbak ganja  
Nibak keuieng dum keureupoe  
Aneuk bisoe keumah raya

Jimeulikak le lam kawan  
Sinapang bandumjih rata  
Sajan jipeh ngon geundrang prang  
Le that macam rupa-rupa

Sireuta ngon jihei sare  
Ureueng kaphe that guranta  
Rot Islam han peue kheun le  
Cit ka ase geuek lanja

Sideh geuek sinoe jijak  
Prang geupeusak pihak dua  
Sideh deumppek sinoe surak  
Sang meuhayak Blang Malaka

Lheueh le beude jareueng-jareueng  
Sang geuampeueng jamee teuka  
Rot deh rot noe hana peue kheun  
Tango trang-treung boh beude bha

Ladom rakyat mat busu bleuet  
Ureueng nyang jeuet guna biasa  
Boh busu po tango hat-huet  
Sang han tajeuet peudeuh muka

Jipeuek prang got that rapat  
Hana siat nyang na reuda  
Raja-raja duek bak teumpat  
Meuprang rakyat mantong saja

Ban sare rab rot deh rot noe  
Jimeueungkhoe han ban peubla  
Jimeupoh-poh deungon cakcoe  
Jikiloe di muka-muka

Tadeungo su lebab-leubub  
Ladom sambot drop geulawa  
Bak watee nyan prang jikalot  
Bagoe ribot bade raya

Ureueng mate rot deh rot noe  
Sang sijak nyoe teuka waba  
Keunong peudeueng puntong jaroe  
Saboh bagoe nyang patah pha

Bitpi dumnan le that mate  
Hana singke rakyat dumna  
Nyang na hayat meuprang sabé  
Nyang mate sinan teurhanta

Rot deh rot noe prang meutunang  
Got that timang sabé padra  
Seupot uroe geupiyoh prang  
Tarek alam lop lam kuta

Singoh beungoh hari siang  
Lom geuriwang geuprang ngaza  
Watee uroe meuprang sunggoh  
Malam piyoh woe lam kuta

Geunap uroe prang meugeucoh  
Hana teudoh rok-rok masa  
Rakan sireutihpi jimeuprang  
Sajan-sajan si ceulaka

Dadang leumah laen jalan  
Goh lom meuban bak bicara  
Meuntroe Sakdi nyang pahlawan  
Sajan tuan meuntroe raja

Geukheun han ek takarat prang  
Le angkatan si ceulaka  
Watee malam musyawarat  
Uroe meuhad meuprang ngaza

Meunan sabe ka meuadat  
Teuduek siat dilee haba  
Amma bakdu laen macam  
Jinoe tuan balek ayat

Teuduek haba ureueng meuprang  
Ali Peureudan lon riwayat  
Nyoe lon peugah bungong pade  
Di dalam gle mantong sisat

Uroe malam neujak sabe  
Han meuho le Timu Barat  
Bukon sayang banta muda  
Jeuep-jeuep rimba neubeurangkat

Jeuep-jeuep uteuen mita rusa  
Saboh hana lom meundapat  
Gunong manyang apoh-apoh  
Puteh leusoh neuke leugat

Han neuingat luka tuboh  
Kareueng pajoh sayangteu that  
Keu deh keu noe meuraba-raba  
Mita rusa nyang meukilat

Pat-pat nyang na tamah muda  
Bandum rata neujak lihat  
Bek antara neueu rusa  
Meuke rusa hana dapat

'Oh kuingat puteh leusoh  
Pijuet tuboh muka pucat  
Bu sianeuk tan neupajoh  
Allah hai beh payahpi that

Di dalam gle troh meubuleuen  
Neumakeuen boh kayee siklat  
Rimueng badeuke abeh jiplueng  
Cut buleuen jibri horeumat

Rayek tuah po cut banta  
Dum sigala jitakot that  
Karonya Po Tuhan Esa  
That bahgia pirak lipat

Neulakee bak Tuhan sidroe  
Malam uroe han tom silap  
Ya Ilahi tulong kamoe  
Neubri jinoe beutroh hajat

Sajan deungon sujud syuko  
Bungong kundo neumeunajat  
Neulakee bak Rabbon Gafu  
Tuhanku sifeuet nyang leungkap

Wahe Tuhan Po Nyang Esa  
Bak gata sidroe lon harap  
Neubri keu lon nyang sijahtara  
Di donya sampoe akhirat

Dalam uteuen buket manyang  
Neubri seunang bek le sisat  
Neupeuleumah jalan seunang  
Ngon rusa nyang beulum dapat

Hana teudoh neumeulakee  
Bungong keumee bri Hadarat  
Tuhan neubri saboh watee  
Raja dilee ka teuingat

Ka teuingat raja naga  
Po areuta euncien ngon tungkat  
Yoh masa nyan po cut banta  
Raja naga neuse leugat

Sare banta neuseubot nan  
Naga nyan sideh bak teumpat  
Cit ka jithee laju yoh nyan  
Cintaan cut pirak lipat

Bak masa nyan raja naga  
Jicinta saboh hekeumat  
Trok le saboh burong rimba  
Keunan teuka deungon siat

Burong gagak geuseubot nan  
Raya panyang deungon hibat  
Ban sare troh gagak keunan  
Jikheun rijang ampon deelat

Pakon ruanku lon neupangge  
Peue meuseuke nyang meukarat  
Naga jikheun hai boh ate  
Beujinoe le tulong siat

Kajak mita Si Cut Ali  
Kacari di mana dapat  
Na alamatjih katuri  
Na kubri euncien ngon tungkat

Yoh nyan burong jipo laju  
Meu'u-'u sang bade Barat  
Lutong himbee abeh karu  
Bandum pra-pru jigrop lumpat

Burong gagak jipo curam  
Sangat tajam miseue kilat  
Jijak mita Ali Peureudan  
Kon lam hutan jijak lihat

Leupah jipo burong pindoe  
U nanggroe keu deh meulap-lap  
Ban jideungo asoe nanggroe  
Bansinaroe teukeujot that

Abeh karu manusia  
Jisangka uroe kiamat  
Ladom jikheun jeh geureuda  
U para nyang le jikarat

Ladom aneuk jidrop jiwa  
Hai dara kajak top tingkap  
Di burong nyan jipo laju  
Jijak eu bandum jeuep teumpat

Tunong Baroh abeh jieu  
Lom jilalu Timu Barat  
Lheueh nibak nyan burong pindoe  
Ka jiwoe bak-naga deelat

'Oh troh keu deh kheun hareutoe  
Hana lagoe ka kulihat  
Naga seuot Allah Allah  
Watee kupeugah lonpi silap

Ka lam rimba keu noe leupah  
Jak pantah kariwang leugat  
Burong gagak yoh nyan riwang  
Jipo tajam that jikarat

Rata uteuen jijak pandang  
Laju keu nan jipeuteupat  
Yoh nyan banta neudeungo su  
Meu'u-'u siblah rot Barat

Peureudan Ali ate kuyu  
Peudeueng laju reugam kong that  
Sireuta ngon neumeudo'a  
Neubaca peue-peue nyang mangat

Gagakpi troh keu nan lanja  
Cut banta sang-sang mèukarat  
Banta pike han le lagee  
Bak ulee laju neutakat

Nakeu sion putoh bulee  
Burong kajee jipo leugat  
Han ek jitheun peudeh raya  
That bisa peudeueng hekeumat

Burong jiklik 'oh meutaga  
Supi raya that meu'ap-'ap  
Kakeu burong jiteureubang  
Meulang-lang Timu Barat

Banta tahe hireuen mandang  
Cut intan ka teudong siat  
Raja naga cit ka jithee  
Jilakee laen hekeumat

Jeuet le saboh cicem pala  
Raja naga kheun amanat  
Hingga jipo cicem poala  
Bak banta keu nan troh siat

Ka jidong bak cabeueng kayee  
Ngon bulee laju jiangkat  
Cicem horeumat sangat teuntee  
Meunoe lagee jibri adat

Assalam alaikum Cut Peureudan  
Saleuem haluan nyang beureukat  
Gata po cut aneuk bangsawan  
Ngon rupa nyan sang malakat

Bak lon kalon atueuh rupa  
Akai gata meuseulihat  
Hana kuthee balek basa  
Sang beulaga hana adat

Burong gagak ho ka taba  
Pakon hana sidek sasat  
Jinoe patot kutueng bila  
Kupoh gata ureueng jeungkat

Yoh nyan banta hireuen tahe  
Neungo tuto cicem 'ajab  
Cicempi troh dong bak baho  
Bungong kundo jikeumeung angkat

Po Cut Ali neubet jaroe  
Cicem nyoe neukeumeung tangkap  
Banta gawang keu deh keu noe  
Cicem pindoe tan neutupat

Yoh nyan jiklok bak geulunyueng  
Han ek neutheun saketneu that  
Hingga jibet intan buleuen  
Han jan neukheun kapreh siat

Laju cicem jiteureubang  
Cut intan jibapo leugat  
Ka jipeuek sangat manyang  
Lam awan keu deh meulap-lap

Sangat hayut po samlakoe  
Sang bagoe han le seumangat  
Ngon peudeueng teutap bak jaroe  
Samlakoe neureugam kuat

Bantapi that neupet mata  
Sireuta gigoepi neukap  
Banta ingat dalam dada  
Sidroe Esa Po Hadarat

Banta jok droe ubak Tuhan  
Laen tan teumpat neuharap  
Lam hawa sideh meulang-lang  
That sayang po pirak lipat

Cicem bapo laju-laju  
U Timu siat u Barat  
Cicem pala lom' ka jikheun  
Gata ureueng sangat jeungkat

Bahle kutiek sinoe mameung  
Ho tameung plueng peugah leugat  
Po Cut Ali hana le su  
Maken laju yo meutat-tat

Hingga teuma jitren laju  
Lheueh jilalu Timu Barat  
Ka jipeutren yoh masa nyan  
Troh rijang bak naga deelat

'Oh troh keu nan Cut Peureudan  
Hadapan jipeudong leugat  
Raja naga yoh nyan tanyong  
That keunong jibri amanat

Hai banta peugah beukeunong  
Lon tanyong takheun beuteupat  
Masa bunoe gata jeuoh  
Lam paloh uteuen jeh sisat

Teuma jinoe puteh leusoh  
Keunoe troh saleh soe intat  
Lalu seuot po cut banta  
Meukuta ampon beurdeelat

Sangat 'ajab cicem pala  
Lon hamba laju jiangkat  
Bacut jimat bak geulunyueng  
Han ek lon theun saketi that

Lon pet mata ulon peutheun  
That hireuen jipo manyang that  
Nyankueu sabab keu noe rijang  
Cicem nyan sangat that kuat

Meunan neukheun leumah-leumbot  
Naga seuot bit that 'ajab  
Cicem pala pakri patot  
Ek jibeuet gata raya that

Banta neukheun saboh dali  
Kheundak Rabbi Po Hadarat  
Ateueh ulonpi teukeudi  
Cicem neubri leubeh kuat

Meunyo kheundak Poku Tuhan  
Mungken tuan ase siat  
Meunan neukheun Cut Peureudan  
Di naga nyapi utoh that

Naga seuot jikheun meunoe  
Nyan na lagoe teumpat taharap  
Peu cit gata han thee keudroe  
Samlakoe pakon that jeungkat

Meunyo cit na takheun Tuhan  
Pakon intan gata silap  
Gagak pakon tapoh rijang  
Pakri jeuet tan sidek sasat

Yoh nyan banta peugah laju  
Tuanku ulon meukarat  
Bak lon sangka burong hantu  
Lon eumpu ngon abeh kuat

Meunyo meunan seuot naga  
Singoh lusa ingat beuthat  
Bek taharap gata teuga  
Laenpi na leubeh kuat

Leubeh-leubeh laen teuga  
Keu Rabbana Tuhan Hadarat  
Dum makheuluk tan kuasa  
Nyang teuga Allah po kudrat

Dan lagi beuna pareksa  
Bek taba rijang that adat  
Walee bahle musoh gata  
Pareksa bek gadoh syarat

Beuthat eentreuk tapoh mate  
Tapike han jeuet han siat  
Meunyo tinggai pike syawe  
Teukeuse meutan ibarat

Kadang-kadang gop tan salah  
Tagagah laju meukarat  
Teuntee gata jeuet keu salah  
Bak Allah meuteumeung laknat

Banta deungo tuto naga  
That meurasa pirak lipat  
Ka teupike dalam dada  
Raja naga sangat 'ajab

Yoh masa nyan banta indah  
Angkee salah laju leugat  
Sajan seuot pantah-pantah  
Sibeunalah ban kheun deelat

Ulonteu nyoe sangat lopot  
Hana patot lon peudhap-dhap  
Banta meusu leumah-leumbot  
Po bungong sret angkee silap

Hingga teuma raja naga  
Bak banta jitanyong leugat  
Peue meunapsu jak lam rimba  
Peue tacinta nyang meukarat

Seuot banta Peureudan Ali  
Ampom doli rayek hajat  
Gaseh sayang gata raja  
Lon hamba tapeutroh hajat

Rusa teumeuloh lon jak mita  
Putroe hawa jikheun ubat  
Sabab nyang troh ulon keu noe  
Cut putroe saket meukarat

Meunyo hana tuanku droe  
Lon han jeuet woe le u teumpat  
Abeh bandum banta peugah  
Naga pantah seuot leugat

Meunyo rusa peue cit gundah  
Cit mudah di sinoe le that  
Teungoh-teungoh peugah haba  
Cut banta ngon naga deelat

Burong gagakpi troh gisa  
Jieu banta beungehjih that  
Gagak jidong di hadapan  
Naga yoh nyan marit leugat

Wahe gagak beudoh rijang  
Jak riwang bak Buket Su'ad  
Di sinan le rusa jroh-jroh  
Kadrop saboh nyang meukilat

Kaeu beuroh nyang teumeuloh  
Ban saboh kapeuwoe leugat  
Gagak seuot peue buet keu deh  
Ulee peudeh saketku that

Naga jikheun jinoe puleh  
'Oh troh keu deh laju meukhap  
Yoh nyan gagak jipo lanja  
Troph bak rimba Buket Su'ad

Ka jicok le saboh rusa  
Jigisa pantah ban kilat  
Hingga troh keu nan jipeuwoe  
Burong pindoe jikheun teupat

Nyoe leupeue rusa ka sampie  
Jak peuwoe keu deh keu ubat  
Teuma seuot po cut banta  
Sang han daya ek lon angkat

Gunong manyang raya-raya  
Lom ngon rimba jeuohpi that  
Yoh nyan gagak jikheun pantah  
Peue cit peugah bube pukat

Bak lon kalon bukon cidah  
Ngon babah sang sakin lipat  
Saboh rusa han ek tame  
Tako mise bube tungkat

Bahle kaman taeh sinoe  
Jeh pat putroe jimeureulap  
Yoh nyan banta ka neuiem droe  
Pike keudroe keunong timplak

Meugop rayek hana jalan  
Tapakri ban ka mustahak  
Peue nyang geukheun bandum reumbang  
Cit ka meunan nibak adat

Dalam tahe banta indah  
Meusu pantah naga deelat  
Ubak gagak naga peugah  
Bahle buet kah intat siat

Tan jipeugah peurintah prang  
Banta intan bek meukarat  
Mangat seunang woe bak makam  
Ariyan jak peutroh hajat

Naga jithee banta indah  
Raya tuah pirak lipat  
Buet meuseuke ek neuilah  
Tan jipeugah nyankeu sabab

Cit ka jithee raja naga  
Hingga teuma haba nyang rab  
Gagak deungo suroh naga  
Jicok rusa bulat-bulat

Sajan jicok Cut Peureudan  
Jiteureubang teuma leugat  
Gagak jipo miyup manyang  
Banta pandang bukon 'ajab

Hingga troh ateueh meuligoe  
Po samlakoe deuh neulihat  
Yoh nyan banta neukheun meunoe  
Nyankeu nanggroe di lon teumpat

Banta yue tren bak bineh gle  
Jisujud le jidong leugat  
Lom neumarit bungong pade  
Hai ulon he kapreh siat

Kujak kalon manusia  
Nyan rusa sinoe talihat  
Yoh nyan neuwoe po cut banta  
Na sikada neubeurangkat

Meuteumeung le dua ureueng  
Jiampeueng jak bri horeumat  
Lheueh jiseumbah mameung-mameung  
Yoh nyan jikheun prang meukarat

Banta deungo jipeugah prang  
Tahe hiran teupike siat  
Ureueng laenpi ka sampoe  
Na padum droe ka meusapat

Yoh nyan banta tanyong putroe  
Pakri bagoe na meularat  
Teungku ampon tuan putroe  
Hana sapeue jeuet meukarat

Meunyo meunan hana lon woe  
Tajak keu noe bandum siat  
Ubak rusa banta gisa  
Sajan neuba rakan leugat

Banta peugah dum peukara  
Deungon rusa neuyue ikat  
Jicok rusa ka jiusong  
Bungong tanjong sinan teutap

Yoh nyan banta kheun bak burong  
Hai ulon kaintat siat  
Lon keumeung woe u nanggroe jeh  
Anta Ladeh prang meukarat

Gagak jicok banta areh  
Jipo keu deh le meulap-lap  
Leupah gagak jiteureubang  
Sajan tuan pirak lipat

Dalam hawa mantong meulang-lang  
Bahle 'oh nan dilee teutap  
Teuduek haba po cut banta  
Lon peugisa rusa ubat

Ban sare troh dalam kuta  
Jipeuhaba pantah leugat  
Ban jideungo ka troh datang  
Cut meusubang ate mangat

Hingga jitren Cut Ariyan  
Jijak pandang keu nan siat  
Sare leumah jieu rusa  
Hireuen mata sangat 'ajab.

Deungon bulee sang suasa  
Tandok dua sang meukilat  
Bulee iku sang manek ro  
Putroe tahe bak jilihat

Putroe mandang hana tuto  
Bungong kundo galakjih that  
Hingga teuma Cut Ariyan  
Tanyong rijang ampon deelat

Pat neupiyoh ampon laman  
Nyang rusa nyan pat meundapat  
Ka jipeugah leupah riwang  
Jak kalon prang nyang meukarat

Ban jideungo hana lakoe  
Lom di putroe muka pucat  
Hana jan troh u meuligoe  
Po samlakoe lom beurangkat

Hingga teuma bungong sukron  
Jibri hukom sidroe leugat  
Jihei teungku peutroh hukom  
Jiyue puntong rusa ubat

Teungkupi troh keu nan sampoe  
Neukoh takue rusa leugat  
Nyang peurintah si nyak putroe  
Ingar keudroe pirak lipat

Bulee iku manek karang  
Hai teungku nyan bek neumat-mat  
Lon keumeung boh bak keuleumbu  
Hai teungku rayek mufeu'at

Insya Allah seuot teungku  
Po cut meulu ban nyang hajat  
Lheueh nibak nyan si nyak putroe  
U meuligoe jiek leugat

Abeh jikheun dum hareutoe  
Hingga sampoe ase leungkap  
Dageng rusa ase keu nan  
Ariyan yue masak leugat

Saboh bangon jiyue reundang  
Ladom panggang bulat-bulat  
Lam meuligoe kacah-kacoh  
Puteh leusoh jipeudhap-dhap

Sare masak putroe pajoh  
Teubiet ngon reuoh tan jiingat  
Putroe pajoh tan jipike  
Turot ate talak hajat

Teubiet reuoh cuco ile  
That meusampe jeuet keu ubat  
'Oh lheueh makeuen dageng rusa  
Cut meutia asoe mangat

Puleh tuboh jeuep anggeeta  
Seudap rasa dalam nekmat  
Seunang ate Cut Ariyan  
Ngon badan han le keurawat

Teutap pike sehat badan  
Lawet intan leupah ubat  
Sinan teutap lam meuligoe  
Haba putroe teiduek siat

Jinoe laen lon hareutoe  
Leupah on nyoe laen ayat  
Teiduek 'oh nan saboh ulah  
Lom meutamah amma bakdu

Akan teutapi nyak meutuah  
Balek harah cit sigeutu  
Miseue kalam kayem lon bet  
Ho nyang meugrop lon hue laju

Buet hikayat meunan patot  
Ayat lon bet seun sigeutu  
Peue puteh jeh di teungoh blang  
Lumpuek pisang leumah taeu

Proekeu sabab geuboh sinan  
Di sinan bijeh geutabu  
Meunan hai nyak lon boh mise  
Tapike beupantah laju

Lon boh ragam galak ate  
Lon boh mise mangat taeu  
Tiep-tiep nyang na geuboh tanda  
Di sinan na peue meunapsu

Hikayat nyoe meunan rupa  
Bicara banyak silalu  
Baranggasoe utoh geufam  
Akai nyan meutamah laju

Lagipi buet keubajikan  
Got that reumbang bak ri laku  
Le that sunan buet nyang peunteng  
Soe nyang ngeuren jeuet geutiru

Jeuep-jeuep teumpat jeuet tabandeng  
Kon hai po lem kheun lon buru  
Le that sinoe peutakian  
Soe nyang jeuet fam akai leuhu

Soe nyang pakoe akai panyang  
Fam hai tuan beumeulaku  
Jeuep-jeuep teumpat jeuet keu dali  
Akai ragi soe nyang na eu

Wajeb tuan tapadoli  
Tacari tatueng keu tiru  
Adat di lon nyang keumarang  
Bak Tuhan lon lakee bantu

Hana lupa uroe malam  
Harapan bak Rabbon Gafu  
Insya Allah tulong Kudrat  
Jeuet keu ubat ureueng nyang eu

Sinoe bacut lon amanat  
He sahbat syeedara aku  
Jampang takalon hikayat nyoe  
Keu kamoe do'a sigeutu

Talakee bak Tuhan sidroe  
Ulon nyoe beupanyang umu  
BeuTuhan bri dumpeue mudah  
Ngon ijazah teungku-teungku

Hingga mate ajai sudah  
Beumeusiblah nibak sitru  
BeuTuhan bri seulamat iman  
'Oh watee jan nyawong lalu

Beuek padok nibak syetan  
Pandangan bek roh meutiru  
Beuneutulong uleh Tuhan  
Beulon pandang zat Allahu

Hingga sampoe dalam jeurat  
Beujeuoh that adeueb kubu  
BeuTuhan bri keu nan nekmat  
Karonya rahmat Rabbon Gafu

BeuTuhan bri rahmat limpah  
Beulam jannah keu deh laju  
La ilaha illallah  
Rahmat neutamah ya Tuhanku

Ya Ilahi ya Rabbana  
Kabui do'a ya hu ya hu  
Meunan hai nyak tameupinta  
Bek lupa taniet keu aku

Jeutkeu dimnan wasiet kamoe  
Beutapakoe wahe teungku  
Jinoe keu deh ulon peuwoe  
Haba bunoe lon kheun laju

Ngo lon peugah burong gagak  
Ngon si nyak banta meusyeuhu  
Lam awan sideh meubulak  
Seun-seun siat leumah taeu

Jipeumeu'en di antara  
Jigisa Barat ngon Timu  
Lhee seun saho jipeulingka  
Cut banta neuyue tren laju

Hingga jitren u nanggroe jeh  
Anta Ladeh nyang meusyeuhu  
Yoh nyan marit banta areh  
Bek rab keu deh abeh karu

Gagak jidong bak gaki gle  
Jimarit le deungon teungku  
Bah kujak poh ureueng kaphe  
Mangat bek le nanggroe karu

Meukon meunan sabe jeuet prang  
Neukheun rijang pakri laku  
Banta deungo jimeuhaba  
Pakon gata neukheun laju

Sangat jeungkat bak ri rupa  
Manusia tajak balu  
Bahle insan sabe insan  
Di gata nyan kon sakufu

Bek le takheun narit meunan  
Jak riwang keu deh woe laju  
Meuna gaseh ngon tasayang  
Bak Tuhan talakee bantu

Beukek lon poh musoh Tuhan  
Ngon jalan beukek lon tipu  
Insya Allah tulong Kudrat  
Lon harap sidroe Tuhanku

Han lon takot kaphe laknat  
Ngon mukjizat Nabi Panghulu  
Ngon mukjizat Rasulullah  
Beureukat ayah sajan entu

Tuhan neubri keu lon mudah  
Insya Allah ulon teungku  
Meunan neukheun po samlakoe  
Burong pindoe jiem laju

Lheueh nyan banta beudoh neuwoe  
Hingga sampoe keu deh laju  
'Oh troh banta bak bantayan  
Dumna urang deuh le jieu

Mangat ate bandum rakan  
Ka neuriwang po cut meulü  
Prangpi yoh nyan teungoh meugeucoh  
Sare riyoh kiam 'a-'u

Banta neuduek pot-pot reuoh  
Meuh seuneupoh neueu laku  
Teutap sinan bungong uroe  
Lon kheun jinoe burong hantu

Jieu banta ka troh neuwoe  
Burong pindoe peugot laku  
Ka jibeudoh jiteureubang  
Meupru-pru sang riyeuke meusu

Gagak jipo sangat tajam  
Bak geulanggang jijak karu  
Sajan jiklik na ban guroh  
Hingga troh keu nan jilalu

Ureueng meuprang dum teukeujot  
Sare ribot plueng deu'u-'u  
Tumbak beude dum abeh sret  
That teumakot burong hantu

Maken burong jipoh sayeuep  
Jikeureupük sang geulanteue  
Ka jeuet angen bagoe ribot  
Bak jikawot sayeuep laju

Ureueng reubah plueng teukeujot  
Meubalot-balot dum teudu-du  
Gagak jipo jiwoe riwang  
Yoh masa nyan jidong meupru

Sare jidong sama teungoh  
Sang-sang rumoh ka meupusu  
Abeh jiplueng rakyat damoh  
Meuseunoh-seunoh melalu-lalu

Jieu rakyat that meusak-sak  
Lom jitinjak seun sigeutu  
Maken ureueng le that rusak  
Maken gagak grop-grop laju

Banta kalon meunan macam  
Neuplueng curam po cut meulu  
Ban jikalon banta intan  
Jiteureubang burong hantu

Banta neukheun sangat jeungkat  
Pakon rakyat kajak karu  
Tan jiseuot jipo leugat  
Jikarat keu deh meu'u-'u

Jiwoe laju ubak teumpat  
Ka lheueh siat peugot laku  
Peureudan Ali sayangneu that  
Jak boh ubat ureueng nyang lhu

Nyang le rusak ureueng rot deh  
Sabab keu deh brat jikaru  
Seungap ngon prang seungap bareh  
Rot noe rot deh geuwoe laju

Maseng-maseng woe bak teumpat  
Blah rot Barat blah rot Timu  
Ureueng rusak dum boh ubat  
Teuduek siat haba karu

Jinoe lon kheun Ali Peureudan  
Sajan rakan bintang timu  
Hingga uroepi ka malam  
Dumna urang geuwoe laju

Sare banta troh u rumoh  
Putroe gadoh ka meusyeuhu  
Bak malam nyan buleuen peuñoh  
Neumeuteuoh seun sigeutu

Neutanyong bak ureueng gampong  
Neueu meufom buet dahulu  
Sabab gadoh Putroe Hindi  
Peureudan Ali ate tunu

Nyankeu sabab mita dali  
Banta sudi yoh nyan laju  
Banta tanyong nibak mula  
Dum peukara nanggroe karu

Raja Syareh lheueh mate ka  
Dan sigala asoe leupu  
Meuntroe Cut Ben neueu hana  
Sireuta ngon si plah kayu

Yoh masa nyan bungong pade  
Banta pike meunoe laju  
Neuyue bileueng ureueng mate  
Neuyue takse padum ribu

Tujoh kali neuyue bileueng  
Banta kheun bak teungku-teungku  
Sapeue tuto bandum ureueng  
Bak meubileueng hana karu

Mate ureueng bak jumeulah  
Siribee peuet blah ngon tuanku  
Meuntroe Cut Ben tan soe peugah  
Jeuep-jeuep babah meunan neueu

Sajan deungon si plah rujee  
Tan soe angkee abeh umu  
Ban sare ka meunan teuntee  
Bungong keumee ka neutahu

Sangat areh po samlakoe  
Utoh ujoe bintang timu  
Putroe gadoh cit buet meuntroe  
Neufam keudroe po cut meulu

Hana soe thee laen saboh  
Jikheun gadoh dum meusyeuhu  
Asoe nanggroe dum meuteuoh  
Badai gadoh yoh dahulu

Meunan meufom dalam nanggroe  
Gadoh putroe mate abu  
Mate raja gadoh putroe  
Troph jinoe meunan meusyeuhu

Po Cut Ali akai canden  
Dalam dihen neuthee laju  
Gadoh Putroe Hindi Lisen  
Meuntroe Cut Ben nyang peusiru

Laen hana baranggasoe  
Lagi nanggroe teungoh karu  
Meunan neufam po samlakoe  
Lam ate droe po cut meulu

Yoh nyan banta han le sosah  
Han le gundah gadoh tunu  
Bitpi taeu hana gundah  
Muka mirah cit sigeutu

Sabab neuingat peurintah meuprang  
Han ek teuntang bak ri laku  
Nyankeu bacut muka masam  
Ali Peureudan nyang meulaku

Bak masa nyan lam meusapat  
Pirak lipat tanyong laju  
Peurintah meuprang pakri meuhad  
Ek takarat bak ri laku

Meuntroe Adan seuot pantah  
Allah Allah adoe teungku  
Bak lon kalon dali leumah  
Sangat payah bak taburu

Nyang ka meuprang dua buleuen  
Hana lanteuen meusigeutu  
Allah hai adoe han ek lon kheun  
Kaphe bajeueng le that bantu

Raja dua blah sangat girang  
Le that urang teuka laju  
Cit teungoh troh di beulakang  
Angkatan banyak seulalu

Nibak dali deungon adat  
Sang han meuhad ek tamaju  
Teuma nyang bit buet hakikat  
Han troh dapat bri Tuhaniku

Meunan narit Meuntroe Adan  
Neupeugah ban nyang ka lalu  
Banta deungo meunan macam  
Han le kalam bintang timu

Nyang na saja dalam ate  
Jimeurawe mita laku  
Meudeh meunoe banta pike  
Beuek ase jalan tipu

Hingga teuma po cut banta  
Abeh haba buet nyang lalu  
Dum makananpi ase ka  
Dum sigala makeuen laju

'Oh lheueh makeuen di seuramoe  
Dum sinaroe eh beuradu  
Banta neueh di meuligoe  
Sayang sidroe bintang timu

'Oh kuingat bukon sayang  
Putroepi tan pakri laku  
Sidroe neueh Ali Peureudan  
Teungeuh pangsan lam keuleumbu

Hingga mureh teubiet faja  
Teubleut mata beudoh meupru  
Jak seumbahyang po jroh rupa  
Sireuta ngon teungku-teungku

Lheueh seumbahyang po samlakoe  
Haba nyang toe lon kheun laju  
Neubeuet do'a leueng ngon jaro  
Lakee keudroe bak Tuhanku

Sajan lakee ubak Tuhan  
Balek batang ngon ileumu  
Hingga leumah banta pandang  
Keulaheran saboh laku

Leumah pike nyang meuteuntee  
Lam eleumee bri Tuhanku  
Bak masa nyan bungong keumee  
Jalan tipee peubuet laju

Yoh nyan banta peugot surat  
Ka neulipat laju-laju  
Sajan neukhœun dum amanat  
Bak rakyat neupeugah laku

Abeh bandum maklum haba  
Wasiet banta bintang timu  
Hingga uroepi ka jula  
Dum lasyeuka makeuen laju

'Oh lheueh nakeuen dum sinaroe  
Banta kheun proe bak sidadu  
Nyoe lon peugah dum sinaroe  
Bak uroe nyoe beuthat maju

Beusapeue kheun ate sunggoh  
Beumeugeucoh prang takaru  
Han jeuet meunoe le takukoh  
Lon takot roh rugoe laju

Abeh bandum kheun amanat  
Pirak lipat nyang meusyeuhu  
Neungieng sidroe nyang pantah that  
Neujok surat neukheun laku

Hingga teuma haba nyang toe  
Peuseuleusoe dum sidadu  
Beudoh rakyat dum sinaroe  
Peukeumah droe ban silaku

Jilhat peudeueng leumbeng sajan  
Sinapang bawak seulalu  
Abeh bandum bak uroe nyan  
Uleebalang ngon sidadu

Siat ase dum peukakah  
Lheueh meukeumah dum geuburu  
Hingga teuma geucok langkah  
Teubiet pantah laju-laju

'Oh sajan troh bak bineh blang  
Dum bunyian geupeumeusu  
Peh ngon tambo sajan geundrang  
Geuarak prang blah rot Timu

Geujak laju bak geulanggang  
Jideungoran keu deh laju  
Ban jideungo Raja Lizam  
Jikheun rijang bak sidadu

Beudoh rakan bek taduek le  
Pasoe beude teubiet laju  
Dum sipai jirok beude  
Jiteubiet le dum meu'u-'u

Ka meuron-ron keu noe keu deh  
Aneuk paleh bandum pra-pru  
Bandum rata beude puteh  
Cit meuceh-meuceh han jeuet taeu

Le that rakyat ureueng sitree  
Jiek meuree-ree meulalu-lalu  
Lheueh le beude seun siribee  
Sang-sang lagee riyeuke meusu

Ureueng rot noe nyoe lon peugah  
Mita ilah deungon laku  
Geupeuke prang sangat gagah  
Dum meublah-blah ka'a-ka'u

Meuntroe Sakdi nyang pahlawan  
Han soe tuban prang geumaju  
Geumeukeumah Meuntroe Adan  
Bak uroe nyan bandum tunu

Geumeukeumah Ahmad Kasari  
Apalagi teungku-teungku  
Geupeuke prang han soe tukri  
Kanan kiri dum jimaju

Bak uroe nyan bandum ureueng  
Hana peue kheun that geuburu  
Tadeungo cring meusu peudeueng  
Wie ngon uneun han jan jieu

Keu deh keu noe han meuho le  
Meute guble dum meujampu  
Han jeuet meuprang le ngon beude  
Ka meupake ngon seumamu

Sajan peudeueng leumbeng tumbak  
Jimeutop tak han jeuet taeu  
Ka meujampu dua pihak  
Rakan surak that meu'u-u

Rakan bunoe nyang me surat  
Pantahjih that han jan soe eu  
'Oh takalonjih rot Barat  
Na siat jeh ho rot Timu

Keu deh keu noe mita rakan  
Dalam kawan leumah jieu  
Ban sare ka deuh jipandang  
Jipeusimban yoh nyan laju

Pantahjih that aneuk budok  
Jan jianggok teungoh karu  
Di dalam prang teungoh meukeubok  
Surat jijok han jan taeu

Sira jiplueng jijok surat  
Balek ayat jikheun laju  
Ban jideungo balek ayat  
Seuot leugat peue han kacang

Sinoe ikheun sideh jikheun  
Ngon peudeueng jibet meulayang  
Sinoe jitak ateueng-ateueng  
Sideh linteueng reubah rakan

Jisom surat sira teueh  
Jisak keu deh dalam pinggang  
Di rakan nyoe jiplueng keu deh  
Di rakan jeh beudoh rijang

Ka troh hajat ban nyang pinta  
Musoh hana troh jituban  
Teungoh koroh sangat subra  
That guranta jipeukek prang

Ladom meupoh deungon tungkat  
Tadeungo tap su geudubang  
Ladom peudeueng patah leugat  
Abeh kuat jitak bangkang

'Oh meuteumeung sabé patot  
Han jisurot sabé jantan  
Sinoe jipoh sideh jigrop  
Sira jidhot bek meuayang

Saboh bagoe teungoh jikheun  
Jih seulinteueng seungap kalam  
Meunanpi na ladom ureueng  
Han jan jikheun jih ka simpan

Meunan-meunan jeuep-jeuep sagoe  
Rot deh rot noe that guransang  
Hingga teuma haba nyang toe  
Sikhan uroe meutunang prang

Keu deh keu noe hana tiwah  
Bandua blah sabé timang  
Uroepi ka akhe sudah  
Geupeurintah tarek alam

Asa uroe abeh leuho  
Geupeh tambo geupiyoh prang  
Rot deh rot noe ka geuundo  
Maseng lalo woe bak makam

Maseng-maseng woe lam kuta  
Han le subra seungap geundrang  
Nyoe lon peugah rakan banta  
Nyang seutia deungon ajam

'Oh lheueh bunoe meuteumeung surat  
Jiplueng siat bak tan urang  
'Oh troh keu deh ka jilihat  
Asoe surat meunoe macam

Surat nibak Peureudan Ali  
Saleuem lon bri wahe rakan  
Euntreuk malam watee sunyi  
Nyang meuseuti beutroh datang

Lon meung peugah nyang rahsia  
Ubak gata dum sibarang  
Ban jikalon meunan haba  
Peurab lanja dum bak rakan

Ka jibri thee bak rakan droe  
Bansinaroe sabe teelan  
Hingga teuma haba nyang toe  
Sabe keudroe ka jituban

Bak malam nyan bansireutoh  
Sajan musoh poh-poh rantam  
Jula malam teungeut musoh  
Rakan utoh mita jalan

Kira-kira poh dua blah  
Musoh sudah teungeut pangsan  
Lhee droe rakan jimeukeumah  
Jijak pantah lam seupot klam

Dalam seupot jipeuteupat  
Jitakat bak kuta dalam  
'Oh troh keu nan tamong leugat  
Jitanyong pat banta intan

Ka jipeugah di meuligoe  
Cit geupreh droe gata tuan  
Hingga jiek jih banlhee droe  
Keudeh sampoe rijang-rijang

Lheueh jiseumbah po cut banta  
Tanyong sigra dum lakuan  
Teungku ampon peue na pakat  
Toh nasihat na amilan

Ureueng musoh le that rakyat  
Sang han meuhad ek talawan  
Bunoepi na lon ngo jikheun  
Aneuk bajeueng Raja Lizam

Ka jiyue woe keu deh ureueng  
Jiyue jak tueng lom angkatan  
Banta seuot insya Allah  
Bek tagundah tulong Tuhan

Deungokeu nyoe ulon peugah  
Na hidayah saboh padan  
Bak watee nyan bungong pade  
Cit ka ase sikalian

Lheueh neupeugah awai akhe  
Baten lahe dum lakuan  
Neucok ringget siploh ribee  
Maseng sukee neuyue buang

Banta peugah jalan tipee  
'Oh troh watee teungoh meucang  
Abeh banta kheun hareutoe  
Rakan lhee droe jitren rijang

Jime ringget ladom sapo  
Jibubo dalam seupot clam  
'Oh troh jiwoe lam kuta jeh  
Musoh paleh mantong pangsan

Jijok ringget keu noe keu deh  
Dum meuceh-méuceh ubak rakan  
Sajan jikheun dum rahsia  
Maklum rata dum peuneusan

Hingga musohpi ka jaga  
Teubiet faja peungeuh ngilang  
Hana jitheepi meusidroe  
Musoh pindoe tan jituban

Haba rakan teuduek 'oh noe  
Lon kheun jinoe Ali Peureudan  
Teuduek 'oh nan saboh laku  
Amma bakdu lom keumudian

Nyoe lon peugah bintang timu  
Nyang meusyeuhu sigala alam  
Ban sare ka beungoh uroe  
Po samlakoe bri atoran

Peue nyang jarak neuyue peutoe  
Rukon cakcoe laen sajan  
Peue nyang kureueng neuyue tambah  
Dum peukakah nyang alat prang

Neuyue makeuen pantah-pantah  
Uroe sudah troh poh lapan  
'Oh lheueh makeuen yue meukeumah  
Dum peukakah peuaselan

Hingga teuma deungon siat  
Ase leungkap dum angkatan  
Sajan banta kheun amanat  
Neubri ingat dumna urang

Ingat-ingat bansinaroe  
Bak uroe nyoe bek le wayang  
Hingga lon kheun haba nyang toe  
Dum sinaroe ikat bulang

Meuntroe Adan han peue peugah  
Neupeurintah dum bak rakan  
Cit meusapat sabe meugah  
Dum kafilah ikat pinggang

Abeh bandum ikat keuieng  
'Oh tangieng sangat analan  
Ladom jimat parang ladieng  
Han tajeuet ngieng tiwah mandang

Rakan meuntroe cit meusyeuhu  
Barat Timu tan teuladan  
Bak uroe nyan peusak tunu  
Le that candu jipeureulan

Aneuk mata dum ka mirah  
Juah-juah bansikawan  
Ka meusapat sabe meugah  
Bandum sudah ikat bulang

Dum bak keuieng jilhat peudeueng  
Sare kingkeueng leumbeng sajan  
Hana laen meunan ureueng  
Sangat useueng bak lakuan

Deungon siat ase sudah  
Abeh keumah dum angkatan  
Hingga teubiet laju pantah  
Banta indah nyang sulotan

Sajan geundrang geupeumeusu  
Ngon beureugu macam-macam  
Ulah bangon ka'a-ka'u  
Keudeh laju bak geulanggang

Ban jideungo uleh musoh  
Raja biyoh jikheun nyoeban  
Beudoh rakan bek le kukoh  
Gop abeh troh jak kasimpan

Kajak laju nyan kaheumpah  
Bek meusinggah dalam padang  
Meunan jikheun haram jadah  
Sangat marah Raja Lizam

Ka jiteubiet le meuree-ree  
Le that sukee aneuk jalang  
Jimeuplueng-plueng meudilee-dilee  
Dumna sitree that guransang

Rakan seutia han peue peugah  
Cit ka keumah lam kawan nyan  
Sajan musoh teubiet pantah  
Dumna syeekah maseng kawan

Hingga teuma haba nyang toe  
Rot deh rot noe geuek curam  
Surak deumpek kiam bunyoe  
Sang-sang bagoe geumpa alam

Sinapang dum beude puteh  
Rot noe rot deh hana kuran  
Ban sare rab lheueh le bareh  
Nyang that peudeh beude panyang

Meusu beude na dum tupheuen  
Sang ujeuen reudok beuklam  
Sinoe meutam sideh meutum  
Keunong ureueng dum meutimphan

Bak uroe nyan prang raya that  
Bandum rakyat sangat girang  
Rot deh rot noe that jirapat  
Hana siat jibri reunggang

Meuntroe Adan saboh sagoe  
Ngon rakan droe nyang pilehan  
Geupeukek prang geukap gigoe  
Kaphe pindoe meusurot tan

Sabab le that ureueng musoh  
Raja biyoh le angkatan  
Nyang ka mate sinan layoh  
Laen dum troh di beulakang

Hana kuyut meusigeutu  
Jiek laju dum meurumpan  
Nyan sa mate dum teudu-du  
Han cit kuyu aneuk jalang

Rot deh rot noe jiek lanja  
Tan jikira nyawong simpan  
Meusu beude that meutaga  
Sang-sang geumpa runtoh alam

Saboh sage Meuntroe Sakdi  
Nyang teupuji taht pahlawan  
Jiba peudeueng kanan kiri  
Han soe tukri bak jimeucang

Geupeuek prang that meugeucoh  
Geupoh musoh le that simpan  
Geutak peudeuengpi that utoh  
Badan putoh dum meukhan-khan

Saboh sage Raja Ahmad  
Sajan rakyat sikalian  
Bandum ureueng that geukarat  
Hana siat geubri reunggang

Bak uroe nyan bandum ureueng  
Gaduh geusuen bandum agam  
Tan jiingat keunong peudeueng  
Tango pang-peung jitak bangkang

'Oh meurumpok sabe rancak  
Sangat gunjak bak jimeucang  
Sinoe jitak sideh jitak  
Tadeungo pak meukeureukhang

Banta kalon jimeupake  
Sabe-sabe mantong timang  
Phon beungoh-kon meunan sabe  
Ureueng kaphe laju datang

Yoh masa nyan po cut banta  
Tungkat faja nibak tangan  
Banta seupot tungkat mulia  
Raja naga neuse rijang

Laju tungkat jeuet keu peudeueng  
Intan buleuen meupintaan  
Yoh nyan banta neumeuinseuen  
Sajan neuleueng dua tangan

Ya Ilahi tulong kamoe  
Gata sidroe kuasaan  
Neubri kuat gaki jaroe  
Musoh nyoe beuek lon lawan

Neubri leupah nibak bahya  
Ngon kuasa gata Tuhan  
Rahop jaroe ubak muka  
Peudeueng raja cit lam reugam

Dalam tantra neugrop lumpat  
Pirak lipat neumasok prang  
Keu noe siat keu deh siat  
Prang neukarat Cut Peureudan

Peudeueng hekeumat neupeunari  
Kanan kiri laju neucang  
Pantahpi that han soe tukri  
Sang keudidi ateueh jalan

Keu noe keu deh neuba peudeueng  
Leupang-leupeung putoh meukhan  
Beungeh ate intan buleuen  
Sajan peudeueng nyang analan

Neupoh musoh han ek bileueng  
Le that ureueng mate simpan  
Bitpi dumnan le that mate  
Hana singke aneuk jalang

Lom teungoh troh sang ie ile  
Jiek sabe ban boh sungkam  
Peureudan Ali neucang laju  
Tan sigeutu neubri reunggang

U Barat sigo neulalu  
U Timu sigo neuriwang  
Rakan laenpi jimaju  
Jieu teungku ka dalam prang

Bandum karat 'oh meutaga  
Sang-sang rasa akai hilang  
Meuntroe-meuntroe dum sigala  
Sama-sama geukek curam

Rot deh rot noe ka meujampu  
That jimaju ureueng Islam  
Dalam kawan dum jiburu  
Got that karu bak watee nyan

Nyoe lon peugah rakan seutia  
Jikalon ka meunan macam  
Keu deh keu noe meungieng mata  
Jibri basa dum bak rakan

Di dalam prang that meupalot  
Ringget dum sret seutot pinggang  
Jitiek ringget sajan jigrop  
That klam-kabot han soe tuban

Yoh masa nyan bandum musoh  
Aneuk biyoh salah waham  
Jieu ringget dum bak tanoh  
Meuseunoh-seunoh aneuk jalang

Rakan banta cit ka ase  
Han peue kheun le yoh nyan jicang  
Teungoh-teungoh meute guble  
Jikoh lihe dum ngon peudang

Dumna musoh han troh pike  
Le that mate bak masa nyan  
Jeuep-jeuep sukee jitiek ringget  
Rakan apet jiplah kawan

Teungoh-teungoh jicok ringget  
Jililet ka jikoh reupang  
Yoh nyankeu prang got that maju  
Sangat karu lam geulanggang

Rakan banta jicang laju  
Han jan jieu jih ka simpan  
ureueng musoh le that mate  
Aneuk sihe keunong tawan

Dum teutiek-tiek meutindeh bangke  
Darah ile sang mirah blang  
Meuntroe Sakdi blah rot Baroh  
Jicang musoh le that karam

Ahmad Kasaripi that sunggoh  
Sangat tangkoh geukarat prang  
Meuntroe Adan blah rot Timu  
Jimaju ngon panglima prang

Rakan meuntroe mabok candu  
Han jeuet jieu atueh urang  
Jipeukek prang that klam-kabot  
Bagoe ribot angen tuphan

Bunyoe cokma leubab-leubub  
Tango ab-ab su geudubang  
Mate musoh subhanallah  
Le that bicah sitree Tuhan

Ladom mate ladom patah  
Ladom reubah sinan pangsan  
Bitpi dumnan mate lupot  
Tan jisurot aneuk jalang

**Meusigeutu tan teukeujot**  
**Jikalot sangat guransang**  
**Nyang ka mate sinan teutap**  
**Nyang na hayat laju meucang**

**Rakyatjih le han ek hisab**  
**Nyankeu sabab that guransang**  
**'Oh takalon miseue alon**  
**Sang bakat tren meugeulumbang**

**Teungoh teuka dum meuron-ron**  
**Jipeuron got tht meurumpan**  
**Taeu jiek that meupadoe**  
**Lagee bagoe sang pupalang**

**Meubacut tan kuyut asoe**  
**Jiek tanggoe ban boh sungkam**  
**Banta kalon musoh that le**  
**Bungong kundo muka masam**

**Yoh nyan banta sujud syuko**  
**Rabbon Gafo gata Tuhan**  
**Han ek lon theun bak ri laku**  
**Teuka laju di beulakang**

**Meukon tulong Rabbon Gafu**  
**Neubantu hamba dalam prang**  
**Nibak dali deungon adat**  
**Sang han meuhad ek lon lawan**

**Teuma nyang bit buet hakikat**  
**Han troh dapat ulon tuan**  
**Neutulong lon bak siseun nyoe**  
**Laen han soe kuasaan**

**Beuek lon poh kaphe pindoe**  
**Tulong lon nyoe Mailikon Manan**  
**Yoh masa nyan po samlakoe**  
**Neupeujok droe ubak Tuhan**

Neukap bibi ganceng gigoe  
Bak jaroé peudeueng analan  
Dalam tantra neugrop lumpat  
Han le ingat Cut Peureudan

Sunggoh ate prang neukarat  
Pantahpi that banta intan  
Teungoh taeu blah rot Baroh  
Siat ka troh blah Seulatan

Le that mate neucang musoh  
Peudeueng pajoh dum meukhan-khan  
Ladom reubah teungoh jiplueng  
Seulinteung han jan jipandang

Le that keunong peudeueng di rueng  
Teungoh jiplueng tinggai sikhan  
Sama teungoh saboh bagoe  
Aneuk bisoe keunong tawan

Bak cok ringget dum sinaroe  
Let that paloe mate simpan  
Yoh nyan musoh bandum sosah  
Gadoh ilah bak jimeucang

Peureudan Ali sangat marah  
Sangat pantah muda seudang  
han jan jingieng ka trok peudeueng  
Ladom jikheun jeh hai rakan

Yoh nyan musoh ate kureueng  
Aneuk bajeueng muka masam  
Ka meusurot seun-seun sidroe  
Saboh bagoe jiplueng curam

Leumah jieu raja pindoe  
Jibeudoh droe Raja Lizam  
Ureueng nyang plueng jijak ampeueng  
Raja jikheun wahe rakan

Pakon gata bandum taplueng  
Cuba takheun peue sukaran  
Han ek lon-theun he tuanku  
That jimaju Ali Peuredan

Pantahjih that Peureudan Ali  
Apalagi Meuntroe Adan  
Sajan-sajan Meuntroe Sakdi  
Ampon doli that pahlawan

Jipeukek prang that klam-kabot  
Bagoe ribot meunankeu sang  
Han jan tangieng nap u likot  
Bandum lupot nyawong simpan

Meunyo meunan jipeulaku  
Hai tuanku han ek teuntang  
Ban jideungo that jikaru  
Matajih hu Raja Lizam

Jijak laju si ceulaka  
Dalam tantra u teungoh midan  
Troh lam kawan jikheun sigra  
Ho ka gata dum sibarang

Han jeuet meuprang meunoe bagoe  
Ureueng binoe meunan macam  
Piyoh dilee bansinaroe  
Rot deh rot noe surot rijang

Ban neudeungo uleh banta  
Neubri basa dum bak rakan  
Ingat-ingat dumteu rata  
Dong meubanja mat sinapang

Meusidroe bek le meubeude  
Tadong sare dum meureuntang  
Lon meung kalon peue na ase  
Peu jipike Raja Lizam

**Hingga teuma bansinaroe**  
**Rot deh rot noe han le kiam**  
**Dong meuseueh-seueh rot deh rot noe**  
**Got meupadoe sang pupalang**

**Rot deh rot noe dong meubanja**  
**Pihak dua got meureuntang**  
**Niakb jaroe dum sinjata**  
**Bandum rata mat sinapang**

**Sama teungoh Raja Lizam**  
**Laen urang sidroe hana**  
**Bandum ureueng seungap kalam**  
**Yoh nyan Lizam jimeuhaba**

**Wahai Islam dum sinaroe**  
**Deungo lon nyoe sikrak haba**  
**Bek le meuprang lagee bunoe**  
**Meucang jinoe sama dua**

**Sinan sidroe sinoe sidroe**  
**Baranggasoe raja raja**  
**Meunyo cit na ureueng agam**  
**Beudoh tuan keu noe gata**

**Teubiet laju pantah rijang**  
**Nak tameucang sama dua**  
**Mangat taeu Raja Lizam**  
**Pakri macam nak tarasa**

**Baranggasoe nyang pahlawan**  
**Nak jipandang rakyat dumna**  
**Soe nyang beuhe sinan meuri**  
**Nyang beurani sinan nyata**

**Yoh masa nyan Peureudan Ali**  
**Hana neubri sikrak haba**  
**Teungoh pike muda seudang**  
**Goh lom meuban bak bicara**

Meuntroe Sakdi nyang pahlawan  
Leungo badan miseue geumpa  
Meuntroe Adanpi beungeh that  
Lizam laknat jimeung geunta

Hingga laen dumna rakyat  
Muka pucat bansineuna  
Ureueng rot deh dong meupadoe  
Bansinaroe rumeh duka

Sama teungoh raja pindoe  
Jitiek-tiek droe lila-lila  
Nibak jaroe reugam peudeueng  
Aneuk bajeueng gisa-gisa

Jitiek-tiek droe wie ngon uneun  
Bandum ureueng keunan mata  
Lhee seun saho jipalet-palet  
Ate saket si ceulaka

Yoh nyan jikheun narit saket  
Jibicah phet po cut banta  
Ho ka raja bangsa deelat  
Beureukat that lagoe gata

Peue tapike sabab lambat  
Bek hai sahbat ate lia  
Adat mata gata lon cang  
Teumpat rijang lam syeuruga

Beukit mate lon gata cang  
Teumpat rijang lam nuraka  
Maseng teumpat cit ka teuntee  
Peue tamalee beudoh sigra

Meunan jikheun raja asee  
Jiseumalee po cut banta  
Yoh nyan meusu Peureudan Ali  
Meuntroe Sakdi beudoh gata

Han jan abeh banta neukheun  
Meuntroe timpeueng teubit sigra  
Meuntroe lalo teungoh mideuen  
Rakyat hireuen banseulingka

Rot deh rot noe rakyat pandang  
Lam geulanggang ureueng dua  
**Meuntroe Sakdi neujak curam**  
Raja pandang beungeh raya

Yoh nyan Lizam jikheun meunoe  
Gata meuntroe bukon jeumba  
Jak tariwang keu deh jinoe  
Ngon kamoe han sabe padra

Tayue keu noe Ali Peureudan  
Sabe intan kamoe raja  
Bek ngon gata han sipadan  
Jak riwang keu deh tagisa

**Meuntroe Sakdi seuot nyoeban**  
Peue ri kalam tameuhaba  
Han tom di lon kuwoe riwang  
Cit that pantang bak lon gisa

Bek tuanku leupah tuto  
Bek raja e harap teuga  
Meunan narit that teukabo  
Tuanku e hana guna

Nyang got bak lon hai sulotan  
Seubah Tuhan jinoe gata  
Ban jideungo narit meunan  
Raja Lizam beungeh raya

Lizam seuot meunoe jikheun  
Tuto bajeueng kakeulua  
Sajan jibet laju peudeueng  
Jitak meupeung 'oh meutaga

**Keunong meuntroe ateueh baho**  
**Sang kulet tho keubeue tuha**  
**Meuntroe neukheun tuanku e**  
**Bek geumaro gatai hana**

Raja Lizam meuhah-meuhah  
Teusuet lidah si ceulaka  
Meuntroe Sakdi neukheun pantah  
Nyoe lon balah theun di gata

Sira neubet peudeueng leugat  
Neutakat bak ulee raja  
Lizam kalon neutak kuat  
Jilumpat ban kilat faja

Adat meukon pantahjih that  
Sinan meuhad beukah dua  
Peudeueng leupah sret bu bumoe  
Lizam meunoe lom kheun sigra

Goh lom utoh gata meuntroe  
Bek ngon kamoe tameuseunda  
Nyang got meuntroe jak tasurop  
Yoh goh lupot nyawong fana

**Meuntroe Sakdi hana le su**  
Jipeu'u-'u ateueh raja  
Ho nyang jigrop neucang laju  
Tan sigeutu nyang na reuda

Neucang keu deh jigrop keu noe  
Jipeulheueh droe si ceulaka  
Suara peudeueng that meubunyoe  
Sakdi Meuntroe beungeh raya

Silap bacut Raja Lizam  
Putoh tangan peudeueng seuba  
Jaroe uneun putoh sikhan  
Yoh nyan Lizam gadoh teuga

Cit han ek le jibet langkah  
Meuntroe tambah neucang lanja  
Keunong baho badan beukah  
Ajai sudah si ceulaka

Laju reubah Raja Lizam  
Rakyat Islam surak meutaga  
Dumna musoh muka masam  
Hana kalam seungap saja

Teutap sinan Sakdi Meuntroe  
Bak jaroe peudeueng nyang raya  
Wie ngon uneun neutiek-tiek droe  
Sakdi Meuntroe neulila-lila

Lhee seun saho poh-poh linggang  
Neuriwng bak bangke raja  
Neukoh lidah Raja Lizam  
Keudeh lam kawan neugeulawa

Sira neukheun narit meunoe  
Tuto bunoe neupeugisa  
Soe nyang beungeh ate seungkoe  
Beudoh keu noe jak tueng bila

Raja Lizam adoe saboh  
Ate reuloh hana tara  
Jieu aduen mate geupoh  
Lidah geukoh beungeh raya

Jiteubiet la pantah rijang  
Jiplueng curam kipet mata  
Meuntroe kalon jiplueng tajam  
Neutheun peudang teuntang dada

Keunong di nap tumboh u rueng  
Reubah linteueng sinan teurhanta  
Kakue mata kaphe bajeueng  
Adoe aduen sisyeedara

Surak deumpek that geumeuntam  
Dum Islam that meutaga  
Ureueng musoh hana kalam  
Dum sibarang pucat muka

'Oh lheuh mate Raja Lizam  
Dua sajan ngon syeedara  
Raja Lila jikheun nyoeban  
Beudoh rakan bek le kira

Hingga teuma dumjih sare  
Jipeubeude 'oh meutaga  
Nyang rot Islam han peue kheun le  
Geumaju le dalam tantra

Yoh nyankeu prang lom ka karu  
That meu'u'u sang ie raya  
Rot deh rot noe meumaju-maju  
Tan sigeutu jibri reuda

Han le meukri that klam-kabot  
Bagoe ribot bade raya  
Sideh jipoh sinoe jigrop  
Tango bab-bub su sinjata

Rot deh rot noe geukarat prang  
Yoh nyan timang sabé padra  
Bak masa nyan Meuntroe Adan  
Meuteumeung ngon Raja Lila

Rakan meuntroe cit meusapat  
Dum jirapat banseulingka  
Raja Lila ka jipagap  
Jikheun leugat meunoe haba

Rakan jikheun raja bajeueng  
Nyankeu ureueng paleh raya  
Raja deungo meunan jikheun  
Jibet peudeueng hu ngon mata

Ateueh rakan jimeung hantam  
Meuntroe tajam rot noe teuka  
Meuntroe utoh neutak sayong  
Putoh rancong badan raja

Keunong baho troh u punggong  
Nasib untong si ceulaka  
Sinan reubeh le meugule  
Kakeu mate Raja Lila

Surak deumpek geuheu sare  
Yoh nyan kaphe ate lia  
Rakan meuntroe yoh nyan maju  
Jipeu'u'u dalam tantra

Yoh nyan musoh abeh karu  
Plueng meudeuru ka jiguda  
Kakeu talo ureueng kaphe  
Sabab han le nyang keupala

Islam let jihei sare  
Meute guble jiteureupa  
Peureudan Ali masa bunoe  
Laen sagoe po cut banta

Hana rakanpi meusidroe  
Po samlakoe sidroe saja  
Le that mate neucang musoh  
Puteh leusoh let meutaga

Han ek jiplueng raja siploh  
Ka jipiyoh meubicara  
Sabe keudroe jimeupike  
Bek taplueng le he syeedara

Taplueng mate tadong mate  
Gotkeu bahle tapeumulia  
Meuna untong cit seulamat  
Kadang teutap lam sijahtera

Teungoh-teungoh jimeupakat

Pirak lipatpi troh teuka

Ban sare rab Ali Peureudan

Jitek rijang kulah kama

Jitek peudeueng bansikawan

Marit sajan meunoe haba

Ampon tuanku meukuta nanggroe

Hambaneu nyoe harap sijahtera

Bitpi goh lom ajai sampie

Bandum kamoe lheueh mate ka

Jinoe tuanku ampón meuah

Nyang ka leupah dum peukara

Bandum jijak junjong seumbah

Banta indah jipeumulia

Ladom sujud troh bak gaki

Horeumat jibri got han tara

Teuma neujaweeueb Peureudan Ali

Ampon bak Rabbi sibarang deesya

Meuah nibak lon sibarang salah

Buet ka leupah dum peukara

Akan teutapi nyoe lon peugah

Seumbah Allah bandum gata

Bek le seumbah sitree Tuhan

Beurala nyan tan kuasa

Bandum patong beutabuang

Meunan reumbang buet sibeuna

Meukon meunan bek meututo

Hai dalem e mate gata

Neubet peudeueng ateueh baho

Bungong kundo pura-pura

Sajan neukheun hana patot

Buet that karot bandum gata

Raja siplo that teumakot  
Lom jiseuot meunoe haba  
Teungku ampon han le bantah  
Ban peurintah ateh hamba

Nyawong tuboh darah gapah  
Cit milek sah di meukuta  
Meunan jikheun bansiplo droe  
Jipeujok droe ubak banta

Hingga teuma Cut Peureudan  
Neupeuriwang siplo raja  
Keudeh laju bak geulanggang  
Sajan-sajan deungon banta

'Oh troh keu deh bansinaroe  
Meumat jaroe bandum rata  
Lakee meuah keu deh keu noe  
Meuntroe-meuntroe raja-raja

'Oh lheueh dong-dong sinan siat  
Peuwoe leugat dalam kuta  
Troph u dalam geubri teumpat  
Ban nyang adat raja-raja

Jinoe lon kheun haba nyang rab  
Lon peurigap bek le haba  
Bak masa nyan lam meusapat  
Pirak lipat neupeusigra

Meuntroe Sakdi nyang pahlawan  
Neuboh sinan badai raja  
Anta Ladeh neuyue peugang  
Keu sulton mat neuraca

Banta bri theé dum sinaroe  
Asoe nanggroe tuha muda  
Yoh masa nyan po samlakoe  
Neupeurunoe siplo raja

Banta kheun bak raja siploh  
Puteh leusoh neubri aja  
Bandum gata nyang di baroh  
Ikot suroh nyoe keupala

Meuntroe Sakdi beutapateh  
Bek meulanggeh nibak banja  
Nyankeu badai Raja Syareh  
Soe han pateh jih binasa

Meunan neukheun banta indah  
Neupeugah bak siploh raja  
Raja siploh jawueub pantah  
Seuon titah kamoe dumna

Yoh masa nyan intan buleuen  
Laju neukheun meunoe haba  
Na tatu'oh mat keurajeuen  
Deungo lon kheun bandum gata

Tiep-tiep ureueng peukong nanggroe  
Jihukom droe dilee mula  
'Oh lheueh timang jihukom droe  
Baro dudoe jiseuranta

Baro teuma hukom tabri  
Bujang tandi maharaja  
Hingga sampoe dum sipai  
Hukom tabri nyang sibeuna

Meukon meunan han meusampe  
Cit lam sabe haro-hara  
Miseue ureueng geuplah awe  
Beugot sabe bak plah dua

Meuhan sabe nibak plah phon  
Teuntee sayong barangjan masa  
Nyankeu meunan adat hukom  
Nyang mula phon ade gata

'Oh lheueh ade gata sidroe  
Tapeurunoe dum peutua  
Meugot gata raja nanggroe  
Cit got keudroe bala tantra

Beutapateh lon amanat  
Beutaingat bandum gata  
Peukong nanggroe hukom teupat  
Sidek sasat han jeuet lupa

Meunan neukheun po samlakoe  
Neupeurunoe siploh raja  
Hingga teuma haba nyang toe  
Neupeusampoe yoh nyan lanja

Sinan laju neuyue Islam  
Ucap rijang kalimah dua  
Neupeurunoe laen sajan  
Keulakuan buet agama

'Oh sare lheueh ucap syahdat  
Kheun amanat laenpi na  
Abeh bandum neupeuingat  
Reusam adat hukom beuna

'Oh lheueh banta kheun hareutoe  
Pulang nanggroe maseng jeumba  
Maseng-maseng pulang bak droe  
Bansinaroe siploh raja

Neubri hukom sikalian  
Meuntroe pahlawan nyang keupala  
Neuyue bandum taklok keu nan  
Meunan intan neubri jeumba

Lheueh nibak nyan puteh leusoh  
'Oh lheueh putoh dum peukara  
Neubri idin raja siploh  
Nanggroe Baroh neuyue gisa

Ban jideungo banta suroh  
Raja siploh beudoh sigra  
Deungon banta jak mat jaroe  
Sira meunoe jikheun haba

Tuanku ampon hajat kamoe  
Sigra jinoe ngon meukuta  
Neujak meu'en nanggroe duson  
Deelat ampon kalon desa

Teuma seuot banta indah  
Insya Allah atueuh jeumala  
Bahle dudoe lon meulangkah  
Nyang jinoe bah dilee gata

Meuna panyang umu lon nyoe  
Laen uroe ulon teuka  
Meunan narit po samlakoe  
Teuma jiwoe siploh raja

Leupah jiwoe raja siploh  
Puteh leusoh meukeunira  
Neusie keubeue dua lhee ploh  
Neupeunujoh mate raja

Neukhanduri pantah-pantah  
Bri seudeukah sajan do'a  
Laju-laju neupeurintah  
Banta indah hajat gisa

Hingga teuma haba nyang toe  
Lheueh seuleusoe dum peukara  
Neumeukeumah po samlakoe  
Dan sinaroe balatantra

Meuntroe Sakdi sinan teutap  
Laen rakyat bandum gisa  
Abeh wasiet ngon amanat  
Pirak lipat beudoh sigra

Neucok langkah Ali Peureudan  
Rot lam hutan peukoh rimba  
Leupah banta neubeurjalan  
Teutap 'oh nan siat haba

Amma bakdu banta teungoh woe  
Dang-dang sampoe neukeumbali  
Teiduek siat po samlakoe  
Kisah meuwoe bak esteuri

Jinoe lon kheun Cut Ariyan  
Putroe intan laju beureuhi  
Lawet putroe tumbon badan  
Ie muka sang ulee ili

Ie kulet laju meukilat  
Maken lambat maken lawi  
Padum lawet muka pucat  
Jinoe ka rab deuh teurjali

Geunap buleuen troh kutika  
Saket teuka tuan Siti  
Nakeu uroe teungoh luha  
Budak nyata cut puteh di  
  
Lahe budak ureueng lakoe  
That seureuloe Tuhan neubri  
Ilok pareh hana bagoe  
Aneuk putroe that juhari

Ka jiklik meukua-kua  
Sare subra lam meuligi  
Ban neudeungo uleh raja  
Neuek lanja Adil Parisi

Raja lakee pantah sigra  
Keunoe taba cut puteh di  
Ct + Syarifah neucok manyak  
Ka neujok bak ampon doli

Raja kalon ate mangat

Rupa got that budak ini

Poteu raja sambot cucc

Neububo Adil Parisi

Po banta cut neutimang-timang

Yoh masa nyan nan neurasi

Raja meuhei Beureuma Sakyan

Geukheun meunan dalam rawi

'Oh lheueh raja rasi nama

Neujok bak ma Syarifah Binti

Cut Syarifah sambot sigra

Mayen mata hana sakri

Putroe Juhur nyang that galak

Lakee budak nibak umi

Neubri keu noe wahe cut nyak

Si manyak lon ayon dodi

Jicok keumuen boh lam ayon

Jikheun le phon jak kudodi

Jak lon timang bungong sukon

Bak aron di bineh pasi

Rayek rijang bintang tanjong

Jeuet keu payong asoe neugri

Allah hai jak lon timang-mang

Lam awan na bintang pari

Watee rayek Beureuma Sakyan

Beujeuet intan geulantoe abi

La ilaha illallah

Gaseh Allah cut puteh di

BeuTuhan bri rayek tuah

Gantoe ayah Peureudan Ali

Muhammadur Rasulullah

Beubek ubah aneuk bak janji

Beutapeubuet suroh Allah  
Ikot titah Muhammad Nabi  
Allah hai jak lon timang proe  
Samlakoe keumala neugri

Beujeuet aneuk peutimang nanggroe  
Barangsoe bek teuka beunci  
Allah hai jak kutimang bob  
Ie laot jimudek ili

Watee rayek bintang kutob  
Beukek sanggop geunggam neugri  
Allah hai aneuk Beureuma Sakyen  
'Oh kupandang sang beureuhi

Beujeuet aneuk nanggroe tapeugang  
Gata sulotan nibak barangri  
Jak lon timang bungong pade  
Boh ate rindu that umi

Beujeuet aneuk hukom ade  
Beusabe kanan ngon kiri  
La ilaha illallah  
That meutuah Tuhan neubri

Beutaturot aneuk lidah  
Bek ubah amanat umi  
Putroe Juhur meunan sabé  
Rindu ate that han sakri

Sinan jieh di yup ayon  
Bidak jicom peutang pagi  
Uroe malam jiteumimang  
Hana reunggang doda idi

Keumiet madeueng putroe intan  
Ariyan putroe juhari  
Teuduek siat putroe madeueng  
Jinoe lon kheun laen lagi

Amma bakdu nyoe nyang indah  
Jinoe kisah macam laen  
Teuduek 'oh nan saboh ulah  
Nyoe lon peugah Meuntroe Cut Ben

Masa dilee talo nanggroe  
Jicok Putroe Hindi Licens  
Si plah rijee teuma sidroe  
Ngon rakan droe sapeue baten

Uroe malam jijak lanja  
Arong rimba uteuen bugeng  
Padum tamah uteuen raya  
Tan jikira peusak gigeng

Didalam gle troh meubuleuen  
Meuntroe baplueng Hindi Licens  
Makanan tan peue jimakeuen  
Sayang buleuen putroe linteng

Padum lawet jibeurangkat  
Hingga sisat Teungku Cut Ben  
Han meuho le Timu Barat  
Teubeulasat jalan sureng

Hingga ka sret keu deh laju  
Nanggroe Timu neumat laen  
Nama nanggroe Cintra Biru  
That meusyeuhu hana bandeng

Nanggroe luah rame banda  
Nama Raja Tok Ja Raden  
Hukom kreueh that hana ngon sa  
Han jeuet meuriba bube leubeng

Meuka salah han jeuet beuna  
Meuka buta han jeuet juleng  
Neupeulara saboh pahlawan  
Ngon rakan sajan dum ireng

Jaga nanggroe jeuep-jeuep simpang  
Ngon angkatan tumbah leumbeng  
Nan pahlawan lon peugah soe  
Hazab Uboe bangsa raden

Ngon lasyeuka dum sinaroe  
Cit sajan droe sayeng-sayeng  
Tok Ja Raden aneuk lhee boh  
Cut putroe jroh linteng-linteng

Hana panyang ulon satoh  
Bek meurawoh haba bareng  
Nyoe lon peugah aneuk raja  
Lon peuhaba putroe canden

Putroe nyang phon Cutti Hawa  
Nyang keudua Cutti Baren  
Bandua ka geubri lakoe  
Lam meuligoe jareueng jitren

Sajan jido malam uroe  
Bok-bang keudroe ngon teungku lem  
Putroe tulet lon peuhaba  
Cut meutia goh lom kawen

Raja boh nan Nilam Cahya  
Hana ngon sa bak tabandeng  
Nilam Cahya umu sampoe  
Goh na lakoe puteh licen

Teuka linto geunap uroe  
Si nyak putroe cit han jitem  
Le that keu nan langke teuka  
Hana reuda jiek jitren

Padum-padum aneuk raja  
Cit han suka putroe linteng  
Hana sidroe keunong di ate  
Le that langke ate gigeng

Suntok buleuen meunan sabé  
Panyot kande jak keureuleng  
Teuduek siat haba putroe  
Kisah meuwoe Meuntroe Cut Ben

Ka sret keu nan masa jinoe  
Ujung nanggroe laju jitren  
Abeh gampong teubiet u blang  
Sajan intan Hindi Licens

Hingga ka troh ubak jalan  
Jijak curam sayeng-sayeng  
Meuteumeung le deungon Hazab  
Ka jipagap deungon leumbeng

Deungon hana sidek sasat  
Jidrop leugat Meuntroe Cut Ben  
Yoh nyan laju keu deh jiba  
Ubak Raja Tok Ja Raden

Bak masa nyan poteu raja  
Duek bak geuta bale gadeng  
Di lúa kuta ka jikeubah  
Hazab peugah jikheun bareng

Tuanku ampon ureueng salah  
Nyoe ho leupah ka lon peutren  
Bak lon kalon ateueh dali  
Ureueng lari nanggroe laen

Dua agam sidroe inong  
Buet han keunong biek aneuk jen  
Nibak lon eu sigak bangon  
Cit inong leubeh that linteng

Turon sabda nibak raja  
Jinoe ho ka si anek jen  
Teungku ampon jeh di lúa  
Cit lam jaga rakan ireng

Tok Ja Raden hukom beuna  
Cit han suka buet nyang mireng  
'Oh neudeungo buet meudina  
Jiek bisa muka ceuken

Bak masa nyan cit beungeh that  
Teusuet leugat narit deungkeng  
Meunyo meunan jakleh leugat  
Kasak lam glap si aneuk jen

Abeh teuboh adat nanggroe  
Aneuk bisoe han got baten  
Ka jiteubiet Hazab Uboe  
Jicok jinoe Meuntroe Cut Ben

Jiba laju keu deh jak glap  
Sajan rakyat dum meuireng  
Ban sare troh bak pinto glap  
Marit leugat Teungku Cut Ben

Pakon kamoe taenaya  
Salah hana bube leubeng  
Hana patot buet di gata  
Peue kareuna ate gigeng

Hazab Uboe tan jiseuot  
Nyang na jidhot jikheun anjeng  
Dalam glap laju jipeulop  
Pinto jitop jiboh ganceng

Saboh pinto ureueng dua  
Siblah kama Hindi Lisen  
Teutapi jarak cit hana  
Nyang kama sinan meuireng

Teutap sinan ureueng lhee droe  
Di gop geuwoe maseng-maseng  
Yoh masa nyan teungku meuntroe  
Kheun bak Putroe Hindi Lisen

Jaga pinto putroe intan  
Rot dalam tapeulop ganceng  
Cut Hindi ie mata sajan  
Pinto nyan gunci jipateng

Meuntroe kalon sret ie mata  
Marit sigra Meuntroe Cut Ben  
Hai po cut ate bek rugha  
Beutasaba puteh licen

Nibak Allah kala kada  
Meunoe jeumba Tuhan peutren  
Beuthat dumnoe ka teukeudi  
Teutapi ate bek ngeuren

Meuna tuah Peureudan Ali  
Tuhan bri keu noe troh geutren  
Judo gata reyek tuah  
Bek tagundah putroe linteng

Taharap keu sidroe Allah  
Insya Allah meugot baten  
Meunan narit teungku meuntroe  
Seungap Putroe Hindi Lisen

Kakeu sinan ureueng lhee droe  
Pike keudroe dalam dihen  
Hingga uroepi ka malam  
Kakeu sinan gureng-gureng

Seupotpi that payotpi tan  
Cut Hindi nyang that meuleng-leng  
Singoh beungoh geubri ngon bu  
Gule labu eungkot kareng

Beungohpi bu seupotpi bu  
Nyang that tunu Hindi Lisen  
Teutap sinan dalam kama  
Teiduek haba Meuntroe Cut Ben

Jinoe keu deh lon peugisa  
Ubak banta nyang teungoh tren  
Amma bakdu laen syahdan  
Ali Peureudan lon hareutoe

Padumna trep neujeumeurang  
Ka troh datang woe u nanggroe  
Sajan deungon balatantra  
Ka lam kuta dum sinaroe

Piyoh rakyat dum sineuna  
Banta lanja u meuligoe  
Troph u rumoh intan buleuen  
Ate hireuen po samlakoe

Mangat ate hana peue kheun  
Putroe madeueng ka lheueh manoe  
Neueu aneuk ureueng agam  
Banta pandang mata laloe

Dalam leumueng Cut Ariyan  
Neucok rijang neucom bak dhoe  
Yoh nyan banta meunyum galak  
Pandang budak that samlakoe

Cahya kulet puteh meuprak  
Meusigak sang batee ujoe  
Sang di mata hana bandeng  
Teutop laen dum sinaroe

Hingga teuma laen rakyat  
Jiwoe leugat dum lakee droe  
Maseng-maseng woe u teumpat  
Imum rakyat dum sinaroe

Putroe Juhurpi jigisa  
Pusong Rawa sajan lakoe  
Lakee idin bak syeedara  
Sireuta bak raja nanggroe

Abeh bandum woe keumbali  
Peureudan Ali tinggai sinoe  
Teutap sinan'ngon esteuri  
That beureuhi malam uroe

Hana jarak lam istana  
Po cut banta hireuen laloe  
Lale ate sijuek mata  
Ngon aneukda boh ate droe

Hingga lon kheun haba nyang rab  
Pirak lipat lam meuligoe  
Dua uroe meunan teutap  
Ka teuingat po samlakoe

Ka teuingat Hindi Lisen  
Meuntroe Cut Ben tan di nanggroe  
Bak masa nyan bintang canden  
Muka ceuken sosah keudroe

Sapatpi tan neumeuteuh  
Keu hai gadho si nyak putroe  
Di gop bandum geukheun gadoh  
Han soe teuoh deungon meuntroe

Banta pike bak masa nyan  
Balek batang lam ate droe  
Sinoepi tan sidehpi tan  
Pakrikeu ban saleh jinoe

Meudeh meunoe cit han ase  
Got bahle kuseutot keudroe  
Adat mantong ka meusampe  
Walee han le kakeu sampoe

Dalam ate han ek neutheun  
That hireuen laju teugoe-goe  
Bak wate nyan intan buleuen  
Ka neukheun laju bak putroe

Hai putroe cut judo baðan  
Deungo intan narit lon nyoe  
Di lon po cut kheundak jalan  
That bimbang jak kalon nanggroe

Rindu ate lon jak meu'en  
Sangat ingen lon sambinoe  
Meuna umu lon seulamat  
Cit han lambat rijang lon woe

Muka putroe sang han mangat  
Pirak lipat seumbah lakoe  
Yoh nyan neutren bungóng rihan  
Tinggai sinan bungong uroe

Banta teubiet laju u blang  
That sayang lom neuboh nanggroe  
Troh bineh gle neujak lanja  
Raja naga neuse jinoe

Ban neuseubot raja naga  
Burong rimba troh le sampoe  
Burong gagak teudong leugat  
Pirak lipat neukheun meunoe

Gaseh sayang ulon siat  
Kajak intat ulon jinoe  
Lon meung kalon jeuep-jeuep rimba  
Putroe muda judo kamoe

Yoh nyan gagak jicok banta  
Jipo lanja keu deh keu noe  
Rata uteuen dum jijak eu  
Burong hantu tajam han soe

Keu deh keu noe jipeulalu  
Hingga laju keu deh sampoe  
Ka troh keu deh nanggroe Timu  
Cintra Biru nama nanggroe

Banta kalon meunyum rindu  
Bintang timu yue tren jinoe  
Banta yue tren bak bineh gle  
Jisujud le burong pindoe

Yoh nyan marit bungong pade  
Hai ulon he udeh jak woe  
Bah tinggai lon sinoe siat  
Ingar-inggar nyan keu kamoe

Yoh nyan gagak jiwoe leugat  
Pirak lipat sayang sidroe  
Neujak laju rot dalam blang  
Neupeuseunang ujung nanggroe

Jeuep-jeuep duson neujeumeurang  
Jeuep-jeuep simpang jeuep-jeuep sage  
Ho nyang neujak tahe gante  
Seutot judo tuan putroe

Pat-pat nyang na dum ureueng le  
Bungong kundo jak deungo proe  
Sapatpi tan banta tanyong  
Intan bungong malee keudroe

Hingga neujak laju curam  
Trok bak jalan teungoh nanggroe  
Meuteumeung le ngon angkatan  
Nan pahlawan Hazab Uboe

Ban jikalon laen bulee  
Ureueng jamee jithee keudroe  
Hazab jikheun kapreh dilee  
Bungong keumee cit neuiem droe

Kajilet meudilee-dlee  
Meuree-ree atueh samlakoe  
Ban naukalon bit jirapat  
Pirak lipat marit meunoe

Pakon gata sangat jeungkat  
Tajak singkat langkah kamoe  
Meunān neukheun Peureudan Ali  
Tan pádoli aneuk bisoe

Bandum jikheun nyan pancuri  
Aneuk deungki kaboh taloe  
Sajan jilet keu nañ laju  
Jipeu'u'-u bansinaroe

Banta kalon han got laku  
Tungkat laju seupot bumoe  
Raja naga neuse rijang  
Tungkat nyan peudeueng jeuet keudroe

Yoh masa nyan Cut Peureudan  
Dalam kawan neugrop tanggoe  
Pura-pura banta keupong  
Jimeukong-kong sabe keudroe

Ka reubah teupangkong-pangkong  
Hazab jikheun kaboh taloe  
Sira jikheun ubak rakan  
Lumpat sajan laju ngon droe

Sira lumpat sira jidhot  
Jipeukeujot po samlakoe  
Ateueh banta laju jigrop  
U likot banta neutiek droe

Maken neuplueng maken jilet  
Jiapet jimeung boh taloe  
Banta kalon that jaipet  
Ate saket po samlakoe

Teuka marah intan buleuen  
Neubet peudeueng neutak tanggoe  
Hazab kilah sangat useueng  
Leupah peudeueng sret u bumoe

Yoh nyan banta meunyum malee  
Bungong keumee sang han le droe  
Ho nyang jigrop laju neucang  
Cut Peureudan beungeh han soe

Silap bacut Hazab pahlawan  
Leupah tangan muda samlakoe  
Keunong peudeueng putoh singkee  
Yoh nyan layee Hazab Uboe

Lom neutamah atueh ulee  
Sinan padée umu sampoe  
Hingga laen laju neucang  
Beungeh tuan that han bagoe

Ri nyang keunong laju simpan  
Teutiek sinan atueh bumoe  
Banta kalon teutiek bangke  
Bungong pade ingat meuwoe

Keupeue laju lon poh mate  
Inseueh ate lon han bagoe  
Banta tahe teudong siat  
Lom teuingat haba puroe

Masa naga kheun amanat  
Pirak lipat jipeurunoe  
Naga suroh cicem pala  
Jipeurasa bak tuboh droe

Yoh masa nyan po cut banta  
Neuplueng lanja po samlakoe  
Neuplueng laju keu deh u gle  
Pheuet meuuke ka neuboh droe

Leupah neuplueng bungong pade  
Ureueng mate lon hareutoe  
Jipeusapat bandum sare  
Jicok bangke ka jipeuwoe

Jipeuseumbah ubak raja  
Dum lasyeuka jikheun meunoe  
Teungku ampon ureueng muda  
Pane teuka saleh nanggroe

Le that mate kamoe jicang  
That analan aneuk bisoe  
Hazab Uboe nyang pahlawan  
Ka lheueh simpan tuanku droe

Saleh pane ureueng sisat  
Gle rot Barat jitren keu noe  
Lon eu rupa sangat hibat  
Ngon tungkat jimat bak jaroe

Kamoe peurab meujak ampeueng  
Tungkat bajeueng jeuet keu beusoe  
Jipoh kamoe leupang-leupeung  
Deungon peudeueng tungkat beusoe

Kamoepi mate dum seulinteueng  
Jihpi jiplueng ka jiboh droe  
Raja deungo ate hireuen  
Teujanun teupike meunoe

Dum ek mate jipoh Hazab  
Leubeh martabat ureueng lakoe  
Teuntee manyang bak deurajat  
Cit kon meuhad baranggasoe

'Ajab ate poteu raja  
Leumah lanja pike meunoe  
Beukit lon' yue seutot bila  
Meuhad hingga laba rugoe

Kadang cit nyo ureueng leubeh  
Meuhad jadeh karam nanggroe  
Got kusaba kaman kupreh  
Han meudaleh teukeudi rugoe

Lagipi ka troh bak janji  
Abeh raseuki Hazab uboe  
Meunan pike ampon doli  
Hukom neubri teuma dudoe

Neubri hukom ureueng mate  
Yue tanom le bansinaroe  
Proehai bila bek teuoh le  
Han ase hajat geutanyoe

Meukon kheundak Rabbon Kade  
Nyang ase siat seuleusoe  
Lagipi ka jiplueng u gle  
Peue tapike bila sinoe

Abeh narit poteu raja  
Tanom sigra Hazab Uboe  
Rusak ate dum syeedara  
Nyang bila pat tacok jinoe

Teutap sinan dalam pike  
Ureueng mate teuduek 'oh noe  
Jaga nanggroe hana soe le  
'Oh lheueh mate Hazab Uboe

Masa jinoe Cintra Biru  
Bandum kuyu asoe nanggroe  
Phon di Barat troh u Timu  
Bansibuju linteueng nanggroe

Jampang teuka ureueng tamong  
Agam inong takot keudroe  
Beuthat jijak Baroh Tunong  
Tan soe tanyong le barangsoe

Bandum ureueng kuyut ate  
'Oh lheueh mate Hazab Uboe  
Sampoe jinoe meunan sabe  
Hankeu na le jaga nanggroe

Sabab raja sang teumakot  
Patot-patot geuboh ganantoe  
Tok Ja Raden kureueng utoh  
Hana haloh peugang nanggroe

Adat neuyue gop neusuroh  
Ban-ban nyang roh tan neupakoe  
Peue nyang gop kheun pateh leugat  
Walee beuthat singoh rugoe

Sabab gop nyan akai singkat  
Sidek sasat tan geupakoe  
Asai nyang bek ubah janji  
Soe nyang ungki roh bak paloe

Meunyo neueu ubah janji  
Neutem dum kri laba rugoe  
Nyankeu sabab kreueh that hukom  
Jaga gampong asai puroe

Han jeuet ubah bube jarom  
Meunan meufom ureueng dungoe  
Toh Ja Raden mat keurajeuen  
Mangat takheun meunoe bagoe

Taboh leubeh tawuek kureueng  
Ban nyang jikheun asoe nanggroe  
Nyankeu sabab salah-saloh  
Adat geuboh peutua nanggroe

Di nap gop nyan ate sunggoh  
Watee jeuoh ban hajat droe  
Miseue bagoe buet nyang ka na  
Geuyue jaga gampong nanggroe

Soe meuteumeung jidrop sigra  
Tan jipura tanyong nanggroe  
Sabab Hazab ureueng meugah  
Jithee gagah meujih sidroe

Baranggasoe tan jimalee  
Beuthat sukee raja naenggroe  
Lompi raja hana neuthee  
Ban napsu mee peubuet keudroe

Meunan sabe dilee masa  
Dum peukara dalam nanggroe  
Teuma jinoe poteu raja  
Sabab hana neuboh gantoe

Sabab hana soe boh padan  
'Oh lheueh simpan Hazab Uboe  
Meunyo hana gop boh padan  
Sulotan lam seungap keudroe

Hingga teuma lon kheun laju  
Amma bakdu balek macam  
Tok Ja Raden nyang meusyeuhu  
Deungon teungku lon peugah ban

Uroe malam ate rindu  
Tuanku dalam cintaan  
Padum uroe meunan teutap  
'Oh lheueh Hazab mate simpan

Bak siuroe ampon deelat  
Ka teuingat meunoe macam  
Han jeuet meunoe kupeuiem le  
Di akhe miseue datang

Si Nyak Putroe Nilam Cahya  
Lakoe hana pakrikeu ban  
Bahle kaman kupareksa  
Toh nyang suka nak jipandang

Hingga teuma poteu raja  
Neumeusabda ubak bujang  
Takrah rakyat dum lam naenggroe  
Beutroh keu noe pantah rijang

Yoh nyan bujang jiplueng tanggoe  
Jeuep-jeuep sagoe jak peugah ban  
Jikheun suroh ampon deelat  
Han jeuet lambat dumteu tuan

Ban jideungo jitren leugat  
Teuduek siat haba bujang  
Nyoe lon peugah Peureudan Ali  
Nyang that ahli akai ajam

Masa bunoe neumeupike  
Bungong pade leupah tangan  
Teuka inseueh dalam ate  
Neuplueng u gle banta intan

Abeh neujak jeuep-jeuep sagoe  
Mita Putroe Cut Hindian  
Hingga teuma masa jinoe  
Ka sret keu noe lom meuriwang

Ban sare troh dalam nanggroe  
Neueu bagoe taloe jalan  
Neueu ureueng jak meuron-ron  
Bungong sukon lop lam kawan

Ho nyang geujak ureueng gampong  
Po bintang lhon seutot sajan  
Dalam nanggroe Cinta Biru  
Ka'ka' taloe jalan

Hingga troh kuta meusyeuhu  
Tamong laju kuta dalam  
Turon titah poteu raja  
U istana yue ek rijang

Mula nyang phon sukee raja  
Biek bentara uleebalang  
Peureudan Ali han peue peugah  
Banta indah sangat ajam

Sajan ureueng meugah-meugah  
Neuek pantah banta intan  
Abeh bandum u meuligoe  
Bansinaroe uleebalang

Yoh masa nyan raja nanggroe  
Kheun bak putroe aneuk badan  
Wahe aneuk Nilam Cahya  
Bijeh mata jak tapandang

Kalon beudeuh dum beurata  
Toh di gata jeuet tunangan  
Sabab lon eu dum han keunong  
Beudoh bungong buet beurijang

Siri nyang jeuet tueng keu judo  
Linto baro gata intan  
Putroe beudoh dong bak pinto  
Jingieng linto toh nyang reumbang

Abeh bandum jieu rupa  
Rata muka putroe pandang  
Hingga leumah jingieng banta  
Rindu teuka cut meusubang

Po Cut Ali duek rab pinto  
Hana tuto seungap kalam  
Si nyak putroe keu nan tahe  
Bungong kundo napsu bimbang

Cit keunong jen that di mata  
Laen hana meunán macam  
Lheueh nibak nyan putroe muda  
Bak ayahda ka jiriwang

Putroe peugah narit puntong  
Neudeungo lon hai du badan  
Nyoe baro troh linto di lon  
Uroe nyoe phon deuh lon pandang

Nyankeu nyang jeuet di lon lakoe  
Gatib jinoe laju rijang  
Ban neudeungo narit putroe  
Raja nanggroe that sukaan

Hingga teuma neuyue teuntee  
Bungong keumee tunyok rijang  
Sabda raja neuyue bri thee  
Ubak Jamee jak peugah ban

Saboh peurdana peugah haba  
Bak banta Ali Peureudan  
Hai banta cut ureueng muda  
Meuah kata sikalian

Han lon turi bijeh mata  
Beuthat gata biek sulotan  
Walee bahle baranggasoe  
Ulon nyoe hajat meukalam

Suroh nibak raja nanggroe  
Tadong sinoe gata intan  
Hajat peukawen uleh raja  
Nilam Cahya aneuk badan

Yoh nyan seuot po cut banta  
Sang han jeumba ulon tuan  
Hana patot ulonteu nyoe  
Tuan putroe kon tunangan

Lem peurdana lom kheun meunoe  
Bek samlakoe peurdawaan  
Patot nibak raja nanggroe  
Boh ate droe neumeung pulang

Poteu raja that beurcinta  
Nilam Cahya nyang that hilam  
Neumeung bri keu bijeh mata  
Hai banta keu judo badan

Yoh masa nyan Peureudan Ali  
Jirawi ate di dalam  
Lon jak seutöt po Cut Hindi  
Roh teujali laen urang

Hindi Lisen saleh han le  
Tuhan peucré ulon paban  
Saleh udep saleh mate  
Saleh lam gle rimueng kuran

Udep mate hankeu meukri  
Keu Cut Hindi salah waham  
Hingga teuma po Cut Ali  
Jawueub neubri meunoe kalam

Meunyo meunan hai peurdana  
Meunyo raja beurcintaan  
Nyokeu kamoe kala kada  
Hana daya bak lon tuan

Ban nyang napsu bak pangulee  
Ateueh ulee patek laman  
Uionteu nyoe cit ka geuthee  
Meunyo kamee muliaan

Abeh narit deungon banta  
Lem peurdana beudoh rijang  
Jijak peugah le bak raja  
Dum sigala keuputosan

Hingga teuma Tok Ja Raden  
Han neubri tren dumna urang  
Yoh nyan laju neupeukawen  
Putroe linteng yue koh andam

Geusie ngon keubeue dua lhee ploh  
Raja suroh rijang-rijang  
Lam meuligoe sare riyoh  
Kacah-kacoh sampie malam

Hingga lon kheun haba nyang rab  
Nikah leugat putroe intan-  
Malam nyan le geupeusapat  
Laen rakyat dum geupulang

Teutap sinan po cut banta  
Nilam Cahya dua sajan  
Rindu deundam that bandua  
Meuseusuka napsu bimbang

Teuduek siat po cut banta  
Laen haba lon peuriwang  
Amma bakdu keu deh meuwoe  
Ubak meuntroe nyang lam tahan

Sajan deungon si nyak putroe  
Malam uroe balek batang  
Bak siuroe Teungku Cut Ben  
Dalam dihen leumah jalan

Neupeurunoe Hindi Licens  
Haba bareng dum sibarang  
Geupeurunoe si plah rujeę  
Abeh teuntee dum lakuan

Hingga teuma saboh watee  
Jiboh lagee meuntroe ajam  
'Oh troh namiet jijak jok bu  
Meuntroe meusu phon mulaan

Bit raja nyoe adoe teungku  
Han tom kueu meunoe macam  
Hana ubah sang lagee hom  
Meunan meufom bak lon pandang

Teuma seuot si plah rujee  
Jiboh lagee ujong kalam  
Adat raja takheun sang hom  
Teuntee na hom sinan sajan

Bak lon pike sang han meufom  
Sabab tan hom lon eu sinan  
Yoh nyan meusu po Cut Hindi  
Ngon babahpi rancak han ban

Jiboh ujung narit takwi  
Jipeugah kri meunoe kalam  
Tiep-tiep ureueng nyang lagee hom  
Meunoe meufom hai lem badan

Beuthat hana di sinan hom  
Nyang geukheun hom cit geuboh nan  
Nibak adat meunan biasa  
Ka lheueh nyata dum tapandang

Mungken kheundak Tuhan Esa  
Teutapi na cit kon meunan  
Meunan jikheun po Cut Hindi  
Narit takwi meuwoe ulang

Namiet deungo sang beureuhi  
Jiplueng lari bak sulotan  
Jijak peugah ubak raja  
Dum sigala keulakuan

Awai akhe jipeuhaba  
Ube nyang ka jideungoran  
Raja deungo narit singke  
Saket ate that han macam

Sabda raja neuyue pangge  
Jibeudoh le sidroe urang  
Jijak laju keu deh bak glap  
Balek ayat laen macam

Lheueh jibuka dum pinto glap  
Teubiet leugat Meuntroe Cut Ben  
Jiba laju keu nan uleuen  
Banlhee ureueng sayeng-sayeng

Yoh nyan raja tahe hireuen  
Neueu buleuen Hindi Lisen  
Sang beureuhi napsu bimbang  
Sulotan pike ka laen

Neueu cahya kulet badan  
Han ubah ban cahya lilen  
Neueu khuluk dum lakuan  
Gaki tangan neukeureuleng

Ngon kulet sang pirak hupam  
Badan timang bagoe gaseng  
Boh beuteh ban jeundrang pade  
Hana mise raja bandeng

Poteu raja ka teupike  
'Ajab ate Toh Ja Raden  
Yoh nyan raja neubri basa  
Bak peurdana neukeureuleng

Hingga teuma lem peurdana  
Neupareksa Meuntroe Cut Ben  
Ho ka gata nyang lam ikat  
Kheun beuteupat lahe baten

Pakon gata narit jenangkat  
Kheun keu deelat tuto bareng  
Cuba peugah pakri meufom  
Nyang takheun hom peue tabandeng

Seuot meuntroe meunoe meufom  
Areuti hom nyankeu kuceng  
Peurdana kheun beurani that  
Peukeu sabab takheun kuceng

Sabab lon kheun meunoe ayat  
Akai singkat Tok Ja Raden  
Tan di sinan sidek sasat  
Nyankeu sabab lon kheun kuceng

Lom neutanyong lem peurdana  
Di gata ka lheueh tabareng  
Nyang sidroe kheun hompi hana  
Pakri makna cuba bandeng

Ka jiseuot si plah rujee  
Goh lom teuntee wahe cut lem  
Nyankeu sabab lon peuteuntee  
Meunoe lagee lon kheun bareng

Adat kuceng ka na iku  
Meunan meusyeuhu nyang ka ladem  
Nyang ka dilee meunan lon eu  
Dum meuiku bangsa kuceng

Meunan jikheun si plah kayee  
Meunyum malee Tok Ja Raden  
Lem peurdana laju tanyong  
Jeh nyang inong pakri bareng

Ka jiseuot intan bungong  
Narit keunong Hindi Lisen  
Po Cut Hindi jawueub haba  
Meunoe makna hai teungku lem

Meunoe meufom nibak hamba  
Meunyo nyang ka geukheun kuceng  
Beuthat hana sinan iku  
Hai teungku geukheun cit kuceng

Sabab nama nyan meusyeuhu  
Han jeuet teungku balek laen  
Meunan narit po Cut Hindi  
Maken doli muka ceuken

Bitpi raja muka pucat  
Beungeh han that Tok Ja Raden  
Sabab putroe jeuet keu ubat  
Sang ajimat Hindi Lisen

Teuma jawueb lem peurdana  
Sabet beuna ban tabareng  
Jinoe kaman lon pareksa  
Soe nan gata pane tatren

Ho tameung jak cuba peugah  
Asailiah cuba bandeng  
Deungon inong nyan tapeugah  
Supo zeejah inong linteng

Seuot meuntroe insya Allah  
Nyoe lon peugah deungo dalem  
Ulonteu nyoe jarak langkah  
Nama lon sah Meuntroe Cut Ben

Anta Ladeh teumpat kamoe  
Jiprang nanggroe raja laen  
Han ek lawan talo nanggroe  
Lon cok putroe ken noe lon tren

Nyoekue judo Ali Peureudan  
Nama nyan Cut Hindi Lisen  
Silayeue prang gop nyanpi tan  
Leupah tuan nanggroe laen

Nyankeu sabab ka lon peugah  
Asailiah masa lon tren  
Ban geudeungo meuntroe kisah  
Hireuen dahsyah Tok Ja Raden

Hingga teuma bri ngon teumpat  
Yue ek leugat bale gadeng  
Yoh nyan laju ampon deelat  
Narit singkat Tok Ja Raden

Meunyo meunan wahe meuntroe  
Bah keu kamoe Hindi Lisen  
Lagi jarak han troh tawoe  
Tadong sinoe gata dalem

Meuntroe seuot cit patot mee  
Meuka watee Hindi Lisen  
Cit hana peue roh jeunamee  
Bungong keumee neumeukawen

Akan teutapi ampon deelat  
Neupreh siat tanggoh dalem  
Meu'oh leupah buleuen Rajab  
Ka han trok had Hasan Husen

Meunyo han troh Peureudan Ali  
Po Cut Hindi han ho laen  
Ban neudeungo meuntroe takwi  
Sang beureuhi Tok Ja Raden

Yoh nyan raja lom neuseuot  
Hana patot keu noe jitren  
Nanggroe jeuoh sangkot-pawot  
Rimba karot uteuen bugeng

Beuthat meunan tapreh siat  
Meuna syarat seunang baten  
Meunyo rijang buet teudhap-dhap  
Akhe meuhad roh bak gigeng

Nyang ulon woe cit han dapat  
Jeuohpi that pakri lon tren  
Bak watee nyan po samlakoe  
Di meuligoe banta canden

Sajan judo si nyak putroe  
Teungoh meuproe geumeukhem-khem  
Roh meuteuoh Nilam Cahya  
Ureueng teuka nanggroe laen

Banta deungo meunan haba  
Beudoh sigra laju neutren  
Jeh di bale teungoh meukra  
Deungon raja Meuntroe Cut Ben

Teungoh-teungoh peugah haba  
Po cut bantapi troh neutren  
'Oh troh banta gaki rinyeun  
'Ajab hireuen Meuntroe Cut Ben

Sang-sang hana that jijeuet kheun  
Meuntroe ampeueng laju jitren  
Po Cut Hindi jigrop u leuen  
Jieu bulueng bintang canden

Sinoe geujak sideh geuplueng  
Bandum hireuen peupueh meusyen  
Bak masa nyan sinan di leuen  
Na dum ureueng peulheueh gaseng

Putroe tajo com bak gaki  
Cut Ali sang-sang meuleng-leng  
Rot deh rot noe that beureuhi  
Po Cut Hindi jimoe maken

Tok Ja Raden hireuen tahe  
Ka teusawo dalam dihen  
Peubu laku linto baro  
Saleh judo Hindi Licens

Yoh nyan neutren poteu raja  
Peumulia bintang canden  
Peureudan Ali peurab lanja  
Seumbah Raja Tok Ja Raden

Laju raja mat bak tangan  
Peukek rijang bale gadeng  
Troph u bale sikalian  
Neupeutrang bak Meuntroe Cut Ben

Ka jipeugah Ali Peureudan  
Tunangan Cut Hindi Licens  
Sare teuntee bintang timu  
Malee sipu Tok Ja Raden

Sabab bunoe teulah lalu  
Tuanku lakee meukawen  
Bak masa nyan poteu raja  
Peugah haba syoe nyang laen

Mangat gadoh malee mata  
Mangat lupa Meuntroe Cut Ben  
Buet meuteuoh tan lon peugah  
Panyang kisah malah cut lem

Tok Ja Raden buet ka leupah  
Lakee meuah lahe baten  
Buet nyang leupah geuglap meuntroe  
Sajan Putroe Hindi Licens

Lakee meuah laju keudroe  
Bak samlakoe banta canden  
Abeh bandum neupeumeuh  
Banta indah hana ceukan

Buet nyang laen tan lon peugah  
Tan faidah wahe cut lem  
Kakeu sinan banta intan  
Sajan tuan Tok Ja Raden

Deungon meuntroe sikalian  
Tunangan Cut Hindi Licens  
Teutap sinan linto baro  
Ateueh kasos bale gadeng

Nyoe lon peugah bungong kundo  
Dara baro nyang ban kawen  
Sare teuntee meunan haba  
Nilam Cahya laju jitren

Deungon dendayang dum sireuta  
Peumulia Hindi Licens  
Jipeuek le u meuligoe  
Sajan ngon droe putroe canden

'Oh meusapat sabé putroe  
Suntok uroe jimeukhem-khem  
Meunan sábe jeueb kutika  
Cit biasa meunan ladem

Han peue panyang lon peuhaba  
Maklum gata buet nyang laen  
Peureudan Ali mangat ate  
Hankeu na le dalam gigeng

Nyang neuseutot ka meusampe  
Bungong pade Hindi Lisen  
Teutap sinan lam meuligoe  
Dua putroe sayeng-sayeng

Rindu ate hana bagoe  
Po samlakoe han le ceukan  
Jinoe lon kheun haba nyang rab  
Bungong riwat bungong sunteng

Padum lawet sinan teutap  
Pirak lipat nyang that canden  
Ka teuingat hajat gisa  
Peurab bak Raja Tok Ja Raden

Neuidin lon he ayahda  
Hajat gisa nanggroe laen  
Sabda raja meunyo tawoe  
Ayeuem jaroe bungong sunteng

Peuwoe sajan si nyak putroe  
Meunyo sinoe jih meudeungkeng  
Meunyo tinggai Nilam Cahya  
Suntok masa lon lam gigeng

Meunan narit bak tuan tha  
Dan sigala dum peue laen  
Hingga teuma meumat tangan  
Deungan tuan Tok Ja Raden

Yoh masa nyan Ali Peureudan  
Peuaselan dum peue laen  
Yue meuase si nyak putroe  
Dan sinaroe Meuntroe Cut Ben

Amma bakdu sampoe hajat  
Balek ayat laen macam  
Keumah sare dumpeue leungkap  
Pirak lipat heundak jalan

Si Nyak Putroe Nilam Cahya  
Seumbah bunda ayah sajan  
Meumat jaroe ngon syeedara  
Meuah deesya hai da badan

Cutti Baren sret ia mata  
Cutti Hawa inseueh sayang  
Yoh nyan banta laju neutren  
Bintang canden putroe sajan

Bandum ureueng moe meuleng-leng  
Tok Ja Raden nyang that kiam  
Banta peunap laju u gle  
Hingga troh le bineh hutan

'Oh troh keu nan bungong pade  
Naga neuse banta intan  
Na sikeujab sinan banta  
Burong rimba troh le datang

Burong gagak keu nan teuka  
Tanyong sigra peue sukaran  
Ulon hajat woe u gampong  
Hai ulon tagaseh sayang

Yoh nyan jicok uleh burong  
Jiusong bansaboh kawan  
Laju keu deh gagak peuwoe  
U nanggroe bak teumpat makam

Deungon siat troh le sampoe  
Burong pindoe jitren u blang  
Burong jidong bak bineh gle  
Neumarit le Ali Peureudan

Tulong Tuhan Rabbon Kade  
Ka meusampe gaseh sayang  
Beule do'a that keu kamoe  
Udeh jak woe gata intan

Hingga burong yoh nyan jiwoe  
Di ureueng nyoepli woe rijang  
Neuwoe laju po cut banta  
Putroe dua rakan sajan

Ban sare troh dalam kuta  
Poteu raja hireuen mandang  
Bandum ureueng 'ajab ate  
Teupika keu muda seudang

Gadoh ka trep han meuho le  
Bungong pade ka meuriwang  
Hingga laju u meuligoe  
Po samlakoe putroe sajan

Troh u rumoh bansinaroe  
Beudoh Putroe Cut Ariyan  
Meumat jaroe sabe madu  
Tuanku laju bak tilam

Hingga geubet sajan ngon bu  
Makeuen laju sajan-sajan  
'Oh lheueh makeuen bansinaroe  
Teutap jinoe lam sukaan

Sinan teutap lam meuligoe  
Lakoe binoe rindu deundam  
Jinoe lon kheun haba nyang rab  
Pirak lipat lon peugah ban

Umu sibuleuen sinan teutap  
Jinoe hajat neubeurjalan  
Bak uroe nyan banta indah  
Yue keumeurah rijang-rijang

Deungon siat ase sudah  
Neucok langkah Ali Peureudan  
Anta Ladeh laju bungka  
Arong rimba uroe malam

'Oh troh keu deh nanggroe raya  
Neucok neuba meuntroe pahlawan  
Keu deh laju nanggroe Baroh  
Hingga ka troh siat datang

Ban jithee le raja siploh  
Dumjisuroh meupeurasan  
Jiteubiet le peumulia  
Sireuta sajan bunyian

Peutamong laju lam kuta  
Dum sigala peurjamuan  
Yoh masa nyan po cut banta  
Jeuep peukara bri atoran

Jeuep-jeuep sagoe neupeurintah  
Phon neupeugah bhah seumbahyang  
Meuseujid sajan deungon deyah  
Neuyue pantah peugot rijang

Buet meujudi ngon meutaroh  
Puteh leusoh dum neusagang  
Dum neuteugah manok pupoh  
Ngon peunajoh syoe nyang haram

Jeuep-jeuep gampong neubeurangkat  
Rata teumpat jak peugah ban  
Rata ureueng neupeuingat  
Deungon mangat yue seumbahyang

Ube rakan nyang sireutoh  
Meuh seuneupoh bri peunulang  
Dum rakan nyan pangkat neuboh  
Ban patot roh ateueh badan

Nyang u gampong han neubri woe  
Neuboh sinan bentara blang  
Ladom neuboh imum nanggroe  
Geusyik sagoe saboh macam

Ladom neuboh imum rakyat  
Yue peusapat hak geulanggang  
Nyang toe laot jaga pukat  
Ateueh rakyat kuasaan

Ladom neuboh keu peurdana  
Saboh raja dua urang  
Nyang malem meuhad ulama  
Guree raja peungadelan

Cit keu guree nyang le neuboh  
Neuyue sunggoh peungajian  
Rakan nyan cit utoh-utoh  
Bansireutoh ajam-ajam

Bandum rakan neuboh pangkat  
Pirak lipat bri balasan  
Nyang beulanja neupeugah pat  
Bak deelat maseng sulotai

Dum peukayan neuyue peulahe  
Bungong pade dum neupeutrang  
Bek jiungki dudoe akhe  
Cap sare Ali Peureudan

Abeh bandum pangkat neubri  
Dan lagi neukheun peuneusan  
Dua buleuen sinan teutap  
Neupeusyahdat dumna urang

'Oh lheueh abeh sidek sasat  
Pirak lipat teuma riwang  
Alhamdulillah kakeu sampoe  
Bansinaroe ka beh Islam

Deungon tulong Tuhan sidroe  
Hajat sampoe banta intan  
Anta Ladeh nanggroe luah  
Yoh nyan sudah dalam aman

Insya Allah mudah-mudah  
Ngon afuah Ali Peureudan  
Bak masa nyan ka seulamat  
Ka lam teebat dumna urang

Hingga teuma haba nyang rab  
Banta leugat neuwoe rijang  
Maseng-maseng woe u nanggroe  
Sakdi Meuntroe neuyue pulang

Anta Ladeh meuntroe gisa  
Di banta keu noe beurjalan  
Hingga troh nanggroe Palistina  
Padum lama lam safaran

Troh u gampong banta indah  
Neupeurintah rijang-rijang  
Bandum neuhimpon hina meugah  
Lakee langkah dum u dalam

'Oh ka sare dum meusapat  
Marit leugat Ali Peureudan  
Deungo lon kheun wareh sahbat  
Narit beureukat sikrak kalam

Kon lon pujo di nap mata  
Buet sibeuna lon peugah ban  
Meuntroe Cut Ben that seutia  
Allah Ta'ala bri balasan

Beuna tathee Meuntroe Cut Ben  
Hana laen meunan urang  
Hana miseue ngon tabandeng  
Leubeh canden leubeh ajam

Pihak gop nyan le that guna  
Patot beuna hak balasan  
Jinoe keurajeuen nanggroe Palistina  
Nyan guna lon bri peunulang

Mat neuraca bадai kamoe  
Ulon nyoe bah lon duek diam  
Beutaikot dum sinaroe  
Beutapakoe ban surohan

Beutapateh dum peurintah  
Nyang salah bak lon tariwang  
'Oh nan abeh banta peugah  
Seuon titah dumna urang

Hingga teuma haba nyang rab  
Neupeurigap Cut Peureudan  
Yoh na mantong dum meusapat  
Banta leugat laju peutrang

Aneuk binoe rakan sireutoh  
Puteh leusoh bri peunulang  
Tanoh umong tanoh lampoh  
Neuyue pajoh sikalian

Peng ngon ringget cit han peue kheun  
Tiep-tiep buleuen han tom kurang  
Abeh narit bungong keumee  
Neupeuteuntee di hadapan

Lheueh nyan rakyat jimeulakee  
Maseng sukee jiwoe rijang  
Tinggai raja sajan putroe  
Malam uroe lam sukaan

Padum lawet teuma dudoe  
Hajat neuwoe ju Jarussalam  
Meuntroe Cut Ben mat keurajeuen  
Abeh neukheun dum peuneusan

Bak uroe nyan intan buleuen  
Neuheu ureueng inong agam  
Ka meusapat padum reutoh  
Nanggroe jeuoh heundak jalan

Neucok langkah puteh leusoh  
Uroe siploh buleuen Syakban  
Nilan Cahya po Cut Hindi  
Dan lagi po Cut Ariyan

Bandum neuba po Cut Ali  
Woe bak umi Putroe Lelan  
Pusong Rawa keu deh laju  
Ubak Teungku Meuntroe Adan

'Oh troh ubak Putroe Juho  
Peugah ato heundak pulang  
Bak masa nyan Cut Seutia  
Aneuk ka na ureueng agam

Ka meupakat dum ulama  
Geuboh nama Khaled Adan  
Hingga teuma keumah pakat  
Geukrah rakyat Meuntroe Adan

Cukop ase deungon siat  
Yoh nyan leugat geubeurjalan  
Agam inong peukoh rimba  
Aneuk raja bukon sayang

Padum lawet lama masa  
Sampoe hingga Jarussalam  
Dalam kuta ka meusyeuhu  
Bintang timu ka meuriwang

Raja Ahmad ka neubri su  
Kajak laju tet meuriam  
Teubiet bandum tajak ampeueng  
Tajak tueng keu deh u padang

Ka jiteubiet dumna ureueng  
Jiampeueng sajan peurasan  
Hingga teuma ka'a-ka'u  
Tamong laju kuta dalam

U meuligoe keu deh laju  
Bak ibu Cut Putroe Lelan  
Ban sare troh u istana  
Seumbah bunda Cut Peureudan

Sajan-sajan Cut Seutia  
Sireuta ngon Meuntroe Adan  
Hingga teuma laen putroe  
Bansinaroe seumbah tuan

Keubak-keubok lam meuligoe  
Sabe keudroe aneuk ngon nang  
Lelan Syikri rindu ate  
That meusampe bak neupandang

Aneuk cuco leungkap.sare  
Meurungkhe meulintee sajan  
Putroe Hindi Nilam Cahya  
Leubeh rupa Cut Ariyan

Lale ate sijuek mata  
Pandang meurasa Putroe Lelan  
Teutap sinan lam meuligoe  
Bansinaroe rindu deundam

Jitren rakyat asoe nanggroe  
U meuligoe le that datang  
Bungong jaroe han ek peugah  
Le that ulah macam-macam

Ban nyang patot hina meugah  
Banta indah jijak julang  
Hingga teuma Peureudan Ali  
Hukom neubri pantah rijang

Neuyue seutot alem faki  
Neukhanduri peurjamuan  
Sie ngon keubeue dua lhee ploh  
Sare riyoh uroe malam

Lam meuligoe kacah-kacoh  
Tanong Baroh ureueng datang  
Deungon siat ase sudah  
Dumna syiah neyue khatam

Sajan neubri ngon seudeukah  
Han peue peugah panyang kalam  
Lheueh khanduri dum seuleusoe  
Ulama woe sikalian

Tinggai raja di meuligoe  
Malam uroe lam sukaan  
Sajan rakan ureueng gampong  
Bintang tanjong rindu deundam

Troh lhee buleuen woe u gampong  
Neubri hukom Ali Peureudan  
Dendayang nyang teugoh janji  
Peureudan Ali yue kireman

Neuyue intat keu suami  
Meuntroe Sakdi nyang pahlawan  
Ngon rakyat nanggroe Palistina  
Nyang na neuba keunan sajan

Neubri hukom neuyue gisa  
Dum sigala neuyue riwang  
Hingga teuma Putroe Juho  
Sajan linto Meuntroe Adan

Neubri hukom bungong kundo  
Beudoh da e jak tariwang  
Yoh nyan beudoh meucom jaroe  
Geumeumoe-moe sare kiam

Hingga abeh bandum geuwoe  
Maseng nanggroe teumpat makam  
Tinggai sinan po cut banta  
Mat neuraca Jarussalam

Sithon siblet banta bungka  
Jak pareksa jeuep salahan  
'Oh troh bak thon wajeb bungka  
Jeuep-jeuep raja nyang bawahan

Meunan sabe bak tiep-tiep thon  
Bintang tanjong bri ajaran  
Gaseh rakyat dum sigala don  
Banda duson lam pujian

Hingga teuma intan buleuen  
Han peue lon kheun panyang kalam  
Kakeu teutap lom keurajeuen  
Nanggroe mideuen Jarussalam

Teutap sinan lam istana  
Sajan po ma Putroe Lelan  
Sajan judo lhee sireuta  
Nilam Cahya Hindi Ariyan

Rindu ate mangat asoe  
Sajan putroe nyang analan  
Sinan teutap lam meuligoe  
Malam uroe napsu bimbang

Raja Ahmad bek le meuteuoh  
Meuhad saboh panglima prang  
Nyang keurajeuen po banta jroh  
Buleuen peunoh Ali Peureudan

Bak jumeulah bilangan raja  
Dua ploh dua nyang pilehan  
Peureudan Ali raja nyang raya  
Laen sigala taklok jajahan

Teutap raja lam keurajeuen  
Dalam hireuen pujoé Tuhan  
Teutap meuligoe teutap mideuen  
Teutap ureueng lam pujian

'Oh noe abeh lon peutamat  
Hikayat Ali Peureudan  
Bak lon sangka cit han tamat  
Payah lon that bak lon karang

Padum-padum teungeut mata  
Lon meujaga uroe malam  
Pijuet tuboh pucat muka  
Tan lon kira saket badan

Pihak ate lon teugoe-goe  
Malam uroe lam pikeran  
Lon eh malam dalam lumpoe  
Lon eh uroe di mata sajan

Sabab ka leupah lon surat phon  
Sang han meufom buet sikhan-khan  
Lon takot ceureuca wareh gampong  
Geukheun keu lon buet han reumbang

Nyankéu sabab that lon karat  
Lon ingat bek tinggai malang  
Hingga jinoe kakeu tamat  
Tulong Hadarat Poku Tuhan

Jiled nyang phon kakeu leungka  
Jiled keudua mantong teukarang  
Alhamdulillah sigala pujoé  
Keudeh meuwoe dum bak Tuhan

Deungon tulong Tuhan sidroe  
Ka seuleusoe lon keumarang  
Nyoe lon seubot po hikayat  
Bek jeuet sahbat perudawaan

Ureueng Pakeh eumpunya meuhad  
Di Teupin Jangat teumpat makam  
Nan Mukim Ujong nanggroe ibu  
Nanggroe Lueng Putu taklok jajahan

Nyankeu teumpat nyang meusyeuhu  
Nanggroe teungku po surat nyan  
Ureueng keumarang han lon peugah  
Malee babah meunankeu sang

Bitpi meunan lon kheun daerah  
Supaya mudah pike deungon fam  
Nan gampong lon miseue umpama  
Matang laksana Aceh geukheun Lam

Nyang geukheun teupin meusambong dua  
Sinan antara gampong lon tuan  
Silayeue lon duek di Peukan Aceh  
Jak mita leubeh lon cari makan

Peulale ate sinan phon daleh  
Ulon peujadeh cuba keumarang  
Lon cok keureutah lon pura-pura  
Kalampi lon ba daweuet lon ligan

Simalam siblet siseun lhee banja  
Sampoe seuhingga tamat lon karang  
Nyankeu masa tangga lon surat  
Peugot hikayat ulon cubaan

Alhamdulillah ka sampoe hajat  
Ngon tulong kudrat kuasa Tuhan  
Tuhan bri tamat uroe Jumeu'at  
Poh siblah meuhad teungoh cot timang

Kakeu abeh haba riwayat  
Jinoe meungucap mita amponan  
Astagfirullahal 'azim  
Rabbon Karim kabui do'a

Ya Tuhanku neupeuampon  
Deesya ulon dum sibarang  
Deesya lon le han ek himpon  
Nyang ka langsung buet salahan

Ya Allah ya Rabbana  
Ampon deesya ureueng keumarang  
Deungon deesya ureueng baca  
Sireuta ureueng duek sajan

Neubri kamoe lam sijahtera  
Lam dada beuteugoh iman  
Amin amin ya Rabbana  
Kabui do'a lon pintaan

Wa sallallahu 'ala khairi khalkihi  
Saidina Muhammaddin wa alihi wa sahibihi  
wa barik wa sallim ajma'in  
Amin ya Rabbal 'alamin amin

Tamat

Alaikumussalam warahmatullahi wabarakatuh

Dari tukang mengarang kepada sekalian hormat.  
26 – 5 – '33, bersamaan 2 Safar sanat 1352 H.

—o—

Penyunting



PN BALAI PUSTAKA — JAKARTA

Perpustakaan  
Jenderal Kes

899.22

TEU

h

